

N'DIJUUKA DYÀ DÎBÀ



Twinyikàayi mitù yètù. Mukalenge, patùdì badìsangìshe kaaba aka mu dindà dilenga dyà Paasàkà edi apa, tumòna ntòngà mikesè yilwangana mvità bwà kupàtuka, mbùlùbùlù yibùuka yikiikilamù ne yàngata cyàyi citùpà, nyuunyi yidila byenzè bu ne myoyi yàyi mmifwànyine kutaayika ne disànka, bwalu kùdikù Paasàkà. Twètù tudi twitabuuja ne Wèwè ngwàkabiisha Yesù ku bafwè, kùkaadi bidimu byàbúngì, leelù ewu, ne tudi tutwà cyanga bwà ditùkù dyà civulùkulu edi.

² Nènku kùlwekù Paasàkà munkaci mwètù bònsò, leelù ewu. Swàku bwà twètù, bu basadidi Bèndè, tùmvwèku Dìyi Dyèndè, bwà ne tuvwa mu bwobùmwè Nèndè musangu awu, ne mpindyewu tudi babiishìbwe Nèndè ne basòmbe pàmwè mu myaba yà mu Dyulu.

³ Bèneshàku disangisha edi mu tabernacle emu, ne mu matùnga ònsò kùyaayàdi, ku tèlèfonè ewu.

⁴ Ondòpàku babèedi bònsò ne bàdì mu ntàtù. Swàku bwà cùikalè Paasàkà, bwàbò bòbò pààbò, ne cimwangì cyà bùumuka ku mabèedi bàya ku mubidi tumatuma. Ne aba bàdì bafwè mu mpèkaatù ne mu matomboka abu, swàku biikadilè ne mwoyi leelù ewu ku Kilistò. Nènku netùKutumbishè, bwalu tudi tulòmba nùnkù mu Dinà Dyèndè. Amen.

⁵ Ncyà bushùwà ne mèmè ndi mbala eci bu dyèsè dyà dikèmesha mu dindà edi, bwà kwikala baalùkile muneemu mu Jeffersonville, mu Indiana emu, pàmwè ne disangisha dinène edi, èkèleeziyà mupàte patapata ne bantu biimànyine ne kuulu, ne mu nyungulukilu mwònsò ne pambèlu, ne mu biimanyikidi byà mashingi ne myaba yònsò. Bwènù nwènù bàdì bàtèèlejilà ku maatèlèfonè mu ditùnga dijimà, ndindà dilenga be kaaba aka.

⁶ Pa dîbà itaanu jaajaaja mu dindà emu, kalundà kàanyi kàa cyàdi cikunze aku nkabùuke kalwè kwikila ku dididiishi ne kambìishe ku tulù. Bimwèke ànu bu ne kaamwoyi kàakù kakesè aku kàvwa kafwànyine kutaayika, kamba ne: “M’Mubiike ku lufù.” Ntu misangu yònsò ànu ngeela meeyi ne kanyuunyi kakesè aka nkalundà kàanyi, bwalu mèmè ntu mukàswe.

⁷ Mùdì mwanu mwela bwàkù kòkò wàmba ne: “Kanyuunyi kakesè kampànda kafìkùlùke kàakaMumòna ùkènga pa nkùrusè, kùvwà mpèkaatù mukaMutèèke.” Mu bushùwà bwà bwalu, kanyuunyi kakesè aku kakàvwa kòkò ne mpèkaatù to. Kabivwa bikèngela bwà kufwilàYe kanyuunyi kakesè aku nànsha. “Kàdi kubùukakù e kuya kiikila ku nkùrusè aku ne kutèetakù bwà kujuula misonso ayi, ne kaamwìnù kàakù kakesè aku, ki kupetakù kaacyàdi kàakù aku kakùnze kònsò kùnzuù.” Nènku mùshindù awu ngùndì mèmè muswè pàanyi bwà cyànyi

kwikalaci, cyenzè bu ngabu's, bwà kuteetakù kukùba Cintu cyà butùmbi cyàkafwilàYe eci.

⁸ Bu mutùdi bamanyè ne dībà dyètù ndicincika kaaba aka, nangàngà bwà balundà bàdi munkaci mwà kutèèlejila ku tèlèfonè ewu abu, ndi muswè kukòkaku ntèmà yènu mu dindà emu ku—ku fòtò uvwa mukwàciibwe ku cyamù cyà fòtò kùkaadi cikondo kampànda, wa cikèènà-kumòna címvwà mumòne ku tabernacle eku, cyà dyumuka dyà mu Indiana, kuya ku Arizona aci; mùvwàbi bikèngela, bwà ntwilanganè ne Banjèlo mwandamutekète, mu mmwènekeli wa cipaapu cyà musàkà. Nciyi mumanyè cívwa mwà kwenzeka pashiishe to, pàngàakakufikà apu, ndyàmbidila ne címwa nndekeelu wa mwoyi wànyì, bwà ne muntu nànsha umwe kàvwakù mwà kutwàla adi dikùbàkùbà to; ne ndi mutwishiiibwe ne nwènù bònsò nudi bamanyè bwalu abu. Ne pashiishe mu Sabino Canyon, dindà kampànda bu edi, pàmvwà munkaci mwà kusambila, kwàkatèèkiibwa mwelè wà mvità mu cyanza cyànyì, ne kwamba ne: “Eci n’Dìyì, ne Mwelè wà mvità wà Dìyì.”

⁹ Pashiishe, Banjèlo bàakamwènèka ànu mwàkambiibwàbi mu cipròfetà amu. Ki pa dībà dimwèdimwè adi, cisùmbù cinènè cyà Bukènkè kuumukaci mwaba wùmvwà mwimànyine awu, ne kubàndaci muulu mu mpeepèlè mu ntàntà wa kilòmèètà makùmi ànaayi ne mwandamukùlù, ne mu nyùngulukilu wa cijèngù aci, byenzè bu mapwàpwà a Banjèlo, ne mu mau lu amu kuzòlaci cipaapu cyà musàkà mu cisùmbù címwècimwè cyà Banjèlo cyàkamwènèkà aci.

¹⁰ Beena maalu a mamanya kukwàtabò fòtò, kuumukila ku Mexique kwònsò kwàka, pàvwàci citentemuka cyùmukila ku nord wa Arizona apu, mwaba wùvwà Nyumà Mwimpè mwambè ne mèmè nèngìkalè mwimànyine awu, “mu ntàntà wa kilòmèètà makùmi àsambòmbò ne yinaayi ku nord-est wa Tucson.” Ki kubàndaci mu mpeepèlè, ne cikàndàkàndà cyà *Life* kukwàtaci maafòtò kwamba ne: “Cintu kampànda cyà kaciyi cyùmvwika muulu mule mu bibwàshìbwàshì, mùdi kamùyi mufwànyine kwikalakù mutaleela, mùdi kamùyi mufwànyine kwikalakù mafwima àbànda anyì cinyi; mu butùmbùkè bwà kilòmèètà makùmi ànaayi ne mwandamukùlù, ne bucyàmà bwà kilòmèètà makùmi ànaayi ne yisàtu,” ne cìbànda buludi cyùmukila mwaba wùvwà Banjèlo abu awu.

¹¹ Mpindyewu, bàvwa bàkonka, bwà kumanya. Beena maalu a mamanya, umwe wabò mu Tucson, kuswayè bwà kumanya dyumvwija kampànda, kàdi ncyàkamwambila nànsha. Nwènù bònsò nukààvwa bacimanyè, kumpàla. Kàdi kacìvwa bwàbò bòbò to; cívwa mbwènù nwènù.

¹² Ki mwaba awu kwakulaYè naanyì, kwamba ne: “Bitampì Mwandamutekète abi nebikangudiibwè. Maalu-masokoka mwandamutekète awu, bwalu busokoka njila mwandamutekète

bwà Bible, bùtù bukànga kacya ku difùkà dyà dyulu ne buloba abu, nebùbuuludiibwè.” Nènku twètù, pèètù ànu kasùmbù kakesè kadipwekèshe, pa kufwànyikija ne buloba bujimà, tudi basànkile mabènesha aa, tutèeleja maalu-masokoka awu. Dibàkà, dishipa dyà dibàkà, dimiinu dyà nyòka, nkonko mishìilèshìilàngàne yònsò eyi, mbitùbuulwila mu kaabujimà, kí nkùdi muntu to, kàdi kùdi Nzambì, Yèyè mwinè, udi mukàngùle maalu-masokoka mwandamutekète awu; a cìvwà Èkèleeziyà, mùshindù wùvwàYe mu Kilistò ku cibangidilu, ne mùvwàYe mwà kubuuludiibwa mu ditùkù dyà ndekeelu.

¹³ Nènku mpindyewu, pàakabàndà cyòci eci, tudi ne fòtò wa pambèlu pa citaata. Kàdi, kàbìdi, mèmè ndi ne fòtò awu mutèeka kaaba aka, nwènù baswè kumòna, mùdi cikàndàkàndà cyà *Life* cimupàtùle. Kàdi ndi ndìkonka's ní batèeleji bàanyi, bàdi bàmwèka apa aba, ní bàkaadikù batàngile fòtò awu, nwamònu's, nwamònu's, mu mùshindù wùvwàbi bikèngela.

¹⁴ Nudi bavùlùke ne, mvwà munkaci mwà kuyiisha pàakalwà cikèenà-kumòna eci apu, pa cyena-bwalu cyà Mukàndà wà Bwàkabuulwibwà, mùvwà banzujì bàà kale, mutùvwà bamòne Yesù mu Bwàkabuulwibwà 1 amu. Patwàkabangà kukàngula Bitampi Mwandamutekète...anyi—anyi Bikondo byà Èkèleeziyà's wè, ànu pabwìpì menemene ne dikàngula dyà Bitampi Mwandamutekète abi. Kilistò ùvwà mwimàne ne “nsukì bu myòsà yà mùkòòkò, mitòòke.” Ne mèmè kunùumvwijaci ne, banzujì bàà kale bàà ba-Anglais, ne banzujì bàà kùkaadi ntàntà mule, pàvwàbo bàya ku cibàsà cyà dyangacila bunzujì, bwà kwikalabò badìcipe, bàvwa bàpèeshiibwa bukòòkeshi bwàbò bwà kumutù kwà byònsò. Bàvwa bavwàla kafulu kaa nsukì mitòòke, mutùdi kwà kwamba, ku mitù yàbò aku, bwà kuleeja bukòòkeshi bwàbò bwà kumutù kwà byònsò abu.

¹⁵ Èè, wèwè mukùdimùne fòtò awu mùshindù ewu ne mutàngile, pàmwàpa udi mwà kucimwèna mu batèeleji amu ne, n'Kilistò. Mònaayi mèsù Èndè matàngile apa, ànu menemene mùvwàci cikèngela kwikalà; muvwàle kafulu kàà nsukì mitòòke kàà Bunzambì bwà Kumutù kwà byònsò ne Nzujì wa mauulu ònsò ne wa buloba. Nudikù mwà kumòna mèsù Èndè, dyùlu, mukana Mwèndè anyi? [Disangisha dìdi dyàmba ne: “Amen.”—Muf.] Kùdimwinàayi ànu fòtò awu numuumsha mu *nùnkù*, mùshindù wùvwàbo bòbò bamukwàcile awu; mu *nùnkù* ewu, mùshindù wùdiye ne cyà kwikalà. Nènku nwènù. . . Nudi mwà kucimòna anyi? [“Amen.”] Yèyè ùdi Nzujì wa kumutù kwà bònsò. Kakwèna mukwàbò nànsha umwe to pa kuumusha Yèyè. Nènku ki dimanyishiibwa dipwàngàne ndyòdì adi cyàkàbìdi, dishindika dyà ne Mukenji ewu m'Bulelela. Eci ki Bulelèlè. Ncilelèlè. Nènku cìMuvwija kàyi Mupèrsonà mwisàtù to, kàdi Mupèrsonà umwèpelè!

¹⁶ Ne citòòke aci, nwamònu's, nudi numòna cìdi cibwicìdile aci, mpalà Wèndè, mwedi Wèndè, ne mèsù Èndè. Nènku

mònaayi, Ùdi ùtàngila . . . KùdiYe nkùdi kùfùminà Bukênkè bùdi bükênkeshà ku dyàbalùme ebu, kùdiYe mutàngile aku. Ne pa nküruse, ki kùvwàYe mutàngile, nku dyàbalùme, kwàkafwilàYe ngènzàmpèkààtu awu luse. Mu Bukênkè bwà dibìikà Dyèndè dyà ku lufù, tucidi ànu twenda tuya mu Dìna Dyèndè.

¹⁷ Ndi njinga, mu dindà emu, bwà ngìkalakù ne díbà dyàbúngi dyà—dyà kupicishila pa bintu bìdi bikémeshà ebi bìdi bipite kule ne kule mpatà yònsò, bijaadikiibwe munda mwà bidimu makùmi àsàtù bishàale ebi, anyi makùmi àsàtù ne bitaanu, apa mene mu èkèleeziyà ewu; kubangila ànu ku musùlù kwàka, pàakapwekà Bukênkè bùmwebùmwe abu mu Jeffersonville emu, mu cidimu cyà 1933, ne bwambè mèyi aa ne: “Ànu mùvwà Yone Mubàtiiji mutumìibwe bwà kudyànjidila dilwa dyà kumpàlà dya Kilistò amu, Mukenji wèbè wèwè newùdyanjidilè diibìdi.” Tukàadi ku cikondo cyà nshìikidilu, ne tudi tucimòna. Tutu mîngà misangu tudìkonka ne mbwà cinyi kî ncitangàlake pa buloba; pàmwàpa musangu kumpàla netùpetèku mpungà wa kuumvwija aci, bu Nzambi mwà kwanyisha.

¹⁸ Mpindyewu ndi muswè bwà nùbuululè mu—mu Bibles yènu, bu mutùtù misangu yònsò twitabuuja ne Dìyi ndidì ne cyà kulwa kumpàla, dibala dyà Dìyi. Ntu misangu yònsò ànu mbala Aci, bwalu Cidi. . . Mèyi àanyi mèmè mmèyi a muntu, òwò neàpangilè; kàdi Dìyi dyà Nzambi kadyèna mwà kupangilakù to.

¹⁹ Mpindyewu netwikalè mwà—mwà kubala mu Mifundu Minsantu, mutù-wà-mwandà. Nènku tudi baswè bwà nwènu kubuulula, dyàmbedi, mu myaba yisàtù mu Bible, yîndi musungùle bwà kubala. Wùmwe wà ku yôyi wùdi mu Bwàkabuulwibwà, nshapità 1, ku mvensà wa 17 ne wa 18; apa ki pàakamwènekàYe ne “nsukì Yèndè mitòoke bu myòsà yà mùkòòkò; ne makàsà Èndè àvwa bu cyamù cyà kabanda.” Ne pashìshe ndi muswè bwà nwènu kwangata kàbidi, mu Bibles yènu amu, Loomò 8.11. Ndi musungùle, mu dindà emu, myaba yisàtù yà kubala, yà mu Mifundù Minsantu, bwà Diiyisha dyanyi leelù ewu, didi Mukalenge mutèeke pa mwoyi wanyi bwà dibìikà dyà ku lufù. Ne pashìshe ndi muswè, bwà nwènu kàbidi, nwàngatè Maakò 16.1 ne 2. Mwômò amu ki mûngàngacilà mutù-wà-mwandà wanyi—wanyi.

²⁰ Mpindyewu mu Bwàkabuulwibwà 1.18, tudi tubala Mèyi aa, 17 ne 18.

Ne pàngàakamumòna, ngàkapòna ku makàsà èndè bu mufwè. Ne yèyè wàkatèeka cyanza cyèndè cyà dyàbalùme pambidi pàanyi, ùngambila ne: Kùcìinyi nànsha; bwalu mèmè ndi wa kumpàlà ne wa ndekeelu.

Ndi ewu udi ne mwoyi, ne uvwa mufwè awu; ne, mòna, ndi ne mwoyi bwà kashidi ne kashidi, Amen; ne ndi ne nsapi yà lufù ne yà ifernò.

21 Ne mu Loomò nshapità wa 8 ku mvensà wa 11, tudi tubala nùnkù ewu.

Kàdi pùkalàbi ne Nyumà wa ewu wákabùisha Yesù ku bafwè awu mmusòmbèle munda mwènù, ewu wákabùisha Kìlistò ku bafwè awu neàfuulululè mibidi yènù yà cifwàkà ayi ku Nyumà wendè udi musòmbèle munda mwènù awu.

22 Nènku mpindyewu mu Maakò nshapità wa 16, nshapità wa dibìikà dyà ku lufù awu, nshapità wa 16, mvensà 1 ne mwi2.

Nènku pààkapità nsabatu, Màriyà wa ku Magàdàlà, maamù...ne Màriyà mamwèndè wa Yakòbò, ne Salòmè, bàwwa balwè ne mànànanshì, bwà bààmòna mwà kulwa kumwelabò.

Nènku ne dindà bwebwebwe ditùkù dyà kumpàlà dyà lumingu, bòbò bààkalwa ku lukità pa dijuuka dyà dìbà.

23 Mpindyewu, mutù-wà-mwandà wànyì mu dindà emu, ndi muswè kwangata bu mutù-wà-mwandà ne: *N'Dijuuka Dyà Dìbà*. Nènku bwà cyena-bwalu, ndi muswè kucibìikila ne: “Bukolè bufùululudi.”

24 Mpindyewu, nudi bamanyè's, pàmwàpa nudi batèèlèje cisanji ne bambi bashiilèshiiàngàne bààkula. Ne Mwanèètù wa balùme wa ngiikàdilù milenga Neville ewu mu dindà emu wàkula pa cyena-bwalu cyèndè cyà Paasàkà, pa dibìikà dyà ku lufù. Kì mémè kudyàmbidila ne pàmwàpa ndi mufwànyine kucyàngata mu—mu kulonda kwà kajila kashiilàngànekù ndambù, kabìyi bwà kupangakanangana to, kàdi ànu bwà kusàkìdilakù ndambù, pàmwàpa mu cibadi cikwàbò, bwènù nwènù. Mifùndu, mùshindù wònsò wùyaayà ne Mifùndu awu, Cidi misangu yònsò ànu cyàmba patòòke bwà Yesù Kìlistò. Kwèna mwà kuseesukakù to, nànsha bìshi. Cidi misangu yònsò cìMwamba ànu Yèyè patòòke.

25 Mpindyewu, bu mùdì bàà pa buloba leelù ewu mu mudimu wà—wà civùlukilu, anyi, nangàngà, mu Ètats-Unis emu ne luseke elu lwà buloba, mu dindà emu, mu maèkèleeziyà ne mu myaba yònsò, bàdi munkaci mwà kutwà cyanga cyà civùlukilu cyà—cyà bucìmunyi butàmbe bunènè bùkaadiku muntu mupetè.

26 Ndi ngeela meeji ne, bu Musùngidi pààkafwàYe apu, anyi bu mwànà mukesè pààkalediibwàYe apu, Kàvwakù mufwànyine kwikala kaaba aka to bu kàyi mulwè pa buloba. Ne pààkafwàYe, ncyà bushùwà ne Wàkafuta cibawu bwà mpèkaatù wetù. Kàdi, nànsha nànkù, s'kùvwa kulediibwe bânà bakesè bàà mu mabòko balenga bààbùngì, ne kùvwa bantu bààbùngì bàkaavwà bakènge ne bafwè bwà kiipàcìlè kalelèlè, kàdi kacya kakùvwakù nànsha umwe uvwa mwà kudibìisha ku lufù to too ne ku ditùkù edi.

27 Mpindyewu, ndumingu lutàmbe bunènè mu maalu-malonda, ditwà dyà cyanga dyà ditàmbe bunènè dyà bikondo byònsò, mu

Paasàkà ewu ki mwàkajaadikilà Ye cìvwà Ye mwambè. Muntu ùdi mwà kwamba maalu, kàdi nànsha nànkù kaèna ànu menemene mwà kwitabuujiibwa, kantu ne kantu to, pìikalàwu kaàyi majaadikiibwe ne m'Bulelèlà to. Ne bu Nzambì, Wàkamba ne: “Nùteetè bintu byònsò; nùkwatè bikolè ku cidi cimpè,” kî mMufwànyine kukwambila bwà wèwè kwenza cintu kampànda cidiYe Yèyè kàyi mufwànyine kwenza to. Pa nànkù Yèyè wàkajaadika cìvwà Ewu wàkafwà bwà mpèkaatù wetù awu.

²⁸ Nènku, mpindyewu, kadyèna ànu ditùkù dyà civùlukilu cyanààna, dyà bilòngò binènè byà Paasàkà byònsò ebi, ne tufulu twà Paasàkà, ne tùlulù tukùnzùbile, ne bikwàbò, bitùdi twètù babwejèmu abi, ne cyanga cinsantu to; biinè abi bidi ànu bimpè, kàdi eci kî ncintu cyena-diinà mu mùshindù awu to.

²⁹ Mùdi bantu leelù ewu bàteeta kwamba ne: “Bìvwa bitùkèngela kwoweshangana màyi ku makàsà musangu wùmwe ku cidimu, mu—mu diinâyì, ne mu diitànù twangata mèèsa a Mukalenge,” ne malongesha mashiilèshiiàngàne ònsò a... Bàdi bàkòkangana bwà ne bivwa bikèngela kwikalaci ditùkù *kampànda* anyi ditùkù *kansanga*, anyi ní bivwa bikèngela kwikalaci ditùkù dyà nsabatu anyi ditùkù dyà kumpàlà dyà lumingu; anyi... Bintu byònsò ebi bidi ànu bilèlè cyanààna. Cyònsò cyà ku byòbi abi ncifwànyine kukukwàcisha ku cinyi, nànsha mwenzè Cijila nànsha kùyi mwenzè Cijila, pìikalàku kakùyi Mwoyi munda mwèbè? Cidi ànu ncivùlukilu cyanààna. Ne, katwèna cilumbù ne bintu abi to, kàdi ncyà bushùwà ne bòbò mbakumbàje bilèlè byàbò, kàdi bashiye ku luseke cintu cyà mushinga munène.

³⁰ Bwà Sàtaanà nànsha wèwè mutèndeledi wa bìshi, anyi mubingè mu Dilongesha dyèbè bìshi. Wèwè mupangile Mwoyi awu, kwàkujuukakù to, nànsha byà munyi. Nànsha wèwè mutèndeledi wa bìshi, mwimpè wa bìshi, èkèleeziyà yùkaadi wa mwòmò anyi yiwikalà wa mwòmò nànsha miikàle búngi munyi, kacyèna ne mushinga nànsha wùmwe to paùdi kùyi mulediibwe cyàkàbidi.

³¹ Pa nànkù, pìikalàbi ne Nzambì wàkabiisha Yesù ku bafwè, WàkaMubiisha mbwà civùlukilu anyi? Ne dindà dyà dibiiikà dyà ku lufù edi didi ànu di—ditùkù dimwèpelè mu cidimu, anyi nditùkù kampànda ditùdi tutwà cyanga bwà cyòci eci? Anyi, tudikù twètù aba bapeci bàà dyàkalenga bàà ku dibiiikà Dyèndè dyà ku lufù anyi? Cidi cyùmvwija cinyi bwànyì mèmè? Cidi cyùmvwija cinyi bwèbè wèwè? Mpindyewu tudi twètù twitabuujà, ku diitabuujà ne, Yèyè mmubiike ku bafwè, kàdi ciinè aci cidi naanyì bwalu kaayi? Aci's cìvwa kùkaadi bidimu binunu bibidi.

Mpindyewu bwà kupeta mutù-wà-mwandà ewu!

³² Bu mùmvwà mucyòke, dibòkò dinsaama, bwà nshingì yìvwà mungàngà mukàji awu muntwè. Bwà, diya dyà dyàmwàmwà

dyà mbû mpindyewu, munùdì bamanyè amu, mu matùkù makesè emu, nènku ndi ne cyà kutwibwa nshingì eyi, mémè ne mwanàànyì wa balùme. Ne bisàlù byà munda mpulumuku, ne byà mubidi kapyà wà mèsù kàlaabi, ne byònsò, mvwa muzengèle be, bìnsaamisha. Biinè abi, Kaayisà ngudi ulòmba bwà kutwibwa bisàlù ebi kumpàlà kwà wèwè kubwela mu dikwàbò ditungà. Ne Yèyè wàkamba ne: “Pèèshaayi Kaayisà cìdì cyà Kaayisà, kàdi pashìishe nùpeeshè Nzambi cìdì cyà Nzambi.”

³³ Nènku pâmvwà musòmbe mwaba awu apu, ndìkonka cìmvwà mufwànyine kwambila batèèleji aba mu dindà emu; cìndi naaci ne kusàkidila kwàbùngì, ne balùme ne bakàji bàdi bafwànyine kutèeka mwoyi wàbò panshi bwà byùdì mufwànyine kwamba abi. “Bìvwa bìkèngela bwà ncyènzè bìshi? Bìvwa bìkèngela ngàngatè cinyi bu mutù-wà-mwandà?”

³⁴ Ne pashìishe pâmvwà musòmbe mwaba awu apu, kalù kenzè bu kambàkùle, ciibi cyànyì kudìtuutaci, cyà kumpàlà kwà nzùbu aci. Kàmùvwa muntu to ànu mémè nkààyaanyì, bwà ku dyànyì dimanya. Mémè kutèeleja. Ncìvwa ànu mucyùmfwè mu cyòci to. Paanyimà pàà katanci, ciibi cyà ku cibambalu cyà ciikishilu, mùntù nyùngulukila bwà kubwela mu bìrò byànyì, kudìtuutaci, ne muntu ùvwa ànu mutùngùnùke ne kunyungisha ciibi aci. Ki mémè—mémè kuya ku ciibi ne kuunzulula ciibi aci, kàdi, cyàlu kunkèmesha ncyà ne, kànà kàà—kàà bakàji kalenga, kakesè, kàà nsuki yà kàlaabi, ne twìsù twà bleu nkàvwà kiimàne mwaba awu, kàmwèka ànu bu kaacilòngò kakesè kàà Paasàkà; nkasòmbe mwab'ewu kantàngile patùdì twakulangana apa.

³⁵ Kwololakù cyanza e kumpèèsha kartà kampànda. Ne cìvwà. . . Mu bushùwà bwà bwalu, ngeela meeji ne pàngàalukilà kumbèlu nekwikalè twartà twà Paasàkà, ne bikwàbò; kàdi kàmwèpelè, kàà kacya nguumuka kumbèlu, nkàmvwà mupetè aku. Ki yèyè ne: “Mwanèètù Branham, aka nkàà kùdì papa ne mémè.” Ùvwa muswè kwikala mutwìshìibwe ne “mémè” ùvwamù. Nènku tatwèndè udi ne binyòka, udi musòmbe mu dìkalù dyà balèmà awu, nguvwa mutùme kartà aka. Pàngākāngàcì ne kwela munanga mukèsè awu twasàkidila, pākūdimukuyè e kuumuka mu ciibi amu apu, mémè kubuulula kartà aku.

³⁶ Nènku mu mmwènekelu wa kartà aka ki mùndì mupàtùle mutù-wà-mwandà wànyì. Bwalu, pa kartà aku pàvwà Maakò Munsantu 16.1 ne 2, dijuuka dyà dībà, dībà dikaavwa dijuuka. Ki mémè kwela meeji ku cyòci aci, ne pashìishe cyena-bwalu cyà “difùululula,” dyà Yesù Kilistò uvwa ne cyà kubùika ku bafwè awu, mémè kupàtwilapù cyena-bwalu cyànyì.

³⁷ Mpindyewu, dībà, ku dijuuka dyà dībà. Èè, kùvwa cikondo cìvwa buloba bùsanganyibwa mu mīdimà mikolè. Kabùvwa ne mbùngakeenu to, ne bùvwa munda mutupù. Ne bùvwa bubwikila bwònsò kùdì màyi, ne bùvwa bùsanganyibwa

muntwamu mu mîdimà, cyuyüyà cibwicidile, cyà dibungama. Ne Nyumà wa Nzambi ùvwa wëndakana pa mâyi awu, ne kwambaYè ne: “Bukênkè bwikalèku.” Nzambi ùvwa ne kabingilà kàà kwenza nànkù, bwalu mwinshì menemene mwà mâyi amu mùvwa mamiinu àvwàYe mukùne, ne bìvwa bikèngela kupetabù bukênkè bwà díbà abu bwà kubùvwija ne mwoyi.

³⁸ Nènku Bukênkè bwà kumpàlà bwàkafidiibwàku pa buloba bùvwa n’Díyì dyakula dyà Nzambi. Bukênkè bwà kumpàlà bwàkalengàku buloba bùvwa n’Díyì dyakula dyà Nzambi. Yèyè wàkamba ne: “Bukênkè bwikalèku.” ne bukênkè bwàkiikalakù. Aci cyàkakùdimuna mîdimà kulwayì bukênkè, bwà kutwàla bufùki bwà disànka ne mwoyi pa buloba. Nènku, Nyumà wa Nzambi, bu mùvwàYe wëndakana ne dinanga ne dyumvwilangana dyà luse, mu ditùkù dyà butùmbi adi, ditùkù dyà kumpàlà dyà kabundubundu kàà bufùki pa buloba adi; díbà dyàkajuuka ne dyàkatangalaja myaba yònsò, nsèsà yàdi, ne dyàkuumisha mâyi pa buloba, ne dyàkenza cibwàshìbwàshì kuulu. Nènku, bwà musangu wàdi wà kumpàlà, bìvwa bikèngela kutwàdiladi buloba disànka ne mwoyi, ku dimiinu. Cìvwa ndìbà dyà butùmbi.

³⁹ Kàdi, kaa, kadìvwakù cintu to, dijuuka dyà díbà adi’s, cyà mùvwà dijuuka dyà díbà mu dindà dyà Paasàkà adi. Ewu musangu, pààkabàndà díbà mu maulu, dyàkatwàla dijuuka dyà díbà dinène ditàmbe dyà kwònsò eku; bwalu nkulwè lumù lutàmbe bunènè ne edi dijuuka dyà díbà, kutàmbe mwàkenzàdi ku dijuuka dyà díbà ku cibangidilu. Edi dijuuka dyà díbà nditwàle lumù, ne: “M’Mmubiike ku lufù! M’Mufùlùlùdiibwe muumùke ku bafwè, mwàkalayàYe amu. M’Mubiishìbwe ku bafwè.”

⁴⁰ Musangu wà kumpàlà wàkajuukà díbà, mu Genèsè, cìvwa cìtwàla mukenji wà ne nekwikalè mwoyi pa buloba, mwoyi wà cìfwàkà.

⁴¹ Kàdi ewu musangu, pàdi díbà dijuukè, kùvwa dijuuka pàbidi dyà—dyà díbà; dikwàbò díbà, Mwànà, ùjuuka. Cìvwa. . . kacìyi ànu d-î-b-à munkacì mwà kajuuka to, cìvwa m’M-w-â-n-à mujuukè bwà kutwàdila Mamiinu ònsò malaya a Nzambi àkaavwàYe ku didyànjila-kumanya mumòne àsanganyiibwa pa buloba awu Mwoyi wà Cyendèlèlè.

⁴² Ànu mùdìbi ne bu—bukwàmici kabùvwa mwà kwikala ne mwoyi ku cibangidilu kwàka kakùyi d-î-b-à bwà kubùfikisha ku mwoyi; ànu mùdìbi ne, leelù ewu, pàdi bânà bàà balùmè bàà Nzambi pa buloba, bìdi bikèngela Bukênkè bwà M-w-â-n-à bwà kubàfikishabù ku Mwoyi wà Cyendèlèlè, Basungula Bèndè bààkamanyàYe kumpàlà kwà difùkà dyà dyulu ne buloba. Yèyè wàkabàsungula munda Mwèndè kumpàlà kwà difùkà dyà dyulu ne buloba.

43 Nènku mu dindà dyà Paasàkà, dĭbà adi, mu bitocì ebi mwaba kampànda mmùvwà mibidi yètù yisanganyiibwa musangu awu, bwalu twètù tudi lupwishi lwà buloba. Nènku mu Dyulu, mùvwà Mukàndà wà civùlukilu, ne byambiibwà Byèndè bìvwà munda Mwèndè, bu mùvwàbi ne bwalu Mwànà wa Nzambi ewu wàkabiika ku lufù, Cìvwa kàbìdì mwà kufikisha ku Mwoyi mwànà wa balùme yònsò uvwa mudyànjila kulongolwela cikondo cyà butùmbi eci. Yèyè ùvwa mumanyè ne neciikalèku. Ne ndijuuka kaayi dyà dĭbà dyà butùmbi kutàmba mùvwàdi ku cibangidilu, dĭbà dyà pààkacyàdi dyàmbedi!

Mpindyewu, pa ditùulà dinènè dyà Citampì cyà Paasàkà edi!

44 Mpindyewu, leelù ewu tudi ne citampì cyà Paasàkà, cyà disaamà dyà cyàdì. Bantu bàdi bàtùminangana mukenji, muntu ne mukwèndè, ne bwà kutwà nyama ku mikòlò cibùcilu cinène eci anyi kàmpanyè aka, bwà bangàngàbukà ne maalu a mamanya a baamingàngà kukwàcilabò mudimu pa cintu kampànda, bwà kulànguluja anyi kwambulwisha bàdi ne disaamà dyà cyàdì. Bidi ncitampì, citùdì tubiikila ne ncitampì cyà Paasàkà, patùdì tutùminangana mukenji muntu ne mukwèndè. Kàdì patùdì tupeta mukenji awu, citampì aci cidi cilamuna, bwalu citampì aci ncidi ne mukenji muswikila lwà munda.

45 Nènku mpindyewu, Citampì cilelèlè cyà Paasàkà, mu edi dijuuka dyà dĭbà, cyàkalamunyiibwa; ne mùnsokòntù wà Mwoyi paanyimà pàà lufù, wàkabuuludiibwa. Kumpalà kwà cikondo aci, katùvwà bamanyè to. Bàà pa buloba bungwija mu midimà, bàvwà bènda bàbuubuta eku ne eku, dicinkidila dyà bantu. Malongesha makwàatakaja àvwà munda mwà mwà myoyi yà bantu, bilèlè bikwàatakaja. Bantu bàvwa bàkuukwila mpingù. Bàvwa bàkuukwila dĭbà. Bàvwa bàkuukwila nzambi yà mishindù yònsò nàka. Ne bantu bàà mishindù yònsò bàvwà bàmba maalu, bònsò bàvwà bàya mu lukità, ne bàvwà bàshààla mu lukità.

46 Kàdì Citampì cilelèlè cyàkalamunyiibwa, ne Ewu Uvwakù musangu kampànda ne mwoyi mutùdì twètù ne mwoyi emu, wàkafwà mutwàfwà pèètù emu awu, wàkabiishiibwa ku bafwè. Dindà kaayipu's wè! Kacya nànsha dimwè dyà bu dyòdì adi, mu maalu-malonda ònsò a pa buloba. Mùnsokòntù wàkamanyishiibwa ne Yèyè ùvwa byònsò bibidi dibiikà dyà ku lufù ne Mwoyi.

47 Ne Yèyè wàkamba, pààkapàtukàYe mu dindà adi ne: “Bwalu Mèmè ndi ne mwoyi, nwènù pèènù nudi ne mwoyi.” Kabìvwà ànu ne Yèyè ùvwa mupeci wa dibiikà dyà ku lufù to, kàdì Mamiinu ònsò àvwà meeyèmène mulayi munènè wà Nzambi àvwà mapeci a dyàkalenga dyà dibiikà dyà ku lufù kuya ku Mwoyi adi. Bwalu, Wàkamba ne: “Bwalu Mèmè ndi ne mwoyi, nwènù pèènù nenwikalè ne mwoyi.” Ki divwà dilamuna dyà Citampì ndyòdì

adi. Bwalu Yèyè wàkajuudiibwa, byà mwomùmwè ne ewu yònsò udi munda mwà Kilistò neàjuudiibwè pàmwè Nendè.

⁴⁸ Pa dijuuka dyà díbà dyà butùmbi edi, Nzambì wàkajaadika, anyi wàkashindika, Dìyì Dyèndè. Byònsò byà dibungama ne mpatà bìvwà bibwelèbwèle mu meeji a bantu abi byàkuumushiibwa, bwalu ki Yèyè Uvwakù musangu kampàndà ne mwoyi awu, ùdya, ùnwa, ùbwela mu bwobùmwè ne bukwàbantu, wàkamba ne: “Ndi ne bukòòkeshi bwà kutèeka mwoyi Wányì panshi; Ndi ne bukòòkeshi bwà kuwùjuula cyàkàbìdì.” Nènku mpindyewu Yèyè kàvwà ànu mwambè dìyì adi cyanààna to, kàdi Wàkadijaadika ne m’Bulelèlà. Kaa, aci ncintu kaayi cyà butùmbi’s wè!

⁴⁹ Mémè ndi mutwishiiibwe mu dindà emu ne nànsha twètù, bàdi bàcìitabuujà abu, katwèna mwà kuumvwa bunènè bìvwà cintu aci to. Bwalu Yèyè wàkabiika ku bafwè, twètù pèètù tukàadi bamanè kubiiika ku bafwè, bwalu tuvwa munda Mwèndè.

⁵⁰ Mònaayi mpindyewu. Pàvwà mîdimà mibwikile buloba, ne mamiinu kaayi mwà kwikala ne mwoyi d-í-b-à kadìyì dijuukè to, ne mîdimà yìvwa mibwikile buloba. Nènku mpindyewu M-w-â-n-à wàkajuuka, ne mîdimà yònsò yàkajìmina ku Bukênkè ebu, pàakatangalakàBu mu matùnga ònsò, kùdi bantu, ne: “Yèyè kèna mwab’ewu to, kàdi mMubiike ku lufù!” Ndìyì kaayi—kaayi’s wè! Ùvwa mujaadike Dìyì Dyèndè. Ùvwa muDijaadike ne, ncilelèlà, bwalu Wàkacimuna mpindyewu lufù, ifernò, ne lukità.

⁵¹ Bùsàtù bwà dyabùlù: lufù, ifernò, ne lukità; bwalu Sàtaanà ki mukèbi wa lufù, yèyè ki mwena ifernò, ne lukità kàbìdì. Nènku ki cìvwà bùsàtù bwà Sàtaanà ncyòcì aci, bukèba kùdi cintu cìmwèpelè, cìvwà ndufù. Lufù, udi uya mu lukità; ne mwikàle ngènzàmpèkààtù, udi uya mu ifernò. Cintu cyònsò cìmwèpelè aci, bùsàtù bwà Sàtaanà, bìvwà lufù abu’s. Aci ncìvwà cikwàte muntu mu bupika bidimu byònsò ebi.

⁵² Kàdi mpindyewu bùsàtù bulelèlà bwà Nzambì, mwikàle Umwèpelè mumwèneshiiibwe mu Kilistò, Uvwa Mwoyi awu, ne uvwa mulamùne Bitampì ne mucimùne mwena lukunà, ne mubiike ku lufù awu, Nzambì umwèpelè mulelèlà ne udi ne mwoyi. “Ndi Ewu uvwa mufwè, ne Ndi ne mwoyi bwà kashidi ne kashidi, ne mwikàle ne nsapì yà lufù ne yà ifernò.” Nzambì, mu Umwèpelè, muvwijiiibwe Muntu, ne musòmbèle munkacì mwètù, ne mucimùne mwena lukunà yònsò. Ne ùvwa mujaadikè ne bùsàtù bwà Sàtaanà bwàkacimunyiibwa, kàbìdì ne bùsàtù bwà Nzambì bwàkamanyishiibwa, bwalu ànu Nzambì nkàayèndè nguvwa ne bukòlè bwà kwaluja cyàkàbìdì Mwoyi. Yèyè nguvwa Emanùwèlè awu. Nzambì wàkamwèneshiiibwa mu mubidì.

⁵³ Kabyèna bikèmesha to mùvwàYe mwà kwamba mwaba awu, Maatàayi nshapità wa 27 ne: “Makòòkeshi ònsò mu Dyulu

ne pa buloba mmafidiibwe mu cyanza Cyànyì. Ndi nnùtuma bwà nwènù kwikala bantèmù Bàànyì, kùdì bàà pa buloba bujimà.” Ùkaavwa mucimùne byònsò lufù, ifernò, ne lukità. Kàvwa mwenzè ànu aci to; ne mupàtùke, mucimunyi, mwikàle ne bukòokeshi bwònsò mu Maulu ne pa buloba. Cyònsò civwà Taatù aci, cyònsò civwà Nyumà Mwímpè, ne cyònsò civwàku aci, civwà munda Mwèndè. “Makòokeshi ònsò mu Dyulu ne pa buloba mmaMpèèsha.” Cikwàbò cyònsò kacýèna ne bukòokeshi to. Yèyè ùvwa mucimùne.

⁵⁴ Mpindyewu! Ne pashìshe, kì ng’ànù aci to, Wàkatùmina bayiidi Bèndè Dìyì, baMwitabuujì abu. “Kanùciinyi to, bwalu Mémè ndi Ewu uvwa mufwè, ne udi cyàkàbìdì ne mwoyi kashidi ne kashidi awu. Ne Ndi ne nsapì yà lufù ne yà ifernò; Nkàadi mumanè kubìcimuna. Kanùciinyi kàbìdì to, bwalu Dimiinu dyònsò didyànjlila kutèeka, didyànjlila kulongolola kùdì Nzambì nedilwe ku Mwoyi pàdì Bukènkè abu bütangalaka pa buloba, bwà Èvànjeeliyo wa butùmbi abu. Mu cikondo cyònsò, neBütwalè byà pa madimi bìvwa Nzambì muBùlongòlwèle bwà kukwàmisha abi.” Ùvwa mubiike ku bafwè.

⁵⁵ Kaa, ncintu kaayì bulenga cidìci’s wè: “Mémè ndi ne mwoyi, anyi mufuùlùlùdìibwe.” Mwakù awu wùdì wùmvwija, mwakù ewu *mufuùlùlùdìibwe*, mwakù wà mu cyena Ngelikà awu wùdì wùmvwija ne ncintu kampàndà cidì “civwijiibwe ne mwoyi paanyimà pàà lufù.”

⁵⁶ Bu mùdì di—dimiinu dìdì diya mu buloba, bikèngela difwe, kantu ne kantu kàà dimiinu adi. Bikèngela dibolè, kantu ne kantu kàà dimiinu adi. Ne kantu ne kantu kàà mwoyi awu, kàvwa mu dimiinu adi aku, kàdì ne cyà kupàtuka cyàkàbìdì.

⁵⁷ Yèyè ùvwa “mufuùlùlùdìibwe.” Kacyi ànu aci to. “Nènku Nèntumè Mwoyi wùmfwèwùmfwè wùdì muMfuùlùlùle Mémè awu, Bukolè bùdì buMpàtùle mu lukità abu, NèmBütùmè pambidi pèènù, bwà kunùfuùlulula, bwà ne kùNdi aku nwènù nwikalèku pèènù.”

⁵⁸ Mu Luukà, nshapità wa 24, mvensà wa 49. KwambaYè ne: “Mònaayi, Ndi ntùma mulayi wà Taatù pambidi pèènù; kàdì shààlaayi, anyi indilaayi, mu cimenga cyà Yelusàlèma, too ne panwàvwàdikiibwà ne Bukolè bwà mu Dyulu.” Bwà kuleeja ne Yèyè kàvwa ànu mwangàte makàsà ònsò a mwòmò to, kàdì Wàkaabanyangana makàsà awu.

⁵⁹ Wàkalwa bwà kupikula, anyi bwà kufikisha ku Mwoyi, Mamiinu madyànjlila kulongolola awu àvwa Nzambì mumòne kumpàlà kwà difukà dyà dyulu ne buloba ne mufunde mènà àbò mu Mukàndà wà Mwoyi awu. Kàdì’s ki bóbò aba pa buloba, kabàyi ne ditèkemenà; Yèyè kàakalwa ànu bwà kwikala Dibènesha to, kàdì bwà kwabanyangana Dibènesha adi ne Dimiinu didyànjlila kulongolola dyònsò. Mpindyewu, piikalàbi ne Dimiinu adi kaDivwa pa buloba to, kadivwa

mwà kwikala ne mwoyi to. Bivwa bikèngela diikalè pa buloba, ne kabidi ditòlweshiibwè. Nànshà Dishààle dilama mu mîdimà ntântà bule kaayi, neDipatukè pààtùmà M-w-â-n-à nsèsà pa Dyôdi. Mònaayi mpindyewu, Yèyè wàkalwa bwà kuCyàbanyangana nèètù.

⁶⁰ Kabyèna bikèmesha to mùdì Èvànjeeliyò mwikàlè luumù lwîmpè. Mwakù mwinè *Èvànjeeliyò's* wùdi wùmvwija ne “luumù lwîmpè.” Luumù lwîmpè, lwà bishi? Muntu yèyè mutùfwile, aci's nduumù lwîmpè. Piikalàbi ne Kilistò wàkalediibwa, aci's nduumù lwîmpè. Kàdi kaciyènakù luumù lwîmpè, kacya kakùtukù kwanji kwikala luumù bu mùdì elu luumù to, lwà ne, Yèyè Wàkafila mulayi wàshìndiki mulayi awu, ne: “Ùdi ne mwoyi bwà kashidi ne kashidi, ne ùdi ne nsapì ne yà lufù ne yà ifernò, mu cyanza Cyèndè.” Mîdimà yònsò yàkatangalajiibwa. Kakùciwva kàbidi mîdimà yà bàmòna to, bwalu Mwàna wàkapàtuka mu lukità. Kakùwva byà ne: “Èè, Yèyè nealwe, anyi ne Ùdi mwà kulwa” nànsha. Ukaavwa mumanè kulwa, Èvànjeeliyò, luumù lwîmpè!

⁶¹ Mònaayi, Mukenji mwinè wà Èvànjeeliyò, Wòwò mwinè, mbwà kujaadikila bantu ne Yèyè mmubiike ku lufù. “Ndàayi nùkambilè bayiidi Bàanyi ne Ndi mubiike ku bafwè, ne Nèntwilanganè naabò, bwà kubàshìndikila cyòci eci.” Èyi Nzambi wa yàaya, mùshindù mwinè wùdibi ne mu ditùkù dyà ndekeelu edì nekwikalè cyàkàbidi Bukènkè pa buloba bujimà's wè! “Nènku Nènjaadikilè bayiidi Bàanyi! Ndàayi nùkabàmbilè ne Ncyèna mufwè to, ne Ncyèna cilèlè to, kàdi Ndi Kilistò udi ne mwoyi. Nèntwilanganè naabò. Twàdilàayi bayiidi Bàanyi Mukenji ewu ne, Ndi mubiike ku bafwè,” Èvànjeeliyò, luumù lwîmpè.

Wèwè udi wamba ne: “Ncyà bushùwà anyi?”

⁶² Ebèlù 13.8 mmwambè ne: “Yèyè udi umwèumwè awu makèlèlèlè, leelù, too ne kashidi.” Twètù, bapeci Bèndè bàà makàsà, tudikù mbwà kujaadika ne Mwoyi Wèndè wùdi munda mwètù mpindyewu, bapeci bàà Mwoyi ewu. Mwoyi awu, kacya kakùvwakù mwoyi muleeja mu nsòmbelu bu awu to; Yèyè uvwa Mwàna wa Nzambi. Ne Yèyè wàkafwà, ne aci cyàkaciimanyika; kàdi pààkabìikàYe ku bafwè, mu dindà dyà Paasàkà, dìbà adi twètù, bu basadidi Bèndè, tudi batùmiiibwe ne mudimu kùdiYe bwà kuya pa buloba bujimà ne kutwàdila muntu yònsò luumù lwîmpè elu ne, Yèyè ùdi ne mwoyi. Kàdi mmunyi mutùdiku mwà kucyènza ànu ku Dìyi nkààyaadi? Bwalu bààkafùnda ne: “Èvànjeeliyò kàakalwa ànu ku Dìyi nkààyaadi to, kàdi ku bukolè ne dimwènesha dyà Nyumà Mwîmpè, bwà kujaadika ne Yèyè ùdi ne mwoyi.”

⁶³ Mpindyewu, kwòkò èvànjeeliyò mukwàbò, mùvwà Pòlò mwambile cimwè cyà ku bisumbu abi ne: “Ndi nkèma bikolè be munùdi bakùdimùke bayè ku èvànjeeliyò mukwàbò.” Bwalu

kakwèna mukwàbò nànsha umwe to, ànu èvànjeeliyò wa budingibudingi, ku bwalu bufwikakaja bwà cyena-màngumba, nwela nyimà ku luumù lwîmpè alu.

⁶⁴ “Ne bwalu Mémè ndi ne mwoyi, nwènù pèènù nudi ne mwoyi. Nènku Ndi ne mwoyi munda mwènù, ne byenzedi bîNdi ngenza,” Yone 14.12, “byenzedi bîNdi ngenza mbyàMmanyishà munda mwènù.” Mukenji kaayipu’s wè! Kabyèna bikèmesha to, mutùdi bapetè buloba bwà mîdimà bwà tèòlòjì, kàdi ku dîbà dyà ibaamulòòlò nekùlwe cyàkàbìdì Bukènkè. Nekwikalè dibiikà dyà ku lufù ku ibaamulòòlò. Nekwikalè Bukènkè ku ibaamulòòlò.

⁶⁵ Mpindyewu, diikalanganakù mene dyà Mukenji wàkatùmbwà awu, ne: “Yèyè mmubiike ku bafwè,” twètù bapeci bàà mabènesha Bèndè, twètù bàdi bààbanyanganà Nèndè dibiikà dyà ku lufù, tudi tupètà makàsà ku cyôci eci, pa kujaadikila bàà pa buloba ne Yèyè ùdi ne mwoyi. Katwèna mwà kucyènza ànu ku dîyi nkààyaadi to. Katwèna mwà kucyènza ku cilèlè kampàndà cyà muntu to. Tudi tuleeja menemene ànu citùdi tufunkuna aci.

⁶⁶ Ndi ncîina leelù ewu ne nkwepi kwikalà bààbúngì bàà kutùdi kabàyi bàfikisha bantu kùdi Kilistò. Twètù tudi tuya naabò kùdi èkèleeziyà kampànda, ku dilongesha kampàndà dikwàtakaja. Kàdi tudi ne cyà kubàfikisha kùdi Kilistò. Yèyè ki Umwèpelè, ne Umwèpelè udi ne Mwoyi. “Ewu udi ne Mwànà ùdi ne Mwoyi.”

⁶⁷ Nènku mwoyi wà muntu udi mufwè wòwò mukwela munda amu, wèwè newikalè ne nsòmbelu umwèumwè uvwayè yèyè nèndè awu.

⁶⁸ Piikalàbi ne mashi a muntu uvwa wa groupe kampànda, ne wèwè kwangata mashi a kùdi umwè muntu ne kushintulula mashi a muntu awu kuèla mu mukwàbò, kakùyi mpatà to yèyè awu mmufwànyine kwikala wa mashi a groupe awu.

⁶⁹ Nènku nyumà webè udi munda mwèbè awu yèyè mubadiibwe ne mmufwè, ne wèwè mulaabiibwe ne Mwoyi wùvwà munda mwà Kilistò awu, mwikalè pambidi pèèbè! Loomò 8.11 mmwambè ne: “Piikalàbi ne Nyumà wàkabiisha Kilistò ku bafwè awu, mmusòmbèle munda mwèbè, Yèyè neàfuulululè kàbìdì mubidi wèbè wà cifwàkà awu,” Mwoyi wùmwèwùmwè awu, makolè àmwèàmwe awu, bapeci bàà mabènesha bàmwèbàmwè abu, wùvwàYe naawù pa buloba apa, wà kùdi Nzambi awu. Yèyè wàkakupikula, Dimiinu divwà didyànjlila kumanya kùdi Nzambi, beena mènà àkafùndiibwà mu Mukàndà wà Mwoyi wà Mwànà wa mùkòòkò kumpàlà kwà difukà dyà dyulu ne buloba.

⁷⁰ Nènku Bukènkè bwà Èvànjeeliyò bwà dibiikà dyà ku lufù abu, dishindika dyà Dîyi! Twàkamanya munyi ne Úvwà n’Kilistò? Bwalu Wàkajaadika bivwàYe mwambè. Mmunyi

mungàamanyà Mukenji wà dībà? Nzambi ùdi ùjaadika bìvwàYe mulayè, ne Ùdi ùbyàm̄ba. Ki dimanyishiibwa ndyòdi adi, dyà ne twètù tudi bapeci bàà mabènesha pàmwè Nendè bàà dibìikà dyà ku lufù. Yèyè ùdi ùjaadika bìdiYe mwambè.

⁷¹ CyàkalayàYe bwà kwenza mu Kilistò, Wakajaadika ku dibìikà dyà ku lufù. CyàkalayàYe bwà kwenza mu matùkù a Mòsà, Wàkacijaadika. CyàkalayàYe mu matùkù a Henòkà, Wàkacijaadika. Mu matùkù ònsò a bàpostòlò, Wàkacijaadika.

⁷² Mpindyewu mu edi ditùkù, Ùdi ùjaadika cyàkambàYe, bwalu bàdi citùpà cyà Dimiinu òvwà dileejùbwe mu Mukàndà wà Mwoyi dyàkalwàYe bwà kwaluja kùdi Nzambi ku bupikudi. Kaa, Mukenji kaayipu's wè!

⁷³ Mu dindà dyà Paasàkà, kí ng'ànu Yèyè wàkabiika ku lufù to, kàdi bapeci Bèndè bàà mabènesha bààkabiika ku lufù pàmwè Nendè. Yèyè. . . Bàvwa munda mwà Kilistò ku dipoopediibwa Dyèndè dyà pa nkùrusè. Bàvwa munda Mwèndè ku dibìikà Dyèndè dyà ku lufù. Tudi bapeci Bèndè bàà mabènesha, bafùlùlùdiibwe paanyimà pàà bamanè kwikala bafwè mu mîdimà.

⁷⁴ Buloba bwà bupidyà bufiikisha ne mîdimà, mùvwà maèkèleeziyà ne màngumba ne bikwàbò, bitùkòkèle. Ne kùdi cintu munda mwètù ciikàle cibìikila ne: “Kaa, tudi tukèba Nzambi! Tudi ne nzala ne nyòòtà yà Nzambi.” Tuvwà bakashààle bàà mu ba-Méthodistes, ba-Baptistes, beena Mpenta, ba-Presbytériens, ne bikwàbò, kàdi pààkù kwikàle ànu kantu kampàndà kapampàlamùke, katùyikù ànu mwà kuCìpeta to. Ki dyàkàmwè, patùvwà twenda tubuubuta mu mîdimà apu, dibìikà dinènè dyà ku lufù kulwadi kutùdi mu dimwèneshiibwa dyà Dìyi dilaya dyà Nzambi.

⁷⁵ Bu mùvwàbi ne, Yèyè ùvwà dimwèneshiibwa dyà Dìyi dilaya dyà Nzambi. “Ncyàkulekela musùukà Wèndè mu ifernò, anyi Ncyàkwitabakù bwà Wa cijila Wànyi àmonè dibola nànsha.” Yèyè ngwàkaCimwèneshà, Dìyi ne Dìyi dyà Nzambi òvwà dilaya bwà bwalu Bwèndè adi. Wàkacijaadika pààkabiikàYe ku lufù mu dindà dyà Paasàkà adi.

⁷⁶ Mpindyewu, aba bàvwà kale wàwa bènda bàbuubuta mu mîdimà ne bàdyèla nkonko ne, ní bìvwà bikèngela bwà kwowabò màyi ku makàsà mu ditùkù *kampànda*, anyi ní bìvwà bikèngela bwà kuneemekelabò ditùkù *kampànda*, anyi kwenza mèyi ne mikàndu *kampànda*, bintu byònsò abi bikaadi bipìte. Bwalu, kùvwà dibìikà dyà ku lufù dyà butùmbi dyàkeelà kadyòmbò cintu cyònsò cyà cikwàtakaja kùdi muntu cikaadiku muntu mwenzè, dilukakaja dyònsò dyà lungènyi dikwàtakaja kùdi muntu.

⁷⁷ Kacya kakùvwakù kwanjì kwikala, too ne mu ciinè cikondo aci, muntu uvwakù mufwànyine kutèeka mwoyi wèndè panshi

Nènku yêyè neànyukushè cisèkiseki aci kumpàlà kwà MUKALENGE, bwà kwitabiibwaci bwènu nwènu: ditùkù dìdì dilonà paanyimà pàà nsabatu mwakwidi neàcinyùkùshè.

⁸³ Bu ne kùvwakù mushìngà kampàndà wà cijila, bìvwà bìkèngela kwenzekawù mu ditùkù dyà nsabatu, òvwà ditùkù dyà mwandamutekètè dyà lumingu, mbwena kwamba ne mu diisambòmbò. Kàdi nuvwakù bamòne, mu civùlukilu eci, bwà kucinyùkusha mu ditùkù dyà kumpàlà dyà lumingu anyi?

⁸⁴ “Cisèkiseki aci, cìvwà ciikàle misòmù yà mamiinu èbè àùvwà mukùne, pàdìwu àtòloka ne àboba, nùkosè cisèkiseki eci nùlwe naaci kùdì mwakwidi. Nènku yêyè àcyàngatè àcinyùkùshè kumpàlà kwà Mukalenge, bwa diitabiibwa dyèbè, bwà ne nudi biitabiibwe. Nudi balwè ne cisàkisaki cyènù, ne yêyè ngudi ne cyà kucinyùkusha kumpàlà kwà Mukalenge, mu . . .”

⁸⁵ Kì mmu ditùkù dyà nsabatu, ditùkù dyà mwandamutekètè to; kàdi mmu ditùkù dyà kumpàlà, ditùdì twètù tubiikila ne ndyàlumingu adi, d-y-à-l-u-m-i-n-g-u.

⁸⁶ Mu bushùwà bwà bwalu, mmwakù wà—wà mu cyena-Loomò, bwalu bàvwà bóbò bàdibiikila ne nditùkù dyà dìbà bwà nzambi-dìbà. Kàdi mùshindù mwinè wùdìbo badishintùlùlè's wè!

⁸⁷ Kacicyèna kàbìdì d-ì-b-à to. Cìkaadi d-i-t-ù-k-ù dyà M-w-à-n-à, ditùkù dyà Mwànà, dìdì ditètè dyà Blé adi (Wa kumpàlà wa Nzambi ku dibiishiibwa dyà ku bafwè) ne cyà kunyùkushiibwa kumutù kwà disangisha ne, twètù ki Dimiinu Dyèndè; nènku dyòdì ki dyà kumpàlà dyà ku Mamiinu a aba bàvwà balààle tulù, dinyùkùshiibwe mu ditùkù dyà kumpàlà dyà lumingu. Mu dyàlumingu, Yêyè kubiika ku lufù. Kukùpa cyanza cyà dilayangana naaci, ne kubànda mu Dyulu, mwísù mwà bantu.

⁸⁸ Mònaayi, Dìvwà nditètè dyà kumpàlà dyà Blé wa Nzambi òvwà dibiishiibwe ku bafwè, ditètè dyà kumpàlà dyà Blé wa Nzambi. Ku Bukolè bufùluludi bwà Nzambi, Nzambi ùvwà mufùlùlùle mwoyi Wèndè, muMubiishe ku bafwè, ne Yêyè nguwà Mamuma a misòmù a bàvwà balààle tulù, Mamuma a misòmù. Yêyè nguwà Cisèkiseki aci.

⁸⁹ Ki bwà cinyì bìvwà bìkèngela kunyùkushabò cisèkiseki aci, bwalu ncìvwà cyà kumpàlà cìvwà cifikè ku diboba. Ne cìvwà cinyùkushiibwa bu civùlukilu cyà disàkidila kùdì Nzambi, biikàle biitabuujà ne bikwàbò bìvwà mwà kulwa. Cìvwà ncimanyinu.

⁹⁰ Nènku, leelù ewu, bwalu Yêyè nguwà Mwànà wa Nzambi wa kumpàlà bwà kufika ku diboba dipwile, bwà kwikala mu Nzambi, Ùvwà muumùshiibwe ku buloba ne munyùkùshiibwe kumutù kwà bantu. Kaa, dileesònà dyà butumbì kaayi's wè! Ku Bukolè bufùluludi, Wa kumpàlà! Nànsha mùvwàbì ne,

Yèyè ùvwa—Yèyè ùvwa mufwànyikijiiibwe; ne misangu yàbùngi, mutwàmònà pashiishe ne, Ùvwa mufwànyikijiiibwe. Kàdi eci cìvwa bulelèlè Mamuma a misòmù a aba bàvwà balààle tulù. Wàkanyùkishiibwa kumutù kwà Mamiinu àvwà ne mulayi wà Mwoyi.

⁹¹ Wàkanyùkishiibwa mu Ditùkù dyà Mpenta, “pààkalwàku cyonà cìfùmina mu Dyulu cyenzè bu cìpeepèlè cìkolè cyà cìvuma, cìnyùkusha,” ne wàkanyùkishiibwa kumutù kwà bantu, cisàmbà cyà mpenta cìvwà kuulu ku Mpenta kwàka, bindile Dibènesha òvwà ne cyà kulwa.

⁹² Ne bwà kunyùkushiibwa cyàkàbìdì, tudì bamanyè ne, mu ditùkù dyà ndekeelu, bilondèshile Luukà 17.30, mu ditùkù dyà Mwànà cyàkàbìdì, “mu ditùkù dyàbuuludiibwà M-w-à-n-à wa muntu,” anyi ùnyùkushiibwa cyàkàbìdì kumutù kwà bantu.

⁹³ Mpindyewu, Mwànà wa muntu Nganyi? “Ku cibangidilu kwàkadi Dìyi, ne Dìyi dyàkadi ne Nzambi, ne Dìyi dyàkadi Nzambi. Ne Dìyi dyàkavwijiibwa mubidi, ne dyàkasòmbela munkaci mwètù.” Nènku pìikalàbi ne dilongesha dyònsò ditùdì bapetè, ne dishindika dyà Dìyi dyà Nzambi; ku Dìyi dyà Nzambi, ku bimanyinu, ku maalù a kukèma, tudì tumòna leelù ewu ne, mu Mukàndà wà Luukà emu, wutùdì tufùma ku ditèèla ewu, anyi mu—mu Luukà nshapità wa 17 ku mvensà wa 30; ne Maalàki 4, ne Mifùndù mishiiilèshiiilàngàne yitùdì bamanyè bimpè ayi ne, Dìyi adi ndinyùkushiibwe cyàkàbìdì kumutù kwà bantu, bwà ne bilèlè bifwè byà bantu abi mbifwè, ne Mwànà wa Nzambi ùdi cyàkàbìdì ne mwoyi mwikàle ne dibàtiiza dyà Nyumà Mwimpè munkaci mwètù mene, ne mwikàle ùtùpèesha Mwoyi.

⁹⁴ Bu mùvwàbi ne Kilistò nguvwa Wa kumpàla wa kubiiika ku lufù, ku bapròfetà bònsò, ne bikwàbò; nànsha mùvwàye mufwànyikijiiibwe mu myaba yàbùngi, Yèyè nguvwa Mamuma a misòmù a aba bàvwà balààle tulù. Mu Mukàji-musèla, ùfùma kùdì Kilisto, ùpàtùka mu èkèleeziyà, nebikengelè bwà kunyùkishiibwakù cyàkàbìdì Cisèkiseki mu matùkù a ndekeelu. Kaa, ekèlekèle!

⁹⁵ Dinyùkusha dyà cisèkiseki! Cisèkiseki cìvwà ncinyi? Cyà kumpàla cìvwà cìfika ku diboba, cyà kumpàla cìvwà cijaadike ne cìvwa blé, cìvwà cijaadikà ne cìvwa cisèkiseki aci.

⁹⁶ Àlèluuyàh! Ndi mutwàshiiibwe ne nudi numòna cìndi ngamba aci. Cìvwa cìnyùkushiibwa kumutù kwà cisàmbà. Nènku musangu wà kumpàla wàpàtukàku, bwà cikondo cyà Mukàji-musèla, bwà dibiiikà dyà ku lufù dyà mu cyenamàngumba cyà mídìimà, neciikalè Mukenji kampànda, wà ne diboba dipwilè dyà Dìyi dyàlùkidì mu Bukolè bwàDì mu kaabujimà, ne mwikàle munyùkushiibwe kumutù kwà bantu, ku bimanyinu bimwèbimwè ne maalù a kukèma byàkenzàYe kale wàwa abi.

97 “Bwalu Mémè ndi ne mwoyi, nwènú pèènú nudi ne mwoyi,” wàmabila Mukàj’Èndè. “Bwalu Mémè ndi ne mwoyi, nwènú pèènú nudi ne mwoyi.” Dibìikà dyà ku lufù kaayi òwàci’s wè! Ne ndibìikà dyà ku lufù kaayi edi, dyà kwikala bafùlùlùdìibwe ku bafwè, “dyà kwikala bavwijiibwe ne mwoyi mu Kilistò Yesù,” ku Bukolè bufùlùludi bwà Nzambì!

98 Wàkanyùkushiibwa kumpàlà kwàbò. Dìyì, òwàYe adi, dyàkanyùkushiibwa cyàkàbìdì kumpàlà kwàbò Ditùkù dyà Mpenta, Dìyì dimwèneshiibwe. Mpindyewu, ne bu mündì ngamba, bikèngela Dinyukushiibwè cyàkàbìdì mu ditùkù dyà ndekeelu. Mpindyewu, cileejilu . . .

99 Wèwè udi wamba ne: “Èè, mpindyewu, anjì indìla kakesè, Mwanèètù Branham. Mémè’s ndi mumanyè èkèleeziyà udi . . .” Èè, s’ndi pàanyi mumanyè. Nwamònu anyi?

100 Kàdi mpindyewu, cileejilu, kàdi bu ne—bu ne tuvwa ne cyà kwalukila ku Tucson mu mapingaja emu, mpindyewu, ne yònsò wa kutùdì mwikàle ne . . .mwikàle ne cyà kuya mu—mu kàshinyì kanènè kàà Cadillac, kapyakàpyà? Ne nkwasà yònsò yìvwa myenza ànu ne—ne bisèbà bya kashà, cisàbà cya citàmbe kunefuka, cinèfùke ne cyà usòmba mucyankàme; ne panshì pàvwa panefùke; yèndà ùvwa mulema bìcyelè ne mwikàle mulàmika mbòtà yà mbongò myaba yònsò; ne mmoteur wùvwa mukenketa mu byamù amu bwà kwikalawù moteur mujaalàme menemene; ne nkàtì yìvwa . . .yìvwa yònsò ne tundìmbà twà bujitu ne twela màfutà bilenga; ne ndundu yìvwa yònsò mijaadika ne kayìvwa mwà kutùbuka anyi kutaayika nànsha; ne byònsò bikenketa ku maalu a mamanya.

101 Twòtò atu tùkaavwa tusàkìibwe pambèlù bàfùminakù ku ditwènzà, twònsò túbìdì, ne twònsò túbìdì tuuja tètè ne kàsòloonyì. Ki bukòlè bwendeshi mbwòbù abu, kàsòloonyì aku, bwalu mu kòkò aku mmùdì octane. Kàdi mpindyewu panùkaadi nutùteemesha, nànsha mùdì twònsò túbìdì atu tufwànàngàne ànu menemene amu, kàdi kùdì kàmwè kàà kùdìtu kakàyikù ne kantòlantòla, kakàyi ne bukòlè buteemeshi to.

102 “Èè,” mùdì wamba, “bukolè’s bùdì mu kàsòloonyì, Mwanèètù Branham.” Kàdi bukòlè bùdì mu kàsòloonyì nànsha bwikàle bùngì munyi; mwòmò kamùyì kantòlantòla bwà kumwènesha bukòlè abu to, mwòmò kamùyì bukòlè kampànda bwà kushìndika ne nkàsòloonyì to, s’mbifwànyìne kwikàla ànu màyi ètu aa. Tòò ne . . .

103 Bìdì beena tèlòlì bàmba nànshà bìikàle binganyi, nànshà nwènú balengèje èkèleeziyà wenù awu, nànshà nwènú ne dilonga dyà tùlaasà bùngì bishi, nànshà difwànàngàne ne Bible bishi; ànu Cisèkiseki cyà dinyùkusha aci ciikàlekù, Nyumà Mwìmpè mulwè pa muntu awu bwà kufùlùlula Dìyì adi! Kàsòloonyì aku kàdi kàleeja Dìyì. Dyòdì dìdì Bulelèlà; kàdi, kakùyì Nyumà to, kaDyàkwasa lwendu to.

104 Tudi batàmbe kusùminyina pa Byamù bilamakaja be kakùyì kantu nànsha kàmwè pa Bukolè bwendeshi to. Bidi bikèngela Bukolè bwendeshi bwà Nzambì, Bukolè bwà dibìikà dyà ku lufù bwà Yesù Kilstò pa Èkèleeziyà, bwà kumwènesha ne kufikisha ku dzenzeka ne *Eci* nkàsòloonyi. Ncifwànyine kwikala mu ndundu wa kàsòloonyi; s'ncifwànyine kwikala ànu màyi cyanààna, nwamònu's. Kàdi cijaadiki cimwèpelè cidìku, ncyà ne, kutèekapù Mwoyi ewu, nènku neWùjaadikè ne nkàsòloonyi anyi kí nkòkò.

105 Kàdi paùdi uteeta bwà kwela Nyumà Mwímpè mu òngumba, s'udi mwenzè ànu bu udi uteeta. . . Udi mwà kupeta lutooyitooyi lwà ditùdika; neunyàngè moteur wèbè, mu kuwùja tètè ne difwima dyà mwìshì.

106 Kàdi, kaa, mèmè ndi ne disànka dīngi bwà mùdiku Bukolè bwà octane wa binunu dikùmi, Dìyi dyà Nzambì ne Nyumà Mwímpè bwà kuDiteemesha, ne kubiisha Bukolè bwà Nzambì kubùbweja mu nsòmbelu wà mulùme, anyi mu nsòmbelu wa mukàji, anyi mu èkèleeziyà. Bwàkasàkila Cadillac aku kwàka mu njila amu, ku Bukolè bwendeshi bwà Nyumà Mwímpè bùvwà bwalùkile ne bwàkanyùkushiibwà kumutù kwà bantu mu Ditùkù dyà Mpenta abu, bìMuvwija umwèumwè awu makèlèlè, leelù, too ne kashidi.

107 Ki Cisèkiseki nyaaci cyàkatòlokà mu baprófeta bònsò, cívwa Mwànà wa Nzambì, Mfùmù wa baprófeta bònsò awu.

108 Nkulwè maèkèleeziyà, maèkèleeziyà, bakàji-basèla, bakàji-basèla, maèkèleeziyà, bakàji-basèla, bakàji-basèla.

109 Kàdi bikèngela kùlwe Umwe! Àlèluuyàh! Bikèngela kùlwe Mukàji-musèla mulelèlè! Kùdi ne cyà kulwa Umwe udi kàyi ànu ne Byamù bilamakaja nkààyaabi to, kàdi ne Bukolè bwàCì bwendeshi, ùvwija Èkèleeziyà awu ne mwoyi, ùkwata mudimu mu Bukolè bwà dibìikà Dyèndè dyà ku lufù. Too ne patwàfikà pa mwaba awu, too ne patwàpetà mwaba awu, bidi ne dikwàcisha ku cinyi bwà kwengeleja myàyè? Bidi ne dikwàcisha ku cinyi bwà kumulengeja cisàsà anyi mudimu wà dyengelela, pàdimu kamùyì Bukolè bwendeshi? Nànsha Byamù bilamakaja bìleeja ne mbijaalàme bìshi, bikèngela kwikalè Bukolè bwendeshi bwà kuByèndesha.

110 Ki cyàkajaadikàYe aci! Àlèluuyàh! Ki cyàkajaadikà Paasàkà ncyòci aci. Yèyè kàvwa ànu Dìyi nkààyaadi to, kàdi Úvwà Nzambì Yèyè mwìnè, Bukolè bwendeshi, mu Dìyi amu. Aci ncyàkenzà ne mubidi wà Yesù Kilstò (mukwàte mashika, muumàkàne, ne mufwè, mu lukità) wùnuyukukè wùbwelè mu Mwoyi ne wùbiikè ku lufù, ne wùbungulujè dibwe adi. "Ndi Ewu uvwa mufwè," mufwè mu mùshindù wà ne dībà kwambadì ne Úvwà mufwè, ngondo kwambayè ne Úvwà mufwè, mitootò kwambayì ne Úvwà mufwè. Bufùki bujimà kwambabù ne Úvwà mufwè. Kàdi mpindyewu bikèngela bwà buloba bujimà

bùjngululè ne Ùdi cyàkàbìdì ne mwoyi. Yèyè kàvwa ànu Byamù bilamakaja nkààyaabì to, Dìyì dyà Nzambi, Ùvwa Bukolè bwendeshi bwà kuCijaadika.

¹¹¹ Nènku bu mùdìbì ne Yèyè, mwikàle Mubàki, bìdì bìkèngela bwà Mukàji-musèla àpatukè, bwalu Ùdi citùpà cyà ku Yèyè. Ne Cidi mwà kwikala ànu dimwèneshiibwa dyà dyujiiibwa dyà mabuulula ónsò àkambàbo kùdì bakwàbò bónsò bwà Mukàji-musèla awu; Cidi mwà ànu kumwèneshi. Cyòci cyenzè cintu cyà cishiilàngàne ne Mubàki, kî m'Mukàji-musèla nànsha. Bwalu, Yèyè ùdi mubidi wà ku mubidi Wèndè, mufùbà wà ku mufùbà Wèndè; Mwoyi wà ku Mwoyi Wèndè, Bukolè bwà ku Bukolè Bwèndè! Mukàji awu ùdi n'Yèyè! Ànu mùdì mulùme ne mukàji biikàle umwe, ne mukàji mwangata ku lubadi lwèndè amu, Yèyè wàkangata Nyumà, Nyumà wa bukàji, wa kùdìYe. Mubidi wà ku lubadi Lwèndè, wàkenza byónsò bibìdì Byamù bilamakaja ne Bukolè bwendeshi, Mukàji awu. Nyumà wa kùdìYe ne mubidi wà kùdìYe, ne kubìsanga, ne kwenza Byamù bilamakaja ne Bukolè bwendeshi. Too ne pàdì èkèleeziyà anyi bantu. . .

¹¹² Tùlulù twónsò twà Paasàkà etu, ne mishingà, ne èkèleeziyà minène, ne bivwàlù byà bibàlakana ebi, nebìpangilè ne nebìjiminè.

¹¹³ Too ne pàdì Èkèleeziyà ùlwa byónsò bibìdì Bukolè bwendeshi ne Byamù bilamakaja; ne Nyumà wa Nzambi, uvwa muMusàke awu, bwà kwenza bintu byàkenzàYe abi awu! Pìikalàbì ne Yèyè wàkafika ku cylindres dikùmi ne yisambòmbò, ki mwènzà Mukàji-musèla. Amen! Bwalu Wàkamba, mu Yone 14.12 ne: “Ewu udi ungiitabuujà Mémè, byenzedi bìNdi ngenza yèyè neàbyènzè pèndè. Nèmmuujè ne Bukolè Bwànyì bwendeshi, mu Byamù byèndè bilamakaja amu, mu mùshindù wà bàà pa buloba kabàyikù mwà kucikandamèna nànsha; ne Nèmmubiishè kàbìdì ku lufù ku ditùkù dyà ndekeelu.” Ki Mukenji wà Paasàkà ngwòwò awu, Bukolè bwendeshi ne Byamù bilamakaja, pàmwè! Byamù bilamakaja kakùyì Bukolè bwendeshi to, kabyèna ne dikwàcisha nànsha; nànsha Bukolè bwendeshi, kakùyì Byamù bilamakaja.

¹¹⁴ Wèwè udi mwà kutuuta mikòbolo ne kwela mbilà, ne kutùpika kuya muulu kwalukila, byónsò byùdì muswè kwenza abi, kàdì kuvila Dìyì edi, kabyàkukwàcisha nànsha. Wèwè udi ànu unyùngulula mànùvelè cyanààna ku—ku pistons yà. . . Udi ne kantòlantòla muntwamu bwà kutèemabì mudilu, kàdì kamùyì kàsòloonyì bwà kubiteemesha naakù mudilu to.

¹¹⁵ Nebyèndè ànu pààlwàbì pàmwè. Amen! Pa nànkù, cimwè necishaalè cipùwe, ne Cikwàbò necìbandè. Ki cintu cimwèpelè cìdìku ncyòci aci. Nànsha mùdìbì ne, byónsò bibìdì mbifwànyine kumwèka bifwànàngàne, byónsò byàmba mùdìbì maèkèleeziyà, byónsò byàmba mùdìbì Mukàji-musèla. Kàdì Cimwè cidi ne

Byamù bilamakaja *ne* Bukolè bwendeshi, Cidi cìcifikisha ku dyenzeka, cyàkambàYe ne m'Bulelèlà aci.

116 Kacyàkunyungakù to, nànsha Byamù bilamakaja biikàle bîmpè bishi, pàdì ànu Bukolè bwendeshi kabùyi bulwè. Pàdì Bukolè bwendeshi bûlwa, Kapyà aku kàdì kènzejiibwa bwa kutwànganakù ne octane mu kàsòloonyì amu. Ne pàdì Aci cìtuuta dikùbàkùbà, cidi cyènzeja dyosheka dyà bintu, ne dyosheka dyà bintu adi didi difila dinyungakana dyònsò, dikankakana dyònsò, bwalu Yèyè ùdi umwèumwè awu makèèlèlà, leelu, too ne kashidi. Kì dibìikà dyà ku lufù ndyòdì adi. Kì Bukolè bulelèlà bwà Nzambi mbwòbù abu, Byamù bilamakaja ne Bukolè bwendeshi. Mònaayi: “Nyumà ngudi ufùlulula.” Ka—Kantòlantòla nkàdì kàteemeshà mudilu. Kì n'gaz udi uteemeshà mudilu to; kantòlantòla nkàdì kàteemeshà gaz. Nwamònu anyi?

117 “Mémè nciyikù nwènù kanwèna mwà kwenza cintu nànsha cìmwè to; kàdì ne Mémè nudi mwà kwenza bintu byònsò.” Bu mùdibi ne Yèyè ùdi Dìyì, Dyòdì ki Taatù udi ne mwoyi. “Taatù mmuNtùme Mémè, ki mùNdì nnùtùma nwènù. Ànu mùdì Taatù munteemeshe Mémè ne muNsàke mu bintu byònsò amu, Mémè ndi ngenza ànu cìdì cisànkishà Nzambi. Mpindyewu, ànu mùdìYe muntùme Mémè amu, ki mùNdì nnùtùma ne Byamù bilamakaja bîmwèbîmwè abi, ne bìdì bikèngela Bukolè bwendeshi bîmwèbîmwè abu bwà kuBikwàcisha mudimu. Ne bimanyinu ebi nebifilè aba bàdì bàmba mùdibo ne Byamù bilamakaja abu. Bukolè bwendeshi nebwàngatè kaaba kaaBù.”

118 Pòlò mmwambè ne: “Èvànjeeliyò kààkalwa kutùdì ànu ku Dìyì nkààyaadi to,” ku kàsòloonyì nkààyaaku to, “kàdì kàbìdì ku Kantòlantòla,” bwà kuMukwàcisha mudimu. Kì bwalu mbwòbù abu's. M'Mulwè kutùdì mu mùshindù awu.

119 N'Nyumà umwèumwè, wàkaMubìsha ku lufù, udi mufùlùlùle mwena kwitabuuja mulelèlà ku Mwoyi wà Cyendèlèlè awu. Mpindyewu vùlukàayi ne, mu mùshindù mushàadile...Mpindyewu tàngilàayi, patùkaadi tupàtuka mu dîbà dyètù apa. Mònaayi: “Nyumà umwèumwè awu,” mpindyewu, Loomò 8.1. Mpindyewu twànjàayi kubalulula cyòcì aci, mu Loomò 8.1, nènku netùmonè cìdìcì cyàmba. Èyo. Kàdì kî n'Loomò to. . . ndi njinga kwamba, 8.11, mfwilaaayikù luse.

120 Mu Loomò 8.11: “Kàdì *pùikalàbi*. . .” Kì cilumbù neyaci. Kì mwaba wùdì lutàtù Lwèndè ngawù.

Kàdì pùikalàbi ne Nyumà wa yèyè (Nzambi, Nyumà Mwîmpè) wàkabiisha Yesù ku bafwè awu mmusòmbèle munda mwènù, . . .

121 Mpindyewu, ki bwalu mbwòbù abu's: “Nyumà wà Mubàki Yèyè musòmbèle munda mwà Mukàji-musèla!”

122 Pààkenzà Nzambi mubàki Wèndè wa kumpàla, Wàkanji kwenza mubàki dyàmbedi, ne yèyè awu ùvwa eku mulùme eku

mukàjì, mu nyumà; mumwenzè ku lupwishi lwà buloba, bwà kumuvwija wa ùlengiibwa ne byanza. Kàdi m̀onaayi p̀aàkenzàYè Evà, kuumukila ku Adàmà, Kààkangata cikwàbò cipese cyà diimà to, Wàkangata cipese cimwècimwè cyà diima aci; Dìyì dimwèdimwè adi, bwalu Adàmà ùvwa Dìyì dyakula. Nwamònu anyi? Wàkangacila ku yèyè, ne pashiishe kwangata. . . Ùvwa ne nyumà wa bulùme ne wa bukàjì. Ki kupàtulaYè nyumà wa bukàjì awu mu Adàmà, ne kumutèka mu Evà; pa nàнку cìcìdi ànu citùpà cyà nyùma wa Adàmà awu, cìdi mmubìdi wà Adàmà awu. Dìbà adi, cìvwa nnyumà wa Adàmà, bukolè bwendeshi, bwàkafùulululà byamù bilamakaja byà mubìdi wèndè abi.

¹²³ Pa nàнку Mukàjì-musèla udi ne cyà kwikala kàbìdì musunya wà ku musunya Wèndè, ne mufùbà wà ku mufùbà Wèndè. Dìbà adi mubìdi wà cifwàkà ewu newikalè mwà kulwa musunya Wèndè anyi? Netùfikèku mu katanci kakesè emu, nwamònu's. Mbyenjìbwe bìshi? Bìshi? Dikùdimuka dinène edi didi cinyi? M̀onaayi.

Mpindyewu p̀ikalàbi ne Nyumà wa yèyè (Nzambi) wàkabiisha Yesù ku bafwè awu mmusòmbèle munda mwènù, yèyè wàkabiisha Kilistò ku bafwè awu neàfuulululè kàbìdì mibìdi yènù yà cifwàkà ayi ku Nyumà wèndè udi musòmbèle munda mwènù awu.

¹²⁴ Kaa, ekèlekèle! Mudyànjila-kulongolola awu, mu bushùwà bwà bwalu, ànu mùvwa Mamiinu matèeka pa buloba amu, Àvwa ne Mwoyi munda mwàwù awu. Àbùngì a kùdìwu àvwa mafwè; àvwa ànu mamiinu mabolè; màyi ne bikwàbò byàkaòsha. Kàdi, nudi bamanyè's, kùvwa Dimiinu ditèeka mwaba awu diikàle dilongolwela Mwoyi. Nzambi ùvwa mumanyè ne Dìvwa disanganyiibwa mwaba awu.

¹²⁵ Mpindyewu, Badyànjila kulongolola abu ki bàdi bàdyànjilà kufùululudiibwa kùdì Nyumà Mwìmpè, bwalu Nyumà Mwìmpè ùdi ùlwa bwà kunana Bèndè Sungasunga. Mpindyewu, eci ncyà ndòndò mpindyewu, nènku ikàlaayi batwishiiibwe bwà kubàkula eci bìmpè.

¹²⁶ Mpindyewu, bu mùvwàbi ne dìbà dyàkatùmiibwa pa buloba bujìimà, kabìyi bwà kuvwija mabwe ku mwoyi to, bwalu, ôwò p̀aàwù àvwa buloba, kabìvwa bwà kuvwija buloba bwònsò ku mwoyi to, kàdì bìvwa mbwà kuvwija ku mwoyi citùpà cyà buloba cìvwa cyela mu lupangu cinyùngùlukile mwoyi aci.

¹²⁷ Kì mbantu bònsò bààkidilà Kilistò to. Kaa, to. Kàdi aba bàvwà Nzambi mudyànjile kulongolwela Mwoyi abu, mbeela mu nzùbu wa cimòtò cyà buloba, Yèyè awu ki udiYè ùlwa bwà kufùululula. M' Bòbò abu.

¹²⁸ Aci, mpindyewu, buloba abu mbufwànyine kusanganyiibwa mu muunya amu, bwamba ne: "Kaa, ewu muunya wà kale ewu wùdi wòsha be!" Dìbwe adi, dyamba ne: "Muunya wà kale ewu wùdi wòsha be!" Kàdi kaadimiinu kakesè aku, kwambakù

kòkù ne: “S’ki cîntù mêmè nkèba aci,” ki kubangakù kupàtuka ku mwoyi. Dìbà dyàkafùùlulula aci citùpà cyà buloba. Bwalu dìbà kadyàkatùmiibwa bwà kufùùlulula dìbwe to, kadìvwa bwà kufùùlulula bitoci to, kàdi divwa bwà kufùùlulula mwoyi wà dimiinu.

¹²⁹ Mpindyewu, Nyumà Mwîmpè ùdi ùlwa mpindyewu. Mu bushùwà bwà bwalu, Yèyè kàakatùmiibwa. . . Bwà cinyi bantu bònsò kí mbaswè kuMwakidila? Kàvwa mubàtùmina bóbò to.

¹³⁰ Muntu kampàndà wàkangambila ne: “Mêmè ncyèna ngiitabuuja to. Ncyèna ncyùka byùdi mufwànyine kwamba abi to. Nànsha wèwè mufwànyine kujuula bafwè, anyi nî ncinyi, ne kwondopa babèèdi, ne kuCijaadika, mu mushindu kanà wònsò, mêmè ncyèna ànu nCìitabuuja to.”

¹³¹ Mêmè ne: “Ncyà bushùwà nàнку. Wèwè’s udi mwena bupidyà. Kacyèna ne musinga to bwèbè wèwè. Kacìvwa mene cikutùmina wèwè to. Ncìtùmina aba bàdi baswè kwitabuuja.”

¹³² Mukenji mmutùmina mwena kwitabuuja. Bwà aba bàdi bàbùtuka, Cidi ndikùtakana; kàdi bwà aba bàdi mu Kilstò, ne biikàle citùpà cyà Dimiinu adi, Cidi Mwoyi.

¹³³ Kaabwalu kàanyi kakesè kàà kale kàà cidimè wàkatèèka diyi mwinshì, anyi diyi dyà mukankù mwinshì mwà cikuka cyà nzòòlo. Nwamònu anyi? Kaamukankù kakesè aku kàvwa, kakùyi mpatà to, kàvwa—kàvwa kaacifukùibwà kàà mmwènekèlu wa pabwèndè. Cidimè ewu pààkenzàye cintu cyàkenzàye aci, cyà kutèèka dîyì dyà mukankù edi mwinshì mwà nzòòlo wa kale wa cikuka ewu. Ki kutooyaci kazòòlo kàà mmwènekèlu wa lukutukutu, ne kàvwa—kàvwa kalùmyànà kàà pabwàku. Kakàvwa kafwànàngàne ne tukwàbò atu to. Àkù masàlà kaàvwa bu a tukwàbò atu to, ne kòkò—kòkò ànu. . . Kàvwa kalùmyànà kakesè kàà pabwàkù, kakwàcikwètù aku. Nènku tuzòòlo tukwàbò twònsò atu tùvwa tujingùlùle ne kòkò aku kàvwa kalùmyànà kàà pabwàkù. Nènku cikuka aci cìvwa cìya eku cìya eku. . .

¹³⁴ Kòkò kakàvwa nànsha kanangè cyàkudyà cìvwa cikuka aci cìkàpèèsha to. Kakàvwa ànu kaswè dikala adi mu lupangu lwà nzòòlo amu to. Kòkò, kakàvwa mene ne bwalu ne cyòci aci to. Pa nàнку kàvwa kàdikonka bwà cinyi bivwa bikèngela bwà kwikalakù kàà pabwàku mu mwaba awu’s, twamb’eku twamb’eku. Nwamònu anyi? Nènku kakàvwakù kàlabula cintu nànsha cimwè cìvwa. . . Kàvwa kàdya ànu búngì bukùmbàne bwà kudilama ne mwoyi, bwalu kakàvwa kanangè mwenya wàbi awu to, nwamònu’s. Bwalu, kakàvwa kazòòlo to, ànu kwìnè kwònsò aku. Nwamònu anyi?

¹³⁵ Nènku cikuka aci—aci cìvwa mwà kwenza cyokò-cyokò, ne, nudi bamanyè’s ne: “Matùkù a bishimà àkaadi mamanè kupita. Cintu bu nàнку kacitukù to. Divwijè mwena èkèleeziyà.” Kacìvwa ànu cikabwela to, bwà kalùmyànà kakesè aku. Pa

nàнку kààkalonda cikuka aci eku ne eku too ne mwàkalwà mamwàkù . . .

¹³⁶ Mukankù mukolè awu wùvwa mumanyè ne wùvwa mwele mayi búngì kampànda, ne kùvwa kupangike òmwèpelè. Wùvwa mumanyè ne mukankù awu wùvwakù ànu mwaba kampànda, ki kupàtukawù wènda wùkèbangana naawù. Ki kuyawù wènda wùnyùngulukila ku nsongo yà mikùnà, ne mu bibandabanda, ne mu myaba yònsò yìvwàwu mufwànyine kusanganyibwa awu. Pa edi díbà, wòwù awu, díbà dikaadi ànu dikùmbàne dyà kwikalawù mulediibwe. Díbà dikaadi dikùmbàne dyà kwikalawù mutooyike. Wòwò ne: “Pàmwàpa cikòlòlò ncilwè kwambula diyì dyànyì adi; pàmwàpa nciminyì. Ncyèna mumanyè to. Cintu kampànda ncyambùle diyì dyànyì adi. Kàdi ndi mumanyè. . .Diyì adi dìdi mu meeji àànyì emu. Ndi ne mwànà wa balùme mwaba kampànda. Ngàayi ngenda mmukèba.”

¹³⁷ Ki mùdi pèndè Nzambì wènza. Yèyè ùdi Mukankù munène awu. Mu meeji Èndè Ùvwa mumanyè ne Ùvwa mwà kwikala ne Èkèleeziyà. Ùvwa mumanyè ne Ùvwa mwà kwikala ne cisàmbà. Cìdi cibàbàmbàkàje nànsha ciikàle cinyì, nànsha bòbò batooyishila mwìnshì mwà cinyì, Yèyè ùdi wènda ùkèba. Ùdi wènda ùkèbangana ne Bèndè Sungasunga.

¹³⁸ Kàdi díngà ditùkù, mùdi bwalu abu bulonda, mukankù mukolè ewu wàkapaapaleela kuulu kwà lupangu lwà nzòòlo. Wùvwa wènda wùkèba myaba yònsò, ki kumupetawù. Kaa, bwà dibìikà dyà ku lufù adi, bwà kujìngulula ne kòkò aku kakàvwa bulelèlè kazòòlo to, twanb'eku twamb'eku. Kàvwa kaamukankù! Nènku kàvwa misangu yònsò ànu kalongèshìibwe bwà kutàngila panshì, kukèba cìshiishì anyì cintu kampànda mu lupangu lwà nzòòlo amu. Kàdi kuumvwakù lubilà lukolè, lwàmba ne: “Bàndulukà tàngilà muulu *kuneeku!*” Ki kutàngilakù kuulu kwàkù aku, ne kùvwa cifùkùibwà ciikàle ne mapwàpwà a bule bupite mètres ànaayi, cyà bukolè kutàmba a nzòòlò yònsò yìvwà mu lupangu lwà nzòòlo alu, ne cyàmba mùvwàku kiikalè kànà kààci.

Kòkò ne: “Maman, mmunyi mùndì mwà kufika kùdì aku?”

¹³⁹ Awu ne: “Tùpikà ànu cyanààna, ùbangè kutuuta mapwàpwà, bwalu wèwè udi mukankù.”

¹⁴⁰ Nwamònu's, ùvwa mumanyè ne ùvwa ne kànà kàà balùme mwaba kampànda. Nànsha byòbì ne nkakolèshìibwe mu cinyì, yèyè ùdi ne kànà kàà balùme mwaba kampànda.

¹⁴¹ Ne Nzambì mmumanyè! Àlèluuyàh! Ùdi ne Èkèleeziyà mudyànjila kulongolola, mudyànjila kutèeka mu mudimu! Yèyè ùvwa mumanyè ne Ùdi ne bânà bàà balùme ne bàà bakàjì, ne Mukàjì-musèla, mwindile mwaba kampànda; pàkaadi Nyumà Mwimpè ùbanga kucipaapalèela, Cisèkiseki cinyùkusha aci. Kaa, ekèlekèle! Yèyè's ùdi umwèumwè awu makèlèlèlè, leelù, too

ne kashidi. Kaciyi bwalu kampànda bukwàtakaja to, kàdi bwà cyà bushùwà's!

142 Nànsha búngì munyi bateetè bwà kukàmbilà ne, “mukankù,” kòkò kakàvwa kamanyè civwà mukankù ne ncinyi to. Pààbii's, s'kàvwa kaamukankù. Kakàvwa mwà kwikala kacýmvwè to pàvwàku kakàyi kamòne cintu kampànda civwà cikàleejà, civwàku kàleeja's wè.

143 Ne patùdi twètù tumòna, kacìyi dìngumba, kacìyi dipòlomè dyà Ph.D., kacìyi dipòlomè dyà LL.D. to, kacìyi mwena mutumba mwìmpè to; kàdi mwànà wa balùme wa Nzambi mufwimbà mu cimfwànyì cyà Nzambi, mwikàle ne Bukolè bwendeshi bwà Nzambi bwà kwandamuna ku dilòmbà dyà ditùkù edi ne, Yèyè ùdi umwèumwè awu makèèlèlè, leelù, too ne kashidi, kakùyikù nzòlo wa cikuka wàkukwàta kukupangisha to. Ùdi wènda ùkèbangana ne Maman wendè. Yèyè mmukankù, ànu kwìnè kwònsò aku. Ùdi ùjingulula. Mukankù mulelèlè ewu ùdi ùjingulula dibìikila dyà Dìyi dyà Nzambi. Bwà cinyi? Yèyè mmukankù. Mukankù kùdi mukankù! Dìyi kumpàlà kwà difùkà, Dìyi kùdi Dìyi! Dìyi, didyànjlila kulongolola, ku Dìyi difùnda bwà dībà adi. Wèwè udi ùjingulula kaaba kèèbè. Yèyè ùdi wènda ùkèbangana naaDi.

144 Eci dībà adi, mubidi wà pa buloba ewu, mmufùlùlùdìibwe ne mutwàla kùdi Nyumà mufùluludi wa Nzambi ku ditùmikila ku Dìyi dyà Nzambi.

145 Lùkàsàlùkàsà. Pààkaswàku kumanya mùvwàku mwà kufika nendè kwòkù aku, kòkò kàvwa kalongèshìibwe ne kakàvwàku mwà kwenza aci to. “Kwèna mwà kubànda kupìta paùdi mwà kutùpika kufika apu to.” Yèyè nnzòlo. Nwamònu anyi?

Kàdi mukankù ewu wàkamba ne: “Kabyèna nàнку to.”

“Èè, anjì tàngilàbi tuzòlo!”

146 “Tuzòlo nànsha twikàle cinyi, wèwè udi mukankù. Bàngà wèwè ànu kubaalula mapwàpà èbè awu, ne enzà naawù didìibidija ndambù. Bangàaku kubànda muulu!”

147 Dìyi kùdi Dìyi's! “Byenzedi bìNdi ngenza nenùbyènzè pèènu. Ewu udi uNgiitabuuja, byenzedi bìNdi ngenza neàbyènzè pèndè.” Nwamònu anyi? “Bwalu Mèmè ndi ne mwoyi, yèyè udi pèndè ne mwoyi.” “Nènku pìikalàbi ne Nyumà wàkaMubiisha ku bafwè awu mmusòmbèle munda mwèbè, Ùdi ùfùlulula mubidi wèbè wà cifwàka awu.” Nwamònu anyi?

148 CidiYe wènza ncinyi? Mpindyewu tèèlejàayi, bwà nwènù kumanya. Nènku ewu Paasàkà, ndi muswè bwà ikale ne musinga kunùdi kutàmba wùkaadiku nendè kacya Paasàkà kanà yònsò ewu. Nwamònu anyi? Ndi muswè bwà nùcìmònè. Tudi bamanyè cyàkenzàYe bwèndè Yèyè; kàdi ndi muswè bwà nùcìmònè, kabìyi ne neÈnzè to, mMwenzè cintu cimwècimwè aci bwènù nwènù. Nwamònu anyi? Ncinyi cidìYe wènza? Ùdi

ùfùùlulula mubidi wà cifwàkà. Mubidi wà cifwàka wutùdi basòmbèlemù ewu, Yèyè ùdi ùwùfùùlulula, mu ngaakwilù mukwàbò, ùwùvwija ne Mwoyi.

¹⁴⁹ Mpindyewu, wèwè wàkendakù musangu kampànda ne cifwankà cinène ku mishìku awu, ne bikwàbò byònsò, anyì cisùmbù cyà micì yà mfwankà; ne nwènù bakàjì bàvwàku musangu kampànda ne nsukì mîpì, badìlaabè bilaabu, ne benzènze bintu byà lukutukutu, ne bavwàle tùputulù, ne bintu byà mùshindù awu; dyàkàmwè, Cintu kampànda kwelacì lubilà lukolè, ne wèwè kutàngila panshì apa nùnkù ne Cìvwa n'Dìyì. Wamònu's, Cyòcì kufùùlulula webè. . . Wèwè kwamba ne: "Byà tùpùtulù bwànyì mèmè kàbìdì to, cicyampa bwànyì mèmè kàbìdì to, mashimi kàbìdì to, bwìvi kàbìdì to, *bikampànda*, *bikansanga* kàbìdì to." Nwamònu anyì? Nyumà uvwa muMubiishe ku bafwè awu's, musòmbèle munda mwènù, ngwàfikisha kàbìdì mibidì yènù yà cifwàkà ayi, lupwishi lwà buloba alu, mu dikòòkela. Nudi numòna anyì? Ncinyì aci? Dikòòkela ku cinyì? Kilistò. Kilistò Nganyì? Dìyì. Kì ntèòlòjì to, kàdi Dìyì!

¹⁵⁰ Pashìishe wèwè udi wamba, ne: "Bintu ebi, kaa, ngeela meeji ne bidì ànu bìmpè bwà bakàjì kuvwàlabò mipanù."

¹⁵¹ Pààbì's, Dìyì ndyambè ne: "To." Wamònu's, Didi dikufùùlulula ku Cyòcì aci. Wamònu anyì? Udi mukòkiibwe kùdiDi. Wamònu's, ngwèwè, dībà adi. Cìdi cìlwa. . . Wèwè udi ulwa citùpà cyà Dìyì. Ncifikishe mubidi webè, kì. . .

¹⁵² Èè, wèwè udi wamba ne: "Èè, mpindyewu, lekèlà nkwambilè bwalu. Wanyì mpaasàtà. . ." Cìdi mpaasàtà webè wamba nànsha ciikàle cinyì; cìdi Dìyì dyàmba kì cìdi ne bwalu! Wèwè muswè kwikala nzòòlo, tùngunukà nendè yèyè. Kàdi mpaasàtà yèyè wàkula bishìllàngàne ne Dìyì edi, dībà adi kì mmudiishi wa mikankù to; uh-huh, mmudiishi wa bikuka byà nzòòlo, nwamònu's, kì ngwa mikankù to. Nwamònu anyì? Mukankù wùdi wùdya Cyàkudya cyà mikankù. Nwamònu anyì? Kì cìdi cìfùùlulula!

¹⁵³ Bible mmwambè ne mbibì bwà kwenza nànkù, kàdi muntu awu ne bikwàbò byònsò byùdi wenza ebi, s'mbibì. Wèwè udi wamba ne: "Matùkù na bishimà àkaadi mamanè kupita." Bible ewu's mmwambè ne Yèyè ùdi umwèumwè awu makèlèlèlè, leelù, too ne kashidi. Bòbò bàmba ne: "Aci ndubùkù. Ne ndibala dyà mu meeji dyà mùshindù kampànda, dijingulula edi. Ne bikèènà-kumòna byònsò ebi ne bikwàbò, s'ndukutukutu," nwamònu's, bòbò nanzòòlo. Kì mbamanyè ne Cyàkudya cyà mikankù ncinyì to.

¹⁵⁴ Kàdi, mwanèètù, paùdi umvwa lubilà lukolè alu, s'kùdi Cintu kampànda munda mwèbè amu! Wèwè's udi mukankù, kacya ànu kwine kwònsò aku. Bwà cinyì? Wèwè udi Dimiinu adi, didì dibìikà dyà ku lufù dyà M-w-à-n-à adi dikòke, ne Cisèkiseki cyà dinyùkusha aci pa buloba, bwà kukufikisha ku dijingulula

ne wêwè udi mukankù ne kwèna nzòlo wa cyena màngumba to. Nudi nucimòna anyi? Hâh!

155 “Piikalàbi ne Nyumà uvwa muMubiishe ku bafwè awu,” Dìyì, Bukolè bwendeshi bwà Dìyì abu, “mmusòmbèle munda mwèbè, Ùdi kàbìdì ùfùùlulula mubidi wèbè wà cifwàkà awu.” Mmunyì mutùdì twètù aba musunya wà ku misunya Yèndè ne mufùbà wà ku mifùbà Yèndè? Mbwalu, (lùkàsàlùkàsà) patùcìdì bangenzàmpèkààtù bàà cifwàkà apa, bàà cifwàkà, badìlongòlòle bwà kufwà, mibidi eyi, Yèyè ùdi ùfùùlulula mubidi awu. *Ùfùùlulula* mbwena kwamba cinyì? “Ùvwija ne Mwoyi.” Nyumà uvwa kale wàwa munangè kwikala kunwà maalà, kunyeemakana eku ne eku, kwenda masandi, ne byònsò ebi awu, wàfùùluludiibu; mòna’s, cintu aci cyàfù, ne wêwè wabiishiibu ku lufù. Yèyè ùdi ùfùùlulula mubidi wèbè wà cifwàkà awu.

156 Ki bwà cinyì, mibidi yènu yìdì ntempèlu wa Bukolè bwendeshi, bwalu (bwà cinyì?) kacya ànu ku cibangidilu wêwè udi citùpà cyà Byamù bilamakaja. Kaa! Ki dibìikà dyèbè dyà ku lufù ndyòdì adì’s. Ki Èkèleeziyà mu dibìishiibwa dyà ku lufù nyawu, pàmwè Nendè. Mibidi eyi mmifùùlùdùdùbwe mpindyewu mene. Nwamònu’s, ukàadi mumvwè; udi mwitàbùùje. Yèyè ùkaadi mukushintùlùle wêwè muumùke ku òngumba muyè ku Dìyì. Nwamònu anyi?

157 Bukolè bwendeshi abu, Bwòbù bufikè pa màyì, neàsompokè ànu nàka ne: “Matùkù a bishimà àkaadi mamananè kupita.” Mpò-mpò-mpò: “Kaa, mèmè’s ntu mwitàbùùje Bible,” mpò-mpò-mpò, “kàdi kakùtu—kakùtu. . .” Mpò-mpò-mpò! Nwamònu anyi?

158 Kàdi pàdiYe ùkalenga wa octanes cinunu awu: “Vrrrrrùn,” wàsa lwendu ùya, nwamònu’s. Mùshindù mwinè, ekèlekèle, wùdì Bukolè bwendeshi bùkalenga Aci’s wè! Kàdi Bwòbù bulengè nzòlo, kacyakwikalakù ne dikwàcisha nànsha. Kàdi pàdiBu ànu bulenga mukankù anyi, yèyè’s ùdi ùpàtuka. Amen! Bukolè bwendeshi pàmwè ne Byamù bilamakaja’s! Nudi bumvwè cìndì muswè kwamba aci anyi? Kàdi aci, mpiikalàye mukankù mulèlèlè, yèyè “neùmvwè.”

159 Ngánjì nnwòlwèlèku Mufùndù mukèsè kaaba aka. Ngeela meeji ne tudi buumùke ku tèleofonè, kàdi tucìdì ànu kaaba aka. Yone Munsantu 5.24, Yesù mmwambè ne: “Ewu udi umvwa Dìyì Dyànyì, ne wìtabuuja Ewu wàkaNtùma, ùdi ne Mwoyi wà kashidi.” Mpindyewu tàngilàayi, mèmè ngenda mpweka ne mùsèèsù ne ncyàngata ànu mùdìci amu, cìdìCi aci, kakùyi dyumvwa dyà nyumà to. . . Nciyi nCyàmbishisha cintu cikwàbò nànsha cìmwè to, kàdi ngamba ànu cìdìCi cyàmba aci, nwamònu’s, mwakù mulèlèlè kaaba aka, mu cyena Ngelikà, wa ku cibangidilu, wùdì wàmba ne: “Ewu udi muumvwè Dìyì Dyànyì.”

160 Mpindyewu, bwà kujaadika ne aci ncyà bushùwà. Ndi mpweka kaaba aka, kàdi ki muntu mukwàcike maalà ulwàlwa

mu mùsèèsù ewu, mwikàle ne mukàj'a bendè mumupyè ku mabòko, wàkula bwakùlavi, ne ùtèela Dìna dya Nzambi citèèlàtèèlà, ne bikwàbò byònsò mùshindù awu. “Ambà tǔng, umvù cyàmbi muiyishi awu aci anyi? Uvwa muumvwè anyi?” “Èyo, mvwa muCyùmvwè!” Aci kacyèna cyùmvwija ne yèyè udi ne Mwoyi wà Cyendèlèlè to. Nwamònu anyi? Nwamònu anyi?

“Ewu udi umvwa Dìyi Dyànyi,” ewu udi mukankù!

161 “Mpindyewu, Mwanèètù Branham, mèmè's ndi nkèba Mifundù yàbùngi kupita apu.”

162 Èyo: “Mikòòkò Yànyi yidi yùmvwà Dìyi Dyànyi. Kayàakulondakù mwenyi to.”

163 Bu mu bwalu bwà *Dibàkà Nè Difwà Dya Dibàkà*, ditùkù adi. Pàakangambilà Nyumà Mwímpè cyòci aci, mvwa mulwè kucyamba ànu mwùvwàYe mungambile amu.

164 Inàbànà kampànda muiyishi, kuntàndishayè ndambù ne mēyi mashilè. Kwambayè ne: “Ngeela meeji ne wèwè udi wangata kaaba kàà Nzambi's?”

Mémè ne: “Bwàlà's, mwàbàna.”

165 Yèyè ne: “Èè, wèwè's udi mubàmbile ne mpèkaatù wabò wáfwidiiibu luse.” Yèyè ne: “Mpenyi apu?” Yèyè ne: “Ànu Nzambi's ngudi ne bukòòkeshi abu.” Nwamònu's, Mùfaalèsà mukwàbò's. Nwamònu anyi? . . . ? . . .

166 Mémè ne: “Udi umòna's, bwà wèwè kumanya, ne, Yesù wàkambila Peetèlò ne bàpostòlò, paanyimà pàà yèyè mumanè kupeta dibuulula dya ne Yèyè ùvwa Nganyi adi.”

WàkaMwambila ne: “Wèwè udi Kìlistò, Mwànà wa Nzambi.”

167 Yèyè ne: “Udi mubènèshiiibwe,” nwamònu's, “wèwè mwànà wa Yona; munyiinyi ne mashi kì mbidiku bikubuulwile Eci to, kàdi Taatù Wanyi udi mu Dyulu ngudi mukubuulwileCi. Pa lubwebwe elu Nèngùbakilèpu Èkèleeziyà Wanyi; biibi byà ifernò kabyèna mwà kuMutàmba bukòlè to. Ne Mémè ndi nkupèèsha nsapì ayi; cyònsò cyùdi wèwè uswika pa buloba aci, Mémè nènciswikè mu Dyulu; cyùdi wèwè usùulula pa buloba . . .”

168 Ki dibuulula dya kùdi Nzambi dya Dìyi divwijiiibwe mubidi ndyòdi adi. Piikalàbi ne Cìvwa mubidi mu ditùkù adi kùdi Mwànà, Mubàki, Cìdi mubidi leelù kùdi Mukàji-musèla. Nwamònu anyi? “Ewu yònsò unwàlekeleelà mpèkaatù awu, mmimulekelediiibwe; ewu yònsò unwàlaminyina mpèkaatù awu, mmimulaminyina.”

169 Mpindyewu, èkèleeziyà wa Kàtòlikè kubàkula aci kàdi kuya naaci kùdi banserdosè bààbò, kàdi aci's ncyà musunya.

170 Tàngilàayi, Dìyi dya nyumà dibuulula, ndyàkacyènzà!

171 Ki bwà cinyi Wakabàmbila bwà kuyabò kabàtiiza mu “Dìna” dya Taatù, Mwànà, Nyumà Mwímpè. Uvwa mumanyè ne bòbò bàvwa bamanyè ne Yèyè ùvwa Nganyi.

172 Pâmvwà nyiikilangana ne muyiishi mutekète kampànda ditùkù adi, kungambilayè, wàmba ne, “Mpindyewu, Mwanèètù Branham, mèmè ndi mupàtùke, muye kashàala wa mu èkèleeziyà *kampanda*, èkèleeziyà wa beena Mpenta.”

173 Pààbì, beena Mpenta patùdi twakulangana apa's mabangè kwangata cyostiya cyà cijèngù aci, nudi bamanyè's. Nukaadi bumvwè aci, ngeela meeji; dyàmpà dyà kòsher, nzambì-ngondo awu, nudi bamanyè's. Ne bônso mbacitabe ne ki kucyàngatabò eku. Muntu ewu kwambayè... Disangisha dyèndè—dyèndè kuyadi kùdiye; kwambayè ne: “Cìndi mèmè mbènesha ncibènèshìibwe.” Mpindyewu, aci kì nciidi nsaserdòse wàmba ne, yèyè “ùdi ne bukolè bwà kucyàndamuna mubidi wà Kilistò” anyi? Nwamònu's, bìdi ànu nkùnde mu maanyi maanyi mu nkùnde, ànu cìmwècìmwè aci's.

174 Ki yèyè ne: “Ndi muswè nkukonkèku cintu kampànda.” S'ùvwa ùkèba kwepela cilumbù cyà dibàtiiza mu Dìna dyà Yesù aci, bwalu muntu ewu nyèyè wàkamba ne mmufwilakanyi ne Kilistò uvwa—uvwa ubàtiiza nànkù awu. Yèyè ne: “Udi wela meeji ne bìdi bìkèngediibwa ànu bwà muntu kubàtìijiiibwayè mu Dìna dyà Yesù Kilistò anyi?”

Mèmè ne: “Èyowà's, mukalenge.”

175 Yèyè ne: “Paanyimà pàà yèyè mumanè kubàtìijiiibwa mu dìnà dyà 'Taatu, Mwàna, ne Nyumà Mwìmpè' anyi?”

176 Mèmè ne: “Èyowà's, mukalenge. Yèyè kàtu mubàtìijiiibwekù to, nànsha kakesè. Wamònu anyi? Kàtu mubàtìijiiibwekù to, nànsha kakesè; kì n'Dìna to. Aci mmwànzù.” Mèmè ne: “Kì nciitabiibwekù to.” Mèmè ne: “Bwà cinyi—bwà cinyi bùvwà Peetèlò...”

177 Yèyè ne: “Èè, mpindyewu, lekèlè nkwambileku cintu kampànda.” Yèyè ne: “Mpindyewu, mu Byenzedi 10.49, wàkamba ne: 'Pàcìvwà ànu Peetèlò wàkula mèyì aa, Nyumà Mwìmpè wàkapweka pambidi pààbò.'”

178 “Kadi,” mèmè ne, “yèyè's wàkakùdimuka e kwambayè ne: 'Muntu ùdikù mwà kukàndika màyì bwà ne bantu aba kabàtìijiiibu anyi?'”

179 Yèyè ne: “Èè, wèwè's uvwa wakula mwaba awu, katanci aka, pa bìdi bitàngilà Byenzedi 19, mùvwà Pòlò ùpicila mu nseke mitumbùkè yà Efèsò, kusangana bayiidi abu.” Ki yèyè ne: “Mòna's,” yèyè ne, “abu kabàvwa babàtìijiiibwe mu dìnà dyà Taatu, Mwàna, ne Nyumà Mwìmpè to”.

180 Mèmè ne: “To, bóbò bàvwa babàtìijiiibwe 'bwà kanyinganyinga,' kabìvwa bwà dilekelediibwa dyà mpèkaatù to. 'Bwà kanyinganyinga,' bwalu Yesù kàvwa mwanji kumanyishiibwa to. Mulàmbù kawùvwa mwanji kushipa to.”

Yèyè ne: “Èè, byàkakèngela bwà kubàtìijiiibwàbò cyàkàbìdi bwà cinyi?”

181 Mémè ne: “Muntu uvwa ne nsapì ayi awu, yèyè ngwákamba nùnkú ewu ne: ‘Bwalu bímányiibwè kunùdì ne kakwèna dǐngà Dínà mwinshì mwà Dyulu dipà bantu, dinùdì ne cyà kusungidiibwa ku dyòdì to.’”

182 Lupàndù lùdi lwènzekela ànu mu Dínà dyà Yesù Kilistò nkààyaadi. “Cyònsò cinùkénjì mu dyakula anyì mu cyenzi, nùcyènzè cyònsò mu Dínà dyà Yesù Kilistò.” Kakwèna dǐngà dínà to, ní ng’èkéleeziyà, ní mbalombodi bàà myànzu, ní mmyànzu, anyì cintu nànsha címwè! Pààbì, Yèyè’s ùdi Ròsè wa Shalònà, Mbata wa mu Cibanda, Mùtootò wà mu Dindà, Alpha, Omega, Cibangidilu ne Ndekeelu, Yèhowàh-yilè, -laafa, -maanàsèh, byònsò ebi. Yèyè ùdi bintu byònsò ebi, kàdì nànsha nànkú Yèyè. . . Kakwènakù lupàndu mu nànsha wumwe wà ku myànzu ayi to; *Yèhowàh*, lupàndù nànsha lukesè; *Ròsè wa Shalònà*, nànsha mùdìbì ne ki cidìYe, lupàndù nànsha lukesè; *Taatù*, *Mwànà*, anyì *Nyumà Mwìmpè*, lupàndù nànsha lukesè. Ànu Dínà dyà “Yesù Kilistò!” Ne pashìishe Bible mmwambè, ne: “Kanyinganyinga ne dilekelediibwa dyà mpèkaatù bìdì ne cyà kulongeshiibwa mu Dínà Dyèndè, kubangila ku Yelusàlèma, ne too ne ku bitùpà byà kuleekùlè byà buloba.”

Yèyè ne: “Udi wela meeji ne cidì cishintulula cintu anyì?”

183 Mémè ne: “Mukalenge, ndi muswè nkukonkèku cintu kampànda.” Yèyè ne mémè, ne mukàjàanyi, tuvwa basòmbe ku mèèsà. Ùcivwa ùfùminakù ku dibanga kusòmbela kuntwaku. Kulwayè, kummòna. . . Mémè kwamba ne: “Twètù neebè’s tudì bàà mu Arizona; tutu basòmbèle mùneemu emu. Nènku mémè, ne tudì bamanyè nsangilu wetù, ne citùpà cyètù cyà buloba, ne byònsò, ne mulombodi wetù wa cimenga, nguvènà, ne bikwàbò byònsò.”

Yèyè ne: “Èyowà.”

184 Mémè ne: “Mpindyewu, bu mémè mwà kukwambila, wèwè mwanèètù, bwà ne: ‘Ndà mwab’ewu ùtwe cyàlà bwà didyà dyètù dyà mundaamuunyà, mu dínà dyà Nguvènà wa État wa Arizona,’ udi mufwànyine kuya katwà cyàlà aci mùshindù awu anyì? Udikù wela meeji ne mbafwànyine kuciitaba ku cibàsà kwàka anyì?”

185 “Mòna’s,” yèyè ne, “ngeela meeji ne to.” Yèyè ne: “Yesù wàkamba nànkú bwà cinyì?”

186 Mémè ne: “S’ki cyòcì eci, wamònu’s. Bwà cinyì? Bu mémè mwà kukwambila bwà ‘kuya katwà cyàlà bwà didyà dyà mundaamuunyà edi, mu dínà dyà Nguvènà wa État wa Arizona,’ ne twètù biikàle beena mwàbò bàà mu Arizona, ne bamanyè ne Nguvènà awu nkampànda, mòna’s, wèwè’s udi mufwànyine kumanya mwà kutwà cyàlà aci mu dínà dyà ‘Sam Goddard,’ wamònu’s.” Mémè ne: “Bwalu, yèyè ki Nguvènà wa État ewu. Kabyèna bikèngela bwà mémè kukwela mpatà to. Wèwè udi mumanyè ne Nguvènà awu nkampànda. Nènku, pàakambàYe ne:

'Taatù, Mwánà, ne Nyumà Mwîmpè' apu, Yèyè ùvwa mumanyè mùvwàbo ne cyà kubàtiiza. Bòbò bàvwa bamanyè ne Yèyè ùvwa Nganyì. 'Mikòòkò Yànyì yìdì yùmvwa Dìyì Dyànyì.' Nwamònu anyì? Nwamònu anyì?"

Yèyè ne: "Kaa, ngǔmvù."

¹⁸⁷ Kàdi mpindyewu, cintu cìdì cilondà, nenwítabuujè anyì? Nwamònu anyì? "Ewu udi umvwa Dìyì Dyànyì, ne wítabuujà Yèyè udi muNtùme, ùdi ne Mwoyi wà kashidi." Ne pàdì Mwoyi mupyamùpyà wà Cyendèlèlèlè ewu wùsòmbela munda mwèbè, Udi mbukolè.

¹⁸⁸ Piikalàbi ne udi mupetè Nyumà Mwîmpè ewu mpindyewu, wa bwena wàkapetabò ku Mpenta awu; bòbò bàvwa byamù bilamakaja, mpindyewu bìvwa bikèngela bwà Bukolè bwendeshi bùlwe. Bàvwa biitàbùùje. Nudi bamanyè's, balundà bèètù bîmpè bàà ba-Baptistes bàtu bàtwàmbila ne: "Patùdì twítabuujà, twàMupeci." Kàdi, kàbàvwa baMupetè to, kàdi pààbò's bàvwa biitàbùùje.

¹⁸⁹ Byenzedi 19, bàvwa biitàbùùje, kàdi kabàvwa baMupetè to. "Nukàadi bapetè Nyumà Mwîmpè kacya nwítabuujà anyì?" Nwamònu anyì? Bàvwa ne Byamù bilamakaja, èyo, bwalu bàpostòlò bàvwa. . . Anyì, ndi njinga kwamba ne, Apòlò ùvwa ùbàlongesha ne ùbàjaadikila ku Bible, Byamù bilamakaja abi ne, Yesù ùvwa Kilistò awu, kàdi kabàvwa banjì kupeta Bukolè bwendeshi abu to. Nwamònu anyì? Ki cyòci aci. Eyo.

¹⁹⁰ [Katùpà kàà mukàbà wà mèyì munda mutupù—Muf.] . . .-mù bilamakaja, udi ne cyeyà mu mùshindù mushàadile, mwikàle mwindile.

¹⁹¹ Mpindyewu, paùdì upeta Bukolè bwendeshi, udi mufùùlùlùdiibwe muumùke ku wa cifwàkà muyè ku dibèngakufwà. Cìdì cyènza ne mubidi mujimà wùlwe mukòòkèlè Dìyì. Necyènzè ne wèwè wènzè maalu bishiilàngàne, wikalè utàngila bishiilàngàne, wikalè ne nsòmbelu mushiilàngàne. Necikuvwijè ànu mushiilàngàne.

¹⁹² Mpindyewu tàngilàayi. . . [Katùpà kàà mukàbà wà mèyì munda mutupù—Muf.] . . .mufùùlùlùdiibwe. "Nwènu bàvwa kale wàwa bafwè mu mpèkaatù ne mu matomboka, ne mu mîdimà, Yèyè wànùfùùlululu." Ku cinyì? "Nyumà Wendè wàkabiisha Yesù ku lufù awu," mu dindà dyà Paasàkà adi, "ku bafwè. Nènku piikalàbi ne Yèyè mmusòmbèle mu mibidi yènù yà cifwàkà ayi," mpindyewu tàngilàayi, "Yèyè ùdi kàbidì ùyìfùùlululu, ùyìvwija ne Mwoyi, uyìvwija mikòòkèlè Dìyì."

¹⁹³ Mpindyewu, mmunyi mùdì mwà kulàka mukana wamba mùdì ne Nyumà awu, kàdi udisàka kule ne Dìyì? Wèwè's udi mufùùlululu kùdì cintu kampànda cikwàbò. Bwalu, Yèyè neàfuulululè mibidi yènù yà cifwàkà ayi kù Dìyì. Bushùwà's, ncyènzaYe.

194 Kwèna mwà kuya kumpàla kùyi naaDì to. Newikalè ànu mwà kwela kàpatà, wèwè kùyi uDìtabuuja dyònsò. Wèwè ne kàsòloonyi citùpà ne màyi citùpà, kwàkwikalà ne kuwàya to. Nwamònu anyi? Bikèngela ùcyàngàtè lukàmà pa lukàmà, kàsòloonyi. Bwà cyanààna, necikukùdimùkilè, ne kwàkwikalakù ne bukòlè to. Nwamònu anyi? “Kàdi mèmè—mèmè ndi ngiitabuuja *cikampànda*, kàdi ncyèna ngiitabuuja *Acì to*,” mpô—mpô—mpô—mpô. Kwèna ne kùyaaya to.

195 Kàdi, kaa, paùdi wangata kaabujimà’s wè! Cìteemenè pa cyòci aci, Dìyi ne Dìyi dyònsò dìdi Bulelèlà!

196 Dìbà adi mònaayi mpindyewu, bu mutùkaadi tujikija, mònaayi eci. Mònaayi, cidi ànu mùdi kaadimiinu kakesè—kakesè kàsanganyiibwa mu buloba.

197 Mpindyewu, mu mùshindù mushààdìle, udi mubiishiiibwe ku lufù. Udi mubiishiiibwe ku lufù paùdi upeta Nyumà Mwímpè munda mwèbè apu. Udi mubiishiiibwe ku lufù dìbà adi mene. Mubidi wèbè mmubiishiiibwe ku lufù mu mùshindù mushààdìle.

198 Tàngilàayi kaadimiinu kakesè. Kàkùnè mu buloba. Bidi bikèngela bwà kànwinè ku mpokolo Wendè, màyi àdi àpòngolokà awu. Nènku pàdiku kànwa apu, kàdi kàbànda muulu katàngile kùdìYe, kènda kàtamba kufwànangana ne difwànangana dyà dimiinu òvwà diyè mu buloba adi. Nwamònu anyi?

199 Èkèleeziyà mmulwè mùshindù awu, mupicile ku dibingishiibwa, dijidiibwa, dibàtiiza dyà Nyumà Mwímpè, mpindyewu mu disampila. Nwamònu anyi? Nyumà wa Nzambi mmupicile ku cyòci aci.

200 Ne nyumà wa pa buloba mmupicile mu mufwilakanyi ne Kilistò, mùshindù wùmwèwùmwè awu, ne mpindyewu ùsampila mu didisanga dinènè dyà maèkèleeziyà, nwamònu’s, cintu cyònsò mu kaabujimà.

201 Ne muntu—nkàaya ùdi ùlwa mùshindù awu. Byònsò bìdi bikwàcila mudimu pa cintu cimwècimwè aci, pa cipimu cimwècimwè cyà Nzambi aci, bwalu Yèyè ùdi umwèumwè awu makèlèlèlè, leelù, too ne kashidi. Mònaayi, mu njila wenda uya, wenda ukola mutàngile ku kaabujimà kàa dibiiikà dyà ku lufù, mulombola kùdi Nyumà!

202 Ànu mùdi dìbà, d-ì-b-à, dikòka kaacikùnyiiibwà kakesè kàdi kànwinà ku mpokolo wa Nzambi aku, ditungunuka ànu... Nwamònu’s, kàdi mwà kunwinà ànu ku cintu cimwèpelè. Pòngolwelà màfutà pa kaadimiinu kakesè aku musangu wùmwèpelè; udi ukàshebeya. Ncyà bushùwà. Pòngolwelàpu màyi matèngèbèle, màyi a kale àdi kaàciyi mimpè, àdi matàpile twìshì awu, neàkàpangishè dikola. Kakààkukwàmakù bimuma to. Ncyà bushùwà anyi? Kàdi pòngolwelàpu màyi mimpè matalàle menemene a mvùla, amen, kaayi ne mushinda mwòmù mwenza ku byanza byà bantu to, àpwekè àfuminè anu muulu

mu maulu, kàdi tàngilà ùmonè kaacikùnyìibwà kakesè aku. Kakwèna màyi àdiku mwà kukàkolesha mùdi màyi a mvùla awu to. Elàmu bwanga bukezudi ne bikwàbò, mùtù uteeta bwà kutùnwishabi amu, ne, katanci aka, bidi bìshipa cikùnyìibwà aci.

203 Ki lutàtù lùdiku leelù ewu ndwòlò alu. Bàdi bàteeta bwà kupèeshangana màyi a mu mpokolo wa cyena-màngumba, ne àdi àpangisha dikola. Nwamònu anyi? Kàdi lekàlà cipetè ànu:

Bùlwa mwaba wùdi mamata a lumuma a luse
àbàlakana;
Kenkèshà mu nyùngulukilu wanyì mwònsò
muunyà ne bufùku,
Yesù, Bukènkè bwà bàà pa buloba.

Apu kaayi wàpeci, dìbà adi.

Netwèndelè mu Bukènkè, Bukènkè bulenga
abu,
Bùlwa mwaba wùdi mamata a lumuma a luse
àbàlakana;
Kenkèshà ànu mu nyùngulukilu wanyì!

204 Nguumùshilaayi mpokolo mikwàtakaja kùdi bantu eyi! “Kakwèna mpokolo mukwàbò ùndi mumanyè to, ànu Mashi a Yesù!” Ki Mpokolo umwèpelè ùndiku mèmè muswè kumanya. Enzàku bwà Dìyi disombelè munda mwànyì, Mukalenge; Dimyaminèku màyi a Nyumà Webè.

205 Mònaayi, mpindyewu, piikalàbi ne, Nyumà wàkajuula Yesù mu lukitá awu mmusòmbèle munda mwèbè, wèwè udi ne Mwoyi mu mùshindù mushààdìle; mulombola kùdi Nyumà, bwà kufùùlulula Dìyi kùdi, bwà kuDìitabuuja. Kaacintu kakesè aku nkatùngùnùke ànu ne kubànda pàdiku kàkola apu.

206 Mònaayi, kuy Mpenta, mibidi yàbò yàkafùùluludiibwa ku Mwoyi mupyamùpyà. Tàngilàayi musùmbà wà tuubantu tutulùmùke ewu.

207 Ndi munùlamè ntàntà mupitèpìte bule anyi? [Disangisha didi dyàmba ne: “To.”—Muf.] Tàngilàayi, ndi ànu mudìnàngùlùle’s, ki mùdìbi, ndyùmvwà bìmpè. Kaa, ekèlekèle!

208 Mònaayi, bàvwa batulùmùke. Mònaayi. Kàdi, bàvwa ne Byamù bilamakaja. Nwamònu anyi? Kàdi bàvwa bònsò basòmbè lwà paanyimà apu, bàmba ne: “Kaa, mèmè’s ndi mbàciina’s. Kaa, ndi nciina bwà kupàtuka bwà kuya kamba, bwalu, kaa, bwà bèèpiskòpò bònsò banène menemene abu ne bikwàbò abi kuntu kwàka. Kaa, mèmè’s ndi nciina. Baakwidi abu ne bikwàbò, ndi nciina bwà kuya kamba aci, nciina ne nkwèpì kùngààlwà kamba ne mvwa muMwitàbùùje. Kaa, ncyèna ànu mwà kwenza aci to, nudi numòna’s.”

209 Kàdi, dyàkàmwè, Bukolè bwendeshi kulwabù. Èyowà’s. Ne cyàkenzàBu ncinyi? KaBwàkuuja ànu nyumà yàbò cyanààna,

munda to, kàdi Bwàkafùùlulula byamù byàbò bilamakaja abi. Mibidi yàbò yàkafùùluludiibwa. Kabàcìvwa kàbìdì batulùmùke to. Bààkapàtukà buludì kumpàlà kwà bantu. Èyowà's, mukalenge. “Nwènù bantu bàà mu Yudààyà, ne nwènù bàdì basòmbèle mu Yelusàlèmà!” Pààbì's, kumpàlà kwà Bukolè bwendeshi kulwabù, bàvwa ànu byamù bilamakaja pa byòbì. Nwamònu anyi? “Nwènù bantu bàdì basòmbèle mu Yelusàlèmà, eci cìmanyiibwè kunùdì, ne tèèlejààyi mèyi àànyi! Bantu aba kì mbakwàcìke maalà to, munùdì nwènù nucinka amu.”

²¹⁰ Mémè ndi umwe wabò. *Eci* ki Cyòcì aci! Nènnùleejè cìdìci. M' Mufùndu. *Eci* ki Cyòcì aci! Ne ntu misangu yònsò ànu mwambè ne: “Piikalàbì ne *eci* kì n' Cyòcì aci to, ndekèlaayi ndamè *eci* too ne pààlwà Cyòcì aci.”

²¹¹ “To, eci ki Cyàkambàbo kùdì mupròfeta Yowèlà aci ne: ‘ne nebyènzekè mu matùkù a ndekeelu, mùdì Nzambì wàmba ne, Nèngìcìkijè Nyumà Wanyì pa mubidi wònsò.’” Nwamònu's, Bukolè bwendeshi bwàkabwela mu byamù bilamakaja. Kabààkaciina kàbìdì to.

²¹² Bàmwè bàà kunùdì nwènù bàdì bàcìina ne nkwèpì kwàlwà mukàjì kampànda kukuseka bwà ne nyawù udi ne nsukì mile, anyì mulekèle kudìlaaba bilaabu; bàmwè bàà kunùdì nwènù bantu balùme bàdì bàcìina ne nkwèpì kwàlwà bulongolodi bwènù kukwipata pawàbàtiizà disangisha dyèbè mu dibàtiiza dyà mu Mifùndu; bìdì bikèngela bwà ùdikàngilè mu cibambalu cyà kuulu too ne pààlwà Bukolè bwendeshi abu. Ncyà bushùwà.

²¹³ Bwàkabàshintulula. Bwàkabàfùùlulula. Bwàkabàvwija bashiilàngàne. Bàvwa bantu bashintùlùke, kubangila ànu apu. Bwàkabàfùùlulula, kuumuka ku nsòmbelu wa kale wa diikala batulùmùke awu, kuya ku wa mufwànàngàne ne wà Ntambwe wa cisàmbà cyà Yudà. Kakùyì mpatà to bààkakùngamangana ne dishebeyiibwa bwà diitabuuja, bapoopèdiibwe pa nkùrusè, mutù mutùma panshì, boosha mu mudilu, beela mu meenà a nyama yà ntambwe. Kabàcìvwa kàbìdì batulùmùke to, bòbò abu. Lufù kalùvwa ne bucìmunyi pa bòbò to, nànsha kakesè. Bukolè bwendeshi bùvwa mu byamù bilamakaja. Èyowà's, mukalenge. Bwàkafùùlulula mibidi yàbò yà cifwàkà ayi.

²¹⁴ Mpindyewu tèèlejààyi. Cìkwàbò cintu ncyòcì eci, bu cijaadiki. Bwàkabàfùùlulula mu mùshindù wà ne (Nudi bamanyè mùdì bwalu anyi?) bààkabàndishiibwa mu myaba yà mu Dyulu, ne mibidi yàbò yà cifwàkà ayi yàkafùùluludibwa mu mùshindù wà ne ngaakwilù wàbò wàkashintuluka. Cìvwa ànu... Bwàkafùùlulula ngaakwilù wàbò. Kì cìdì Bible mwambè. Nènku, pààkafùùluludiibwà mibidi yàbò yà cifwàkà ayi, ngaakwilù wàbò wàkafùùluludiibwa. Meeji àbò àkafùùluludiibwa. Nyumà yàbò yàkafùùluludiibwa. Nsòmbelu wàbò wàkafùùluludiibwa. Bòbò bààkafùùluludiibwa, mu kaabujimà! Bàvwa bàteeta kwakula, kàdi kabàciyikù kabìdì

mwà kwakula mu myakulu yà buntu eyi to. Bààkafùluludiibwa bikolè mu Bwikadi bwà Nzambi mu mùshindù wà ne bààkaakula mu mwakulu mupyamùpyà, mwakulu wà mu Dyulu. Yoyöyò! Bukolè bufuùluludi kaayipu's wè!

215 “Pìikalàbi ne Nyumà wàkabiisha Yesù ku bafwè awu mmusòmbèle munda mwèbè,” kaa, àlèluuyàh, “Yèyè neàfuulululè mubidi wèbè wà cifwàkà awu.” NeÀkwenzèjè bintu byúvwà kùyikù mwenzè kwònsò eku to. Bààkuujiibwa tètè ne Bukolè bufuùluludi díbà adi. Nwamònu anyi?

216 Mubidi wèbè kawücyèna kàbìdì ku bukòòkeshi bwà mpèkaatù to; wèwè, majinga èbè awu.

Yèyè ùdi wàmba ne: “Pàtukilà kùneeku!”

Wèwè ne: “Bwikila mukana mwèbè amu.”

“Kaa, twètù's mbàdì ne cìdì citàmbe bunène . . .”

“Bwikila mukana mwèbè amu.” Ekèlekèle, wèwè's udi mukankù!

217 Nukààdikù bamòne mùdì mukankù wà kale wènda mudishikàmìne anyi? Kawèna wènda wùtùpika bu ciminyi, nwamònu's, mutàngile ku cintu cifwè cyònsò, ne cintu cibolè cyònsò cìdì cisanganyibwà panshi to. To, mukalenge. Wòwù wùdì wènda ne maleela ònsò.

“Bwikila mukana mwèbè amu.”

“Kaa, didyà dîmpè's ndyedì *apa*.”

218 “Kí mbwànyì mèmè to. Wamònu's, àànyì majinga àkaadi mashintùlùke. Yànyì nzala yikaadi mishiilàngàne. ‘Bwalu muntu kààkwikala ne mwoyi ànu ku cintu cibolè cyà pa buloba nkààyaaci to, kàdì ku Dìyì dyònsò didì dîpàtukà mukana mwà Nzambi.’” Mukankù mulelèlà mufuùlulula wùdì ne mwoyi ku Cyòcì aci. Amen!

219 Kaa, ne Wàkajuula Kilistò mu lukità, musòmbèle munda mwèbè, mmufuùlululè mubidi wèbè wà cifwàkà ku Bwikadi Bwèndè. Wèwè udi uBùjingulula. Kùcyèna kàbìdì cidyàbibolè to. Udi mukankù. Kwèna muswè bintu byà pa buloba to. Udi mwànà wa balùmè ne wa bakàjì wa Nzambi. Udi ucyònkòmokela ku Mpokolo udi bàà pa buloba kabàyi bamanyè kantu nànsha kakesè to. Kì Kùdì wèwè unwìna. Muntu kampànda mmumanyè. . . Bàà pa buloba kí mbamanyè kantu nànsha kakesè pa bwalu abu to. Wèwè udi munkacì mwà kudyà Manà masokòmè àdì bàà pa buloba kacya kabàyikù nànsha bamanyè kantu nànsha kàmwè kààWù to, bwalu wèwè udi mukankù. Wèwè udi mufuùlulwila muulu mùdì mwà kufikaKù. Kwèna mwà kufikaKù panshi *apa* to, bikèngela ùbandè *apa*. Bikèngela ùfuululudiibwè, ùbandishiibwè muulu mwàmwa, bwà kufuùlululaCì.

220 Bààkenza cinyi? Bààkaakula mu mwakulu mukwàbò. Bible mmwambè ne mmwàkaakulàbo. “Bààkaakula mu mwakulu ne mwakulu wònsò wà mwinshì mwà Dyulu.”

221 Nudikù bafwànyine kudifwànyikijila aci anyi, mibidi yà kale yà cifwàkà yìdi muntwamu ayi, yàmba ne: “Èè, ncyèna mumanyè mpindyewu ní ndi mwà kwitabuuja cyòci eci anyi ncyèna mwà kuciitabuuja to.”

222 Dyàkàmwè, bààkafùùluludiibwa mu mùshindù wà ne dikima dyà Ntambwe wa cisàmbà cyà Yudà dyàkapòna e kubwela munda mwàbò, kumutù kwà Cisèkiseki cinyùkusha aci. Kaa, Mukankù awu wàkalwa bwà kubìikila bààWù Sungasunga! “Ne bòbò kabààkanangakù myoyi yàbò to too ne ku lufù.” Amen.

Ne nekwikalè bakwàbò kàbidi bààfilà mashi a
mwoyi wàbò

Bwà Èvànjeeliyò wa Nyumà Mwîmpè ewu ne
lukòkà Lwèndè lukünze bu mashi alu.

223 Ne bìkèngela bwà Mwànà à—àbuuludiibwè cyàkàbìdi, mu Mukàji-musèla mu ditùkù dyà ndekeelu; bìkèngela bwà Bukolè bufùùluludi bülwe, búbàfùùlùlùlè búbàpàtùlè mu màngumba mafwè ne twitabàayi eyi, kubàtùma ku Dìyì didì ne mwoyi dyà Nzambì udi ne mwoyi. Kaa!

224 To, Bwàkabàfùùlulula kubàtùma ku Mwoyi mupyamùpyà. Bùdi bùtwènzela cintu cìmwècìmwè aci mpindyewu. Mònaayi, dībà adi, bààkafùùluludiibwa mu Bukolè bufùùluludi abu! Mpindyewu ndi . . .

Tèèlejàayi ne ntèmà mpindyewu. Ndi nteeta bwà kunùleeja.

225 Bukolè bufùùluludi kabùvwa ànu mu musùùkà wàbò nkààyaamù to, kàdi Bùvwa pambidi pààbò pònsò. Bùdi . . . Ki ng’ànù nè, Bukolè bwendeshi bwàkabwelamù bwà kufùùlulula to, kàdi Bwàkafùùlulula byamù bilamakaja. Nudi bumvwè cìndì muswè kwamba aci anyi? Bààkafùùluludiibwa bikolè mu mùshindù wà ne ndimì yàbò yàkabanga kwakula mu mwakulu mukwàbò. Bààkafùùluludiibwa bikolè kùdi Bukolè bwà dibìikà dyà ku lufù dyà Kilistò, mu mùshindù wà ne bààkatenteka byanza . . . Bààkafùùluludiibwa bikolè ne Bukolè bufùùluludi, mu mùshindù wà ne, pààkatentekelàbo babèèdi byanza, babèèdi bààkasàngala. “Wàkafùùlulula mibidi yènù yà cifwàkà.” Bààkondopiibwa, ku dibàtentekela dyà byanza.

226 Ne Nyumà wàkafùùlulula bwobùmwe bwàbò ne Nzambì, mu mùshindù wà ne bòbò kàbidi bààkafùùluludiibwa ne kubwejiibwa mu Bwikadi bwà Nzambì, mu mùshindù wà ne pàvwa muntu ùfwa ne musùùkà wèndè mumanè kuya, Yèyè ùvwa ùmubiikila ùmwaluja ku mwoyi. Amen! Butùmbi’s wè! Mpindyewu ngàavu kuumvwa bwena ne Nzambì bwàmbwedi.

227 Ncyà bushùwà, bafùùlùlùdiibwe! Dibìikà Dyèndè dyà ku lufù kadivwa ànu Bwèndè Yèyè nkààyèndè to, kàdi bwà

ewu yònsò udi muswè, bwà Dimiinu didyànjila kulongolola didi disanganyiibwà mwaba awu edi. Kufuùlulula, ùfuùlulula mubidi wà cifwàkà!

228 Bàvwa bàtentekela babèèdi byanza; bàvwa bàsàngala. Bàvwa bàsambila; mu Nyumà bàvwa bàmòna bikèèna-kumòna, bàbiikila bafwè bàbààluja ku mwoyi. Ncyà bushùwà. “Ùfuùlulula mubidi wàbò wà cifwàkà.”

229 Yèyè mubwelè munda mwèbè; byôbì nàнку. . . Mpindyewu, wèwè udi mwà kwamba ne bìdi nàнку; kàdi ní bìdi nàнку, bimanyinu ebi's bìdi bifila cyôci aci, nwamònu's. “Yèyè ùdi ùfuùlulula mubidi wèbè wà cifwàkà awu.” NeÀkufuùlululè wèwè.

230 Mpindyewu, mònaayi, ùfuùlulula mu Bwikadi bwà Nzambì. Bwà cinyi? Nyumà wa Nzambì ngwàkajuula Yesù mu lukita. Nènku, Nyumà wa Nzambì: “Mémè ndi mbàpèèshè Mwoyi wà Cyendèlèlè,” cifumine ku mwakù wà cyena-Ngelikà, bu nwènu mwà kuwùtàngila: Zoe, ciikàle ciWùkwàcisha mudimu mu wèwè amu ne cifuùlulula (àbò) too ne meeji àbò mene.

231 Mpindyewu tàngilàayi. Mmunyi mùdi mwà kwamba ne Nyumà awu mmusòmbèle munda mwèbè? Nànsha mùdi mwenzè byònsò byúvwà wela meeji ne mbijaalàme abi amu, eci's ki cileeji cyèbè ne wèwè udi Nendè anyi to. Piikalàbi ne Nyumà uvwa munda mwà Kilistò awu ùdi munda mwèbè, Yèyè ùdi kàbìdi ùkufuùlulula ku Díyì, bwalu Yèyè ùdi Díyì. Kàdi cyôci, bibèngàngàne, cikufuùlulula cikumusha ku Díyì, díbà adi kí n'Nyumà wa Kilistò nànsha! . . . cyúdi mwenzè nànsha ciikàle cinyi, Aci cyôci kaciyi cikulombola mu Díyì to. “Mikòòkò Yanyi yidi yùmvwa Díyì Dyànyì, ne yôyi neyikalè ne mwoyi ku Díyì dyònsò,” Díyì dyònsò! Mwva ngaakula pa cyôci aci ditùkù adi.

232 Mààmù wanyì sungasunga, ùkaadi mufwè mpindyewu, ne yèyè ùvwa mukàji wa pabwèndè menemene. Ne ùvwa, nudi bamanyè's, mwenzè bu mwípù wa ba-Indiens, ne ùvwa wa pabwèndè. Kàdi nàнку yèyè ùvwa muntu uvwa kàyi ùlòotakù to. Kadi ncyèna ngeela meeji ne. . . Yèyè wàkalòota bilòòtà ànu binaayi anyi bitaanu, mu mwoyi wèndè wònsò wà pànu. Kàdi musangu wònsò wùvwàye ùlòota cilòòtà, civwa cilelèlè. Pàvwàye ùlòota cilòòtà, civwa cilelèlè.

233 Ndi mvùluka musangu kampànda pàncivwà mbangilakù kuyiisha, kùkaadi bidimu byàbùngì. Tuvwa basòmbèle lwà ku njila eku, ànu lwà kumutù eku. Mwva nyiisha mu èkèleeziyà emu mene. Ki yèyè kulòota cilòòtà, cyà ne mvwa mwimàne kaaba aka ku luseke lwà bibàndilu bisàtù. Nènku mvwa mwimàne, nyiisha bantu bònsò ne, bàvwa ne cyà kubànda bibàndilu bisàtù ebi kumpàlà kwà kufikabò mu cibeeba. Ne mu cibeeba amu mùdi kajila kakesè katòòke kenzè bu kàà masàngà, kakabwelè too ne—ne—ne mu biibi byà Dyulu, ku ciibi cinènè cyà masàngà. Ne busàngà abu bùvwa bwolola too ne ku lusongo lwà bibàndilu

ebi. Aci ní kacyènakù ànu meneme Mukenji wànyì leelù ewu's: dibingishiibwa, dijidiibwa, dibàtiiza dyà Nyumà Mwìmpè! Ne mvwa ngamba ne muntu ùdi ne cyà kulwila ku bibàndilu bisàtù ebi, bwà kumònyè mwà kwendela mu cibeeba amu. Ki kwambayè ne . . .

²³⁴ Kùvwà inàbànzà kampànda wàkalwa mwaba awu. Mpindyewu, nwènù's nudi bamanyè mùshindù wà bisàbaatà bìvwà bantu bàvwàla kùkaadi bidimu makùmi àsàtù ne bitaanu. Kùvwà inàbànzà kampànda wàkalwa mwaba awu, muvwàle bisàbaatà binèye menemene bifwànàngàne ne bidìbo bàvwàle leelù ewu ebi, byà tulundu ebi. Ki kulwayè mwaba awu. Kì wémè kwamba ne: "Anjì indilà kakesè, mwanèètù wa bakàjì. Kwèna mwà kwendela mu cibeeba cyàcyà muvwàle abi to." Kì mèmè ne: "Kwèna—kwèna, kwèna mwà kwenza nànkù to."

²³⁵ Kì yèyè ne: "Àà!" Yèyè kwamba, kukènzakanayè kùvwà bakàjì bakwàbò aku, kwambayè ne: "Kanùmwitàbùùjì to. Mmuntu mupàle. Nwamònu anyi? Kanùmwitàbùùjì to. Mèmè nènùnùleejè ne mèmè ndi mwà kubingishiibwa, kujidiibwa, ne kuujiibwa tètè ne Nyumà Mwìmpè, kàdi kutùngunuka ànu ne kwenda naabì mwómò amu." Kì yèyè . . . Mèmè kumulekela kuyayè. Nciwàkù mwà kwenza kabìdì cintu pa bwalu abu to, nciwà mwà kumwimanyika to. Kì kutùpikilayè mu cibeeba amu. Kì kutàpayè dísù paanyimà kùdì mwanèètù wa bakàjì awu, kwambayè ne: "Wamònu's, s'ngààkwambidì!" Kubangayè kubànda wènda ùnyeema, kì yèyè . . .

²³⁶ Nudi bamanyè's, mùdì Bible mwambè, mu Yeshààyi, nshapità mwi5 ne, bàvwà mwà kwikala ne "nshìngù mitàndabaja" amu's. Bàdi ne cyà kucyènta; mbadyùpwile panshì cyànyimà, nwamònu's. "Bènda lùkàsàlùkàsà bu . . ." Bìkèngela bènzè nànkù, bìkèngela bèndè bàjeekeja nyimà ne: "Bènda lùkàsàlùkàsà pàyaayàbo apu, bènza mutooyi ne tulundu twàbò atu; nwamònu's, bàna bàà bakàjì bàà mu Sìonà mu ditùkù dyà ndekeelu."

²³⁷ Kì kubangayè kuya wènda ùbànda ne cibeeba aci, ùnyeema ne mwèndè mwònsò. Kàdi, paanyimà pà katanci, kì njila kubangayè wènda ùbùmbakana. Yèyè kubanga wènda ùtetuka, wènda lùkàsàlùkàsà *nùnkù* ewu, ne kudishindàye e kupàtuka mu njila.

²³⁸ Kì mààmù kwambayè ne: "Mikunda yà yitàmba kukwàcisha bwòwà yìndì nciyikù mwanjì kuumvwa to kacya bàndela, ùvwà mmukàjì awu wènda ùpòna mu ndimì yà kapyà ayi ne mwìshì, wènda ùpweka, wènda ùpweka mùshindù awu." Yèyè ne, mèmè "kukùdimuka e kwamba ne: 'Nwamònu anyi?'"

²³⁹ Yèyè ùwa mutùmikile byònsò pa kuumusha ànu Dìyì dimwèpelè, nwamònu's, byònsò pa kuumusha ànu Dìyì dimwèpelè. Bushùwà, bakàjì bàà beena Mpenta bàdi mwà kwikala basùngidiibwe, bajidiibwe, ne buujiibwe tètè ne

Nyumà Mwímpè, kàdi pashìishe kupangila. Kakùyi mpatà to. “Muntu kààkwikala ne mwoyi ànu ku dyàmpà nkààyaadi to, kàdi ku Dìyi dyònsò didi dìpàtukà.” Nwamònu anyi? Nwamònu anyi? Nènku yéyè wàkaDipangila. Nènku ànu múmvwà nganba, nwamònu's, mukàji awu ùvwa mwà kwikala mubwelè, èyo, kàdi, nwamònu's, wàkapangila bwà kutèèleja; mvwa mumwambile cìcìvwà kumpàla. Ne Yéyè mmufùndìle Èvànjeelìyò kùdi bayiidi, bàpostòlò, ne Dilongesha dyà bàpostòlò ne bapròfetà, ne bikwàbò, kàdi bòbò kí mbaswè kutèèleja to.

²⁴⁰ Mpindyewu mònaayi Bukolè bufùùluludi ebu, Zoe, bùtwàla Dìyi, meeji àvwà munda mwà Kilistò àvwa munda mwèbè dìbà adi. Ndi munkaci mwà kuteeta bwà kukuleeja, ne, wèwè, pàudi mubiike ku lufù. Pààkabiishà Nzambi Yesù ku bafwè, mpààkakubiishàYe, ne wèwè pèèbè. Ne kàbidì mufùùlùlùdìibwe ku Mwoyi, pàmwè Nendè, udi mpindyewu mufùùlùlùdìibwe ku Mwoyi, nànsha mùvwàbì dìbà adi ne wèwè uvwa ànu cyambiìbwà cyanàànà mu meeji Èndè, kàdi Nzambi ùkaavwa mumòne byònsò munda Mwèndè, ku ndekeelu, nwamònu's. Pààkapwekeshà Nzambi mèsù panshì pa mubidi awu . . .

²⁴¹ Nyumà ngwàkaMushiya, mu Lupangu lwà Getsèmànè. Bìvwa bikèngela bwà Àfwe, muntu. Vùlukaàyi, balundà bàànyì, kabìvwa bikèngela bwà Yéyè kucyènza to. Úvwa n'Nzambi. Nzambi wàkalaaba mubidi awu, wùvwà mubidi wà buntu awu. Nènku Yéyè kàvwa . . . Bu Yéyè muyè kuntwaku, bu Nzambi, nùnkù Kì mmufwèku lufù lwà mùshindù awu to; kwèna mwà kushebeya Nzambi to. Kàdi kabìvwa bikèngela bwà Yéyè kucyènza to.

²⁴² Kàdi, vùlukaàyi ne, Yéyè wàkakùya mwikàle neebè munda Mwèndè. Nwamònu's, Nzambi kàvwa mwanjì kutàpulula Mukàji-musèla ku Mubàki to. Nènku pààkatàngilà Nzambi panshì pa mubidi wà Kilistò, Wàkamòna bònsò bàbidì mulùme ne mukàji. Byònsò byàkapikudiibwa mu mubidi wùmwèpelè awu. Nwamònu anyi? Bàdi umwe, Dìyi dimwèdimwè, dimwèdimwè adi. Dìyi dimwèdimwè, dyàkaakulà bwà Mubàki adi, ndidì dyàkula bwà Mukàji-musèla.

²⁴³ Èè, mmunyi mùdi Mukàji-musèla mwà kulwa, kàdi kupangila mwà kumwènesha byònsò bìvwà bilayiibwe bwà bwalu Bwèndè; ne Mubàki ùlwa, ne Mubàki kàyi mufwànyine kwikala Mukàji-musèla awu? Kàdi pààkenzàYe byònsò apu, too ne kudicijaadika mu kuDìbìishà kwà ku bafwè, paanyimà, dìbà adi kabyèna bikèngela bwà Mukàji-musèla awu—awu ènzè cintu cìmwècìmwè aci, bikèngela ciikàlè ànu menemene cyàkambà Dìyi ne Yéyè neikalè mu matùkù a ndekeelu aa anyi? Kabyèna bikèngela bwà Mukàji kwalukidilayè ku Maalàki 4 anyi? Kabyèna bikèngela bwà Mukàji àmwèneshiibwè mwàkadìbì mu matùkù a Sodomà anyi? Kabyèna bikèngela bwà buloba kwikalabù ànu menemene mùdìbu emu anyi? Bintu

ebi kî ndimanyishiibwà ànu menemene dyà Dîyì dyà Nzambi dimanyishiibwe kutùdì anyi?

244 Èè, balundà bàànyi, ndi mumanyè ne ndi munkaci mwà kunùlama ntàntà mule, tusunsa dikùmi ne tùtaanu too ne ku didyà dyà mundaamuunyà, kàdi pàmwápa nènjikijè patwàmbà kufika pa díbà adi. Kàdi mònaayi, tàngilàayi kùneeku, mùdìci cintu cipwàngàne. Ncyèna mumanyè ne ndìbà kaayi díngàànùmònàku kàbidì to. Nwamònu anyi?

245 Tàngilàayi, mònaayi eci. Kàdi Nzambi wàkadyànjila kumòna Mukàji-musèla mu Mubàki. Àlèluuyàh! Nwamònu's, bwà kusùngila Mukàj'Èndè, ànu bu Adàmà, bivwa bikèngela kuyaYè pàmwè Nendè. Adàmà ùvwa mumanyè cìvwàye wènza aci; Evà kàvwa mumanyè cìvwàye wènza to, kàdi Adàmà wàkapàtuka ne mukàjèndè. Nwamònu anyi? Ne Yesù wàkangata kaaba kàà Mukàj'Èndè ne wàkalwa mpèkaatù bwèndè Yéyè. Vùlukà ne, Yéyè wàkalwa wèwè, Wàkangata dinyooka dyèbè, bwà wèwè wamòna mwà kwimana pa kaaba Kèndè. Yéyè wàkiimana pa kaaba kèèbè wèwè, bwà wèwè wamòna mwà kwimana pa kaaba Kèndè. Dinanga kaayìpu's wè! Bwobùmwe kaayìpu's wè! Tudìkù mwà kucivila munyi? Mmunyi mutùdìku mwà kwenza cìngà cintu cìdì kacìyi kuMunanga's, mulundà wanyi? Ndi mufwànyine kushàalapù mèbà ne mèbà, kàdi tuyaayìkù kumpàla ndambù.

246 Mùdì dilabala dyà mpenta leelù ewu, ne dilwa dyà Nyumà Mwìmpè mu matùkù a ndekeelu aa, mwàkalayiiwbàci amu, cìdì ànu mùdì bukenji bwà bwena-cintu kùdì mukàndà wà bwena-cintu mulelèlè. Nwamònu anyi?

247 Mpindyewu, udi mwà kupeta mukàndà wà bwena-cintu. Bushùwà's. Nwamònu anyi? Udi mwà kupeta mukàndà wà bwena-cintu bwà lupangu kampànda, kàdi aci kaciyèna ànu cyàmba ne ndwèbè wèwè to. To, mukalenge. Muntu kampànda paanyimà pàapa mmufwànyine kulwa kulùnana ne ndwèndè. Kàdi paùdì upeta bukenji bwà bwena-cintu, aci cìdì cìleeja ne cyònsò cìdìku cìbèngangana naabù ncyumusha, too ne ku cishimikidi. Ncyà bushùwà anyi?

248 Nènku pàdì muntu mwambè ne ùdì witabuuja Dîyì, ne díbà adi pàdì Nyumà Mwìmpè ùlwa, Ùdì mbukenji bwà bwena-cintu. Nènku aci cìdì cikupèèsha dyanyisha, paùdì ne bukenji bwà bwena-cintu abu ne, kantu ne kantu kònsò kààci nkèèbè wèwè, ne byònsò bìdì pambidi pààci mbyèbè wèwè. Amen! Nènku aci cìdì cìtùpèèsha bukenji bwà bwena-cintu, pàdì Nyumà Mwìmpè ùlwa pa mukàndà wà bwena-cintu mulelèlè wùvwà Nzambi mumòne kale wàwa kumpàla kwà difùkà dyà dyulu ne buloba, ne mufunde dìnà mu Mukàndà wà Mwoyi; kàdi mulediibwe kùdì mulùme ne mukàjì, ne mwikàle ku bukòkeshi bwà mpèkaatù, ne mupùile ku mpèkaatù. Kàdi pàngàCitàbùùjì, nngàapeci mukàndà wà bwena-cintu; kàdi

pààlu Nyumà Mwîmpè, Ûvwa mbukenji bwà bwena-cintu ne cyònsò cívwa cibènganganà naanyi aci, nànsha byòbì ne mààmù wanyi ngudi mucyènzè, taatù wanyi ngudi mucyènzè, kaakù wanyi mukàjì ngudi mucyènzè. . .

249 Bu mùvwà mwànà mukesè, wa ciseki ûngààsambìdìdì, mu tusunsa tukesè etu awu, cívwa cífumine kùdì baakakwèndè. Ciseki ncipwekè, cilwè pa mwànà awu, mungãmbi.

250 Kàdì pààlu bukenji bwà bwena-cintu, Cyôci kucikùpula, kuumusha byònsò. Mémè dîbà adi ki mulami wa bukenji bwà bwena-cintu. Amen! Ne ànu mùdìbì bulelèlè ne Nyumà wàkabiisha Kilistò ku bafwè awu, mémè ndi ne mukàndà wà bwena-cintu ne ndi citùpà cyà Mubidi awu, pàmwè ne bukenji bwà bwena-cintu bwà Nyumà Mwîmpè udi wenza ne mubidi wà Dìyì awu wikalè ne mwoyi ànu mwàkènzàYe menemene mu Yèyè amu, mwàkalayàYe mu ditùkù dyà ndekeelu. Bukenji bwà bwena-cintu! Mpèkaatù yànyì yònsò mmyumusha, mpèkaatù yèbè yònsò mmyumusha, kùdì Mashi a Yesù Kilistò, ne Nyumà Mwîmpè mmulwè bu bukenji bwà bwena-cintu ku mukàndà wà bwena-cintu mulelèlè wùdì Nzambì mumpèèshe ku ngàsà, ku didyànjlila-kumanya. Kaa, ekèlekèle!

251 Bwôwà bùdì naabù mbwà cinyì? Kabyèna bikèmesha to pààkambàYe ne: “Kùciinyi to; Ndi Ewu uvwa mufwè ne udi cyàkàbìdì ne mwoyi; ne Ndi ne mwoyi bwà kashidi ne kashidi; ne ndi ne nsapi yà lufù ne yà ifèrnò.” Kanùtácishikù meeji bwà cintu nànsha cimwè to. Nànsha lufù lwinè kalwàkunwènzèlakù bibi to. Mònaayi. Bilenga be!

Tùyaayaaku lùkàsàlùkàsà mpindyewu.

252 Mukàndà wà bwena-cintu mulelèlè! Dibànzà bwalu bwàdì mbujikè. Cyònsò cívwa cibèngangana naawù ncyumusha. Ha-ha-ha! Butumbi's wè! Ndi mwà kwenza maalu a bukùtākàne, kàdì ndi ndyùmvwa bîmpè. Mònaayi. Nwamònu anyi? Kaa, mukàndà wà bwena-cintu mulelèlè, nudikù bamanyè cidì aci cyùmvwija anyi? Udikù mujingùlùle cidì aci cyùmvwija anyi, mwanèètù? Kakwèna cidiku mwà kuumushaci to. Amen. Mémè ki udi naaci mu cyanza. Amen. Ncintu kaayi's. . .

253 Bwena-cintu kaayi? Ndi mpindyewu mupetèle makàsà kùdì Mucimpetedi, ku lufù, dijiikiibwa, ne dibiikà Dyèndè dyà ku lufù. Yèyè mmulwè mémè, bwà ngaamòna mwà kulwa Yèyè. Mpindyewu, Yèyè wàkalwa ngènzàmpèkàatù, bwà mémè ngaamòna mwà kulwa mwànà, amen, ne mwikàle ne mukàndà wà bwena-cintu mulelèlè mu cyanza. “Bwalu bimanyinu ebi nebifilè aba bàdì bìitabuujà,” nwamònu's, mukàndà wà bwena-cintu mulelèlè!

Mpindyewu lùkàsàlùkàsà, kumpàlà kwà...Tucidi ne tusunsa tukwàbò tutwè ku dikùmi.

254 Tùmonààiyibì mpindyewu, lùkàsàlùkàsà, difùùluludiibwa dyà kùdì Nyumà. Nènnùleejè bimanyinu ndambù bwà nwènú kuumvwa. Tàngilààyi, mpindyewu tàngilààyi cidì, “Bukolè bufùùluludi” ebu ki cìvwà cyena-bwalu cyànyì. Paanyimà pàà Mwànà mumanè kubùika ku lufù, tàngilààyi mwàkabènzèlàBu ku Mpenta, cyàkabènzèlàBu, cyàkabènzèlà Bukolè bufùùluludi abu. Bwàkabàfùùlulula.

255 Mpindyewu tùmonàayi cyàkenzèlàBu Stèfanè. Stèfanè ùvwa mùlè tètè ne Bukolè bufùùluludi. Kì ncyà bushuwà anyi? Nwamònu’s, ùvwa mùlè tètè ne Bukolè bufùùluludi. KaBùvwa bumuvwijè mwena bwòwà nànsha. Yèyè wàkamba ne: “Nwènú bàà nshingù mitàndàbàle ne kabàyi batengula mu myoyi ne mu macì aba, nudi misangu yònsò ànu nukàndameena Nyumà Mwìmpè; mwàkenzà baatatwènú, ki munùdì nwenza pèènú. Nganyì wa ku baprófeta bàakaleejà dilwa dyà Mwakàne Awu, uvwa baatatwènú kabàyi bashebèye ne mabwe?” Kaa, ekèlekèle! Bwàkamwenzela cintu kampànda. Bushùwà’s, ùvwa mùlè tètè ne Bukolè bufùùluludi.

Ki bóbò ne: “Kàdi bwà mulùmnyànà wàwa twàmuumùshì kwòkò!”

256 Nènkù pàakafwàye, bàvwa bamwasè mabwe; ne mutù wèndè mukèsè mwenzè ne byà luse awu, mabwè àwùtuuta mùshindù awu. Kubàndulukayè e kwambayè ne: “Ndi mmòna Maulu munzùlùke.” Bukolè bufùùluludi bùvwa bùkwàta munkacì mwà mudimu. “Ndi mmòna Maulu munzùlùke, ne Yesù mwimàne ku dyàbalùmè dyà Nzambì.” Ki cìvwà Bukolè bufùùluludi bwenzèle Stèfanè ncyòci aci.

257 Mònaayi mukwàbò muntu, uvwa ne Bukolè bufùùluludi ebu, dyèndè ùvwa Filipò. Ùvwa mùlè tètè be ne Bukolè bufùùluludi. Ùvwa wènza disangisha dinène mu Sàmaalèyà mwàmwa. Démons yìvwa yìpacìibwa. Bantu bàvwa bàbàtìijìibwa mu Dìnà dyà Yesù Kilistò. Bàvwa munkacì mwà kwenza disangisha dyà cyà bushùwà. Ki Nyumà kwakula nendè, kaa, Bukolè bwe—bwendeshi kupwekabù, ne kwambaBù ne: “Shìya ditàbuluja edi.” Kàdi bambi nebàmbè cinyi? Cidìbo bóbò bàmba kacyèna ne cidìci cìshintulula to. Nwamònu anyi? Yèyè ùvwa mùlè tètè ne Bukolè bufùùluludi. Yèyè ùvwa ne kàsòloonyi, ne—ne Bukolè bwendeshi bùvwa munkacì mwà kumupwekela. KwambaYè ne: “Pàtukà ndà mu cipèlèlà.”

258 Ki kupetayè mutungula kampànda muntwamu, e kumubàtìizayè mu Dìnà dyà Yesù Kilistò; muntu umwèpelè, wàkaya ne Mukenji ku Etyòpà. Ncyà bushùwà anyi? Ki kutùmikilayè Nzambì.

259 Mu kutùmikila kwà Nzambì, pìikalàbi ne kacya kùtu mwanjì kubàtìijìibwa mu Dìnà dyà Yesù Kilistò, bàtìijìibwà, kàdi tàngilà ùmonè mùdì Bukolè bufùùluludi bùkupyà dìbà adi. Nwamònu anyi?

260 Pààkenzà Stèfanè cintu cinène eci... anyi, kí n'Stèfanè to. Kàdi Filipò ngwàkenza cintu cinène eci, bwà kushiyaye ditàbuluja dinène adi ne kutùmikila méyì matùma a Nzambi, pààkuujaye, ku dyuja... Ku dibàtiiza dyà mutungula ewu, mu kutùmikila kwà Nzambi, ùvwa múle téntè ne Bukolè bufùululudi mu mùshindù wà ne Bwàkamwambula kuya nendè. “NeBùfuulululè mubidi wèbè wà cifwàkà awu, piikalàbi ne n'Nyumà wákabiisha Yesù ku bafwè ewu.” Wàkafùululula Filipò mu mùshindù wà ne kabàakamumònakù to mu ntàntà pàmwàpa wa kilòmèètà nkàmà yìbìdì ne makùmi ànaayi, mu mwaba kampànda mukwàbò, mu musòkò mukwàbò. Wàkafùululula mubidi wèndè wà cifwàkà awu. Wàkacyènza bishi? Ùvwa múle téntè ne Bukolè bufùululudi abu.

261 Kaa, Èkèleeziyà wa Nzambi udi ne mwoyi, katwèna mwà kushààla biimàne apa tufiba tubùlù twà nsùkaadi tutùdì twamwa eku ne eku leelù ewu etu to. Bikèngela tùùjiibwè téntè ne mu cyuyüya cyà disambila, buujiiibwe ne Bukolè bufùululudi, too ne ku difùululudiibwa dyà kùdì Nyumà Mwímpè! Bikèngela twàmbwibwè, dîngà ditùkù, mu Dyambwibwa adi mwàmwa. Eyowà's, mukalenge. Amen! Kaa, ekèlekèle!

262 Mfwilààyikù luse bwà cyakwidi aci. Mwva ngeela meeji ku maamù utu wenza tufuku tukesè atu, tutùvwa twenza kale wàwa atu, bwà mwànà wa mu dibòko. Bàmwè bàà kunùdì nwènu baamaamù bakùlumpè nudi bacivùlùke. Mwànà wa mu dibòkò pàdìye ùbanga kupaasalala ne mwadi; wèwè wangata ndambù wa ntete yà káfè ne nsùkaadi, ubiswikila mu kafuku ne ubanga kumufibishabi, ànu bwà kumupàku ditalala. Kamwèna dikàndà mu cyòci aci to nànsha dikesè. Necimushebèyè. Nwamònu anyi? Caféine kàdi muntwamu aku, ne bikwàbò, kubitwisha ndambù wa nsùkaadi bwà kumuminyishabi, bìdì bibweja caféine munda mwèndè amu.

263 Bintu byà nàнку awu abi's bikaadi bitùtondè. Alùkilaayi! Nwènu nudi mikankù; alùkilaayi ku Dìyì dyà Nzambi! Ikàlà mupàyàme; kakwèna cìdì mwà kukutàpa ku mwoyi nànsha, ki bwà cinyi udi mudishikàmine pa bìdì bitàngila cilèndwishi cyònsò cyà kùdì bantu. Cyònsò cìdì muntu kanà yònsò wàmba cyà cibèngangana neebè, cìdì cyòci ànu citàmba kutwàla dinanga. Amen. Nènku, Bukolè bufùululudi, mwambwibwe mu myaba yà mu Dyulu, mukankù wùkaadi mubùùkè kumutù kwà nzòòlo awu, mwàmwa muulu mu myaba yà mu Dyulu mu Kilstò Yesù! Kaa!

Bùvwa pambidi pàà Filipò. Bwòbù abu bwàkamufùululula, kumwambula e kuya nendè.

264 Twàngatàayi muntu mukwàbò. Kùvwa muntu dînà dyèndè Henòkà. Mpindyewu, yèyè ùvwa mwèndè ne Dìyì dyònsò dyà Nzambi, munda mwà bidimu bitwè ku nkàmà yitàanu. Ùvwa ne bujaadiki, bwà ne: “Mèmè musangu nànsha wùmwe ncitukù

mwanji kwela Dìyì Dyèndè màyi ku makàsà to.” Ûvwa mûle tètè ne Bukolè bufùùluludi pàakamulengà Bukolè bwendeshi abu, pa Byamù bilamakaja abi, mu mùshindù wà ne kabivwa bikèngela àfwe to; wàkabànda e kuya ànu Kumbèlu. Mubangè ànu wènda wènda cyanààna. Ûvwa mutàmbe. . . Mùvwa Filipò amu, kuulayè tètè ne Bukolè bufùùluludi mu mùshindù wà ne, pamùtu pàa kuyayè too ne mu Gaazà ne kuya ku mwaba mukwàbò, mwômò amu, mwàkamusanganàbi mu nseke mitùmbùkè yà kuntwaku. Pamutù pàa njila awu, yèyè wàkaya pèndè ànu cyanààna, kaa, kwambayè ne: “Mémè’s nkàadi muntu mukùlákàji’s, twamb’eku twamb’eku. Nkàadi ne Bukolè bufùùluludi bùngì cyanààna, mu mùshindù wà ne nènye ànu ngenda ngenda too ne mùndì nguumuka pa buloba.”

²⁶⁵ Ki Bukolè bufùùluludi bùmwèbùmwè butùdi naabù mpindyewu mene ebu. Nwamònu’s, neBufuulululè mubidi wèbè wà cifwàkà awu. Kì mmwómò anyi? M’Makolè mafùùluludi awu.

²⁶⁶ Henòkà, mwikàle ne bujaadiki bupwàngàne abu, bwà ne: “Cyònsò cikaadiku Nzambi mungambìle bwà kwenza aci, ntu mucyènzè. Cyònsò cínkaadiku mumòne Yèyè mungambìle bwà kwenza, ntu mucyènzè.” Ki kulwayè mûle tètè ne—ne Bukolè bwendeshi, anyi—anyì ne Byamù bilamakaja, mu mùshindù wà ne, pàakamulengà Bukolè bufùùluludi, Byamù bilamakaja, Bwàkamutùntumuna ànu buludì e kubànda nendè. Wàkuumuka pa buloba wènda wènda, e kubwelayè mu Dyulu.

²⁶⁷ Mpindyewu, mpindyewu mònaayi, bwà Eliyà. Paanyimà pàa. . . Tàngilàayi, Eliyà, mupròfetà munène awu, muntu mu dituku dyèndè. Mfwilàayikù luse. Mwanèètù wa balùme, mwanèètù wa bakàji, mu ditùkù adi yèyè wàkamba ne mèyi mashilè bakàji bà kwisù kulaaba bilaabu abu, ba-Izabèlè ne ba-Aakàbà abu. Ne wàkiimana too ne. . . Ne muntu nànsha umwè, mwàkamwèkàbi, kàakimanakù nendè to. Kàdi ki yèyè kutàndisha, kunyangakaja, ne kwimana mwaba awu, kàdi Nzambi wàkatàngila bwalu bwèndè ne wàkamukwàcisha mu mwaba wònsò. Nudi bamanyè’s, mukùlumpè awu wàkacyòka dǐngà ditùkù. Kwambayè ne: “Nkàadi ngenda nkùlakaja, mu mùshindù wà nciciyi mwà kutùngunuka kàbìdì to.” Ûvwa ànu mutùngùnùke, ngeela meeji, ne bidimu makùmì citèèmà; mukùlákàje mupwè, ne wènda wèndakana kuntwaku, ne ùvwa mûle tètè bikolè ne Bukolè bufùùluludi. Nudi bamanyè mùdi bwalu anyi? Ûvwa mutàngile dyàmwàmwa dyà Yadènè.

Éyi Nzambi wa yààyà! Mémè’s nkàadi ngamba kumòna dyàmwàmwa diinè. Kàdi nwènù?

²⁶⁸ Mûle tètè ne Bukolè bufùùluludi, mu mùshindù wà ne, wàkamòna dikalù dyà mvità diswika dyàmwàmwa, tubalù twà Kapyà ne dikalù dyà mvità dyà Kapyà, biswikila ku mucì kampànda dyàmwàmwa. Kuyayè ànu tàràkàtàràkà

too ne dyàmwàmwà dyà musùlù ne kwalukilayè Kumbèlu, kàyikù nànsha mufwè to. Bukolè bufùùluludi kutùmabù, kwenzabù bwà dikalù dyà mvità dipwekè difùmina mu Dyulu bwà kumwambuladì. Kukwàtayè mene ne cinkutu cyèndè ne kucikùpilayè Eliyà panshi. Ncyà bushùwà's.

269 Mpindyewu, dībà adi muntu awu kwambulayè mùzàbì awu, cifwànyikijilu cyà Èkèleeziyà cyàkàbìdì, nwamònu's, kwambulayè mùzàbì awu. Mpindyewu, yèyè wàkenza bishimà abi misangu yìbìdì, cìdì cifwànyikijilu cyà Kilistò ne Èkèleeziyà. Nwamònu anyi? Èliya wàkabyènza binaayi; yèyè wàkabyènza mwandamukùlù. Nwamònu's, mpindyewu, yèyè ùvwa—yèyè ùvwa ne bukolè abu misangu yìbìdì, bwalu wàkabùlòmba. “Nenwènzè bintu binène kutàmba bìndi Mèmè ngenza ebi.” Nwamònu anyi? Kàdi ùvwa mùle tètè ne Bukolè bufùùluludi, ne bikwàbò, mu mùshindù wà ne wàkenza byòbì ebi, misangu yìbìdì, byàkenzà Elishà abi's, kutàmba byàkenzàye yèyè. Nènku mònaayi, wàkashààla ne mwoyi too ne ku bidimu bitwè ku makùmì mwandamukùlù anyi makùmì citèemà, kukùlakajayè e ku—kufwàye. Kufwàye, ne bòbò—bòbò kumwambula e kumujiikabò.

270 Nùdi bamanyè's, èè, Bukolè bufùùluludi abu kabwàkamushiyakù to. Bidimu byàbùngì, byàbùngì paanyimà pàà cyòci aci, pàkaavwà mubidi mumanè kubola ne mushiyàngàne ne mifùbà yèndè, ùkaavwa mulàdika mu lukità. Nènku bàvwa bambùle muntu mufwè dīngà ditùkù, kàdi kumònabò mwena lukunà, nènku kwimanshabò muntu ewu pamutù pàà mifùbà yà Elishà ayi. Kùvwa Bukolè bufùùluludi bùngì cyanààna pa mifùbà ayi mu mùshindù wà ne muntu awu wàkalàndapuka ne kwalukilayè cyàkàbìdì ku mwoyi. Kaa!

271 “NeBùfuulululè mubidi wèbè wà cifwàkà awu.” Nànsha mùkaavwàye mufwè ne mubole mu lukità amu, kàdi Bukolè bufùùluludi abu bùvwa būsanganyiibwa pamutù pàà buloba abu. Àlèluuyàh! Hè! “Yèyè wàkabiisha Kilistò ku bafwè awu neàfuulululè mubidi wèbè wà cifwàkà awu.” Eliyà kale wàwa, Elishà ne Eliyà. . .

272 Vùlukàayi ne, muntu mufwè awu, mupròfetà awu, mùle tètè ne Bukolè bufùùluludi abu, ùsanganyiibwa mu lukità ne mubolè yònsò; mùvwa Bukolè bufùùluludi bùngì cyanààna, mu mùshindù wà ne, bàakakùpa muntu mufwè pambidi pèndè apu, awu kwalukilayè ku mwoyi. Yèyè ùcivwa ànu mwà kutentekela babèèdì byanza's, kī mmwòmò anyi? Amen. S'ki bwalu mbwòbù abu.

273 Nènku vùlukàayi ne, twètù tudi musunya wà ku misunya Yèndè, Yesù Kilistò awu. “Tudi musunya wà ku misunya Yèndè, mifùbà wà ku mifùbà Yèndè.” Kaa, kakwèna mùshindù nànsha wùmwe wà kucyèpuka to. Netùbiikè ku lufù, s'kwàjiki. Wèwè neùbiikè ku lufù, s'kwàjiki.

274 Paasàkà ùdi ne mushinga kutamba cilèlè kampànda. Bìdi kàbìdì mpindyewu, bwalu mibidi yètù mmifùùlùlùdìibwe pàmwè Nendè ne tudì basòmbe mu myaba yà mu Dyulu.

275 Nènku mubidi ewu wùdi mwà kubolela mu mbù; wùdi mwà kubolela mu buloba; kùdi mwà kwikala kakùyì kùshààla nànsha nkutu wa butù to; kàdi wòwò newùpatukè. Bwalu, Nyumà wàkabiisha Mukalenge wanyì ku lufù awu ùkaadi mufùùlùlùlè mubidi wà cifwàkà ewu. Ùkaadi mufùùlùlùlè mubidi wèbè wà cifwàkà awu. Ne twètù tudì bapeci Bendè bàà mabènesha a dibìikà Dyèndè dyà ku lufù, kabèjì Kèndè kàà assurance wa Mwoyi wà Cyendèlèlè wùntù nyiishapù bikolè ewu, nudi bamanyè's. Kabyèna bikèmesha to pàakambàYe ne: “Kùcìinyi to.” Yèyè nguvwa mwà kumanya.

276 Bwalu ànu mwàkambà Pòlò ne: “Lufù, kalonda kèèbè kàdi penyi? Lukità, bucìmunyi bwèbè bùdi penyi? Mèmè ndi mùle tètè ne Bukolè bufùùluludi. Twasàkidila kùdi Nzambì, Udi utùpèeshila bucìmunyi ku Mukalenge wetù Yesù Kilistò awu.” Èyowà's, mukalenge! Bukolè bufùùluludi. Kaa, ekèlekèlè!

277 Yèyè ùdi ne mwoyi kashidi ne kashidi, “umwèumwè awu makèlèlèlè, leelù, too ne kashidi.” Ebèlù 13.8. Mònaayi, Maasiyà, Mwela maanyi awu; ki mùdi kàbìdì Mukàj'Èndè-musèla, tuuMaasiyà twà twànàtwànà, nwamònu's, Mwela maanyi awu.

278 Mònaayi, lufù kalwèna lùpangisha Bukolè bufùùluludi bwà Nzambì abu to. Lufù kalwèna mwà kuBùpangishakù to. Paùdi naaBù, Bùdi bwà Cyendèlèlè. Kakwèna cyàBwimanyikà to nànsha cìmwè. Kwèna mwà kuBwèla mu nkànu to; kwèna mwà—kwèna mwà kuBwènzela cintu nànsha cìmwè to. Wèwè mushààle too ne mùdi mwoyi wèbè wùjika, aci kacyèna ànu cìBwimanyika to; bwìmpè ànu mwàBù ne kale.

279 Mònaayi, Mòsà ùvwa mùle tètè ne Bukolè bufùùluludi abu. Mmwòmò anyi? Ùvwa mupròfetà uvwa Dìyì dilwa kùdiye. Ùvwa citùpà cyà Dìyì. Ùvwa Dìyì dyà ditùkù adi. Ncyà bushùwà anyi? Ne paanyimà pàà yèyè mumanè kufwà, bidimu nkàma mwandamukùlù, pa Mukùnà wà Dikùdimuka dyà mpàla, ki yèyè udi mwimàne wàwa, pàmwè ne Eliyà. Mmwòmò anyi? Bukolè bufùùluludi, lufù kalwèna lùBùùmushàku to. To, to. “Néngùjuulè cyàkàbìdì.” Banjèlò kulwabò; kumujiikabò mu cibandabanda mwàmwa. Ùkaavwa mumanè kubola ne muyè, mifùbà yèndè yikaavwa miyè, ne bikwàbò byònsò, kàdi Bukolè bufùùluludi abu bùcìvwa ànumù. Bwàkamufùùlulula ne kumupàtula. Nènku's ki yèyè wàwa, mwimàne mwaba awu. Mònaayi.

280 Wèwè udi wamba ne: “Ncyà bushùwà anyi, Mwanèètù Branham, paanyimà pàà bidimu nkàmà mwandamukùlù?” Kaa, ekèlekèlè!

281 Bu nwènù mwà kubala mu Maatàayi, ndi ne Mufùndu, Maatàayi 27.51. Nudi mwà kufùnda, kuwùfùnda. Pàvwà bònsò

bàà kale wàwa, bàvwà biitàbùùje ne Yèyè ùvwa mwà kulwa . . . Bible mmwambè mwaba ewu ne, paanyimà pàà Yèyè mumanè kulwa, bôbò abu bàvwà balààle mu buloba. Bukolè bufuùluludi bùvwa pambidi pààbò, ne bàvwà citùpà Cyèndè, bôbò bansantu abu. Bàvwà citùpà Cyèndè, bwalu bàvwà baMwitàbùùje.

²⁸² Mu mùshindù mushààdile bàvwà ne Mwoyi awu, ku mulàmbù wa mùkòòkò kampànda, difuta kampànda dyà cibawu, divwà kadiyikù mwà kwaluja nyumà wa mùkòòkò pa muntu nànsha. Kàdi bìshi mpindyewu ne Nyumà wa Muntu awu, Nzambi Yèyè mwinè, pambidi pèèbè, wamònu's, kàdi ambàaku tǔng bǔngi bwà Bukolè bufuùluludi butùdi twètù naabù! Kàdi ku difuta dyà cibawu bwà mpèkaatù mwàna wa mùkòòkò ùvwa ùlambudiiibwa, mu cifwànyikijilu. Citùdi twètù naaci kǐ ncifwànyikijilu nànsha; mmubidi wà bwalu. Citùdi tuumvwila bwòwà kǐ cinyi? Kàdi bantu abu bàvwà ànu ne cifwànyikijilu cyanààna, cǐfunkuna ku dibìkà Dyèndè dyà ku lufù, kàdi biikàle bàpweka naaci mu lukità.

²⁸³ Bu mùvwà Yobò kale wàwa mu cikondo cyèndè cyà diteeciibwa dikolè amu, ekèlekèle, bintu byònsò bimuumusha! Dyabùlù kwambayè ne: “Lekèlè mèmè mmupyè. Mèmè's nèmufikishè ku diKwela mulawu cǐmònààmèèsù.” Ki kudyèlayè pa yèyè's.

²⁸⁴ Yèyè ne: “Kwàngaci mwoyi wèndè nànsha.” Ne yèyè wàkenza (yèyè's) byònsò pa kuumusha kwangata kwà mwoyi wèndè.

²⁸⁵ Ne mukàjèndè mwinè kumukùdimukilayè. Mmwambè ne mupùuyà wà mukana mwèndè awu wàkashàala mwenyi kùdiye. Mu ngaakwilù mukwàbò, mukàjèndè kà—kàcivwa mufwànyine kwikala nendè bwalu to. Kàcivwa ùmwèka bu ne ùcivwa mumunangè to, ùkaavwa ànu ùmusàkila kwàka. “Yobò, wèwè's udi mwena dikènga! Bwà cinyi kùyikù wela ànu Nzambi mulawu, kàdi kufwà mwinè?”

Yèyè ne: “Wèwè's udi wakula bu mukàji mukùtākàne.” Kaa, ekèlekèle!

²⁸⁶ Nwamònu's, wàkashàala ànu kacya wàkwàta ku cìvwàye naaci aci. Mpindyewu, yèyè ùvwa mupròfetà. Yèyè ne: “Mèmè ncyèna ngènzàmpèkàatù to. Ndi mufile mulàmbù mulongolola.” Amen. Ùvwa mumanyè mwaba wùvwàye mwimànyine. Ùvwa pa Dìyi. Cìvwà bakwàbò abu bàmba nànsha ciikàle cinyi, yèyè ùvwa mwaba awu mukwàte ànu ku Dìyi. Pashìshe dǐbà dyà bwalu bukòlè adi . . . Kwambayè ne: “Wèwè's udi wakula ànu bu mukàji mukùtākàne.” Yèyè ne: “Mukalenge nguvwa mufile, Mukalenge ngwangaci; mòna's, Dìna dyà Mukalenge dibeneshiibwè!” Yèyè ne: “Ndi mulwè pa buloba apa ncìyi kantu to. Ndi mulwè pànwapa, butakà, nèngùùmukèpu mùshindù wùmwèwùmwè awu. Dìna dyà Mukalenge dibeneshiibwè!” Musòmbe mwaba awu, byùjà bimupàtùke, bàna bèndè bafwè, mutuuta kùdi bulanda, ne balundà bèndè bamukùdimukile bònsò, bidimba

byà mu èkèleeziyà wabò, bikwàbò byònsò, ùdikoonya ne... Mukèngeledi wa luse kaayi's wè! Nànsha umwe wa kunùdi kacya kàtukù mwanjì kupìcila mu byà nàнку to. Nànsha nàнку, yèyè wàkashààla ànu kacya wàkwàta ku Dìyi adi.

²⁸⁷ Yèyè ùvwa mukankù. Kaa, ekèlekèlè! Kùyikù mwà kulama cilàmbà cimujìka kwìsù dìbà dyònsò to. To, to. Dyàkàmwè, mwimàne pa Dìyi adi, cyàkenzekà ncinyì? Maulu kukàngukawù, mikungulu kubangayi kukungula, mikenyi kubangayi kwela, ki Yobò kubàndulukayè e kumòna cìkèènà-kumòna aci, kwambayè ne: "Ndi mumanyè ne Mupikudi wanyì ùdi ne mwoyi. Ku matùkù a ndekeelu Yèyè neimanè pa buloba apa. Ne nànsha paanyimà pàà misàndà yà mu dikòbà mimanè kubùtula mubidi ewu, mifùbà ne byònsò, Bukolè bufùùluludi abu nebwikalèmu. Némmonè Nzambì bwànyì mèmè mwinè, Ùngàadimwènà mèmè mwinè awu. Mèsù ànyì neàtangilè ne kàayi a mukwàbò to." Neyà bushùwà anyì? "Nànsha paanyimà pàà twonyi twànyì twoshìibwe tubùtùke munda mwànyì, nànsha paanyimà pàà misàndà yà mu dikòbà yìdi mu mubidi wànyì mpindyewu eyi, miwùbùtùle."

²⁸⁸ Nudi bamanyè's, misàndà yà mu dikòba kayèna yìlwa kùdi to. Musàndà awu wùkaadi mu wèwè amu, misàndà yèbè sungasunga yà mu dikòbà ayi. Nukààvwakù bamòne aci anyì? Bàkwelè mu mushèètè wà bafwè, ne bàwùkàngè ndendende; bishì abi nebukudyè, nànsha nàнку, bwalu bìdi mu wèwè amu. Wèwè udi ànu musumbà wà bìshiishi, ànu kwine kwònsò aku, munda amu.

²⁸⁹ "Nànsha misàndà yà mu dikòbà, misàndà yànyì yà mu dikòbà mimbùtùle, mubidi wànyì, nànsha nàнку mu mubidi wànyì némmonè Nzambì."

²⁹⁰ Nèнку mu dindà dyà dibìikà dyà ku lufù adi! Butùmbi's wè! Àlèluuyàh! Maatàayi, mufùndi munène ewu, 27.51, mmwambè ne: "Paanyimà pàà Yèyè mumanè kubiishiibwa ku bafwè, bansantu bàà Dipungila Dikùlukulu abu, bààbùngì bàà ku aba bàvwà balààle mu lupwishi lwà buloba abu, bààkapàtuka mu lukità, ne bààkabwela mu cimenga ne bààkamwènekela bààbùngì." Bukolè bufùùluludi abu's, buçikàle ànu pa mifùbà yà Eliyà pàvwàku kakùciyi mifùbà to, buçikàle ànu pa Yobò pàvwàku kakùciyi kushààle nànsha nkutu wa lupwishi lwà mubidi wèndè to. Kàdi Bukolè bufùùluludi abu buçivwa ànukù.

²⁹¹ "Piikalàbi ne Nyumà wàkabiisha Yesù ku bafwè ewu mmusòmbèle munda mwèbè, Yèyè neàfuulululè kàbìdi mubidi wèbè wà cifwàkà awu." Mònaayi, lùkàsàlùkàsà mpindyewu.

²⁹² Wèwè udi wamba ne: "Kaa, mvw'a kujinga bwà ngikalakù ne mwoyi kale wàwa . . ." Wèwè's udi ne mwoyi mu cikondo citàmbe bwìmpè. Mpindyewu piikalàbi ne nwènù bònsò . . .

²⁹³ Ndi nnùmòna nufùnda ndambù wa Mifùndu. Èyo, fùndaayi Tesàlònìkà wa Kumpàlà 4.16. Mònaayi mùdìbi bilengapù's wè,

nwamònu's. Mu . . . “Bansantu, aba bàdi balààle mu Kilistò abu, Nzambi neàlwe naabò pàmwè Nende,” nwamònu's, bansantu mu lukita, biikishe. Ànu mùvwà Eliyà amu; bàmwè mùvwà Elishà amu; nwamònu's, bàmwè bàà kùdibo nebàfuululudiibwè, bàmwè nebàngaciibwè, bàmwè nebiikale mu lukità. Nebàye Nendè. “Mpungi wa Nzambi neàdilè, ne bafwè mu Kilistò nebàbiikè dyàmbedi. Ne twètù bàdi ne mwoyi ne bashààle netwàngaciibwè muulu pàmwè naabò, bwà katwilangana ne Mukalenge mu mpeepèlè.” Bukolè bufuululudi pa bàdi ne mwoyi; Bukolè bufuululudi pa bafwè. Nwamònu anyi?

²⁹⁴ Bukolè bufuululudi bùmwebùmwe bwà Nzambi abu bwikàle buleejiibwe mu baprófeta bònsò bàbìdi aba. Tàngilàayi mènà àbò awu, mmenzè ànu bu a mwomùmwe, Elishà ne Eliyà. Nwamònu Mukàji-musèla ne Mubàki anyi? Umwe wa kùdibo m'Mukalenge Yesù; mukwàbò m'Màndàmù Yesù. Nudi numòna's, àmba kwikala a mwomùmwe, ànu—ànu pankaci pàà—pàà Yèyè ne Mukàji. Nwamònu anyi?

²⁹⁵ Eliyà, kàdi tàngilàayi mùdidi dileejiibwe kaaba aka. Mpindyewu, Elishà . . . Wàkangaciibwa mu dyambwibwa, ùleja Èkèleeziyà, èyo, Eliyà; kàdi Elishà wàkashààla mwikishe too ne ku dibiikà dyà ku lufù. Nwamònu anyi? Mbyenzè ànu mùdi nyuunyi, mwikàle dijinga ne mapwàpwà àbìdi bwà kutwà milèlè. Nwamònu anyi? Èkèleeziyà ùvwa muleejiibwe mwaba awu mene mu baprófeta bàbìdi abu. “Bwalu twètù bàdi ne mwoyi ne bashààle too ne ku dilwa dyà Mukalenge, katwàkucyàmakana aba bàdi balààle nànsha; bwalu Mpungi wa Nzambi neàdilè,” mapwàpwà ònsò àbìdi neàtwanganè, nènku netùbuukè tuye, àlèluuyàh, tùbuukè tuye. Bwalu, (bwà cinyi?) mu bàdi ne mwoyi, anyi bafwè, Bukolè bufuululudi abu bùcidi ànu ne mwoyi.

²⁹⁶ Mònaayi. Vùlukàayi, vùlukàayi mpindyewu ne, bafuululudiibwe bwà kumòna cidi bintu ebi. Tàngilàayi Bukolè bufuululudi bwà ditùkù edi. Vùlukàayi ne, twètù tudi bafuululudiibwe. Ànu àbìdi àdi pànshì aa, bwà dikwàcisha . . .

²⁹⁷ Ne ndi—ndi ngeela meeji ne Mukalenge wetù wàkamba, ne Pòlo kàbìdi ne: “Cidi Taatù mundejè, ncyèna munùsokòke kantu nànsha nàmwe to. Ndi nnwàmila.” Ne mu matùkù a ndekeelu aa patùdi bamòne Bukolè Bwèndè bufuululudi pambidi pèètù apa, Yèyè mmutùpèeshe mene ne Bukolè bufuululudi, bwà kumòna babèèdi bònndopiibwa. Tudi bamòne Bukolè Bufuululudi bùkwàta mudimu munkaci mwètù, mùvwàBu pambidi pààbò musangu awu mu matùkù a ku cibangidilu, nwamònu's, tuBùmòna bwàluja ku cìkèenà-kumòna ne bùbiisha bafwè, tuBùmòna búsàngaja babèèdi.

²⁹⁸ Ditùkù adi mvwa ngambila muntu kampànda, Donavon Weerts mwànà udi mwaba ewu, ngeela meeji ne nwènù bònsò nudi bamumanyè. Mvwa muyè nendè mu dilemba dyà nyama. Kakwàcìkwètù aku . . . Mmwànà mukesè wa maalu malenga.

Ūtu ūlwa mu èkèleeziyà emu. Neikalè. . . Ànu mulundà wanyì mwîmpè mutàmbe. Ne yêyè ūdi ànu. . . Kwambayè ne: “Ncìvwa muswè kukutàcisha to.”

²⁹⁹ Mémè kutàngila, kàdi dicì dyèndè, dinyèngùvùke dyònsò, munda muyè pambèlu. Ki mémè ne: “Maalu kaayi, Donavon?” Kumukwàta ànu ku cianza cyanààna, nùнку ewu, ki kànsèrè aka. Mémè ne: “Donavon, mbwalu kaayi ne dicì dyèbè adi?”

³⁰⁰ Yêyè ne: “Ncyèna mumanyè to, Mwanèètù Branham. Kùkaadi ngondo mitwè ku yìsambòmbò, anyì mwandamutekètè, kàdi nditùngùnùke ànu ne kulwa. . .”

Mémè ne: “Bwà cinyì kùvwakù mwambè cintu kampànda pa bwalu abu?”

³⁰¹ Yêyè ne: “Ncì—ncìvwa muswè kukutàcisha to, Mwanèètù Branham.”

Mémè ne: “Udi mumanyè ne ncinyì anyi?”

Yêyè ne: “Ndi ne cingènyingenyi.”

³⁰² Mémè kumutenteka ànu cianza cyanààna, ncìyi mwambè díyi nànsha òmwè to. Matùkù àbìdi paanyimà pàa cyòci aci, kapàcìvwakù nànsha kaacibangu to. Ncinyì aci? Bukolè bufùùluludi, nwamònu’s, neBùfuulululè mubìdi wèbè wà cifwàkà awu. Dicì dyèndè òvwa òfwànyìne kudìika dyònsò, bwongò bwèndè òfwànyìne kwikala buyè, nwamònu’s, nùнку yêyè mmufwè. Kàdi, Bukolè bufùùluludi! Nwamònu anyi?

³⁰³ Ne òngà òtùkù pàmvwà mucyòke, mémè mwìnè, bwà. . . Mémè kwamba ne: “Bu wèwè. . . Mulumyàna, bìvwa bìmpè wèwè kutùngunuke’s, s’ukàadi ne bidimu makùmi àtaanu. Wèwè, wèwè muswèku kwenza cintu kampànda bwà Mukalenge, mbìmpè òlwìjakajè ne òcyènzè. Ukàadi ukùlakaja.” Nwamònu anyi? Ki mwab’awu mu òndà amu, Bukolè bufùùluludi kulwabù, ki Yêyè kundekela ntàngila òàmwàmwà òyà rìdò, ne mémè kunòmòna nwènù bònsò muntwamu. Uh-huh. Nwamònu anyi? Yêyè ne: “Cyònsò cyùkaadiku munangè, ne cyònsò cìkaadiku cikunangè, mbìkupèèsha.” Nwamònu anyi? Mémè kubàmòna bònsò muntwamu mùshindù awu. Cìvwa ncinyì? Bukolè bufùùluludi.

³⁰⁴ Yone mubuuludi òvwa mùle tètè ne Bukolè bufùùluludi, wàkiimana e kumòna ndekeelu kacya ku cibangidilu awu.

³⁰⁵ Yeshàayi òvwa mùle tètè ne Bukolè bufùùluludi, ne wàkiimana e kumòna Bukalenge bwà bidimu cinunu ne byònsò.

³⁰⁶ Bukolè bufùùluludi! “Nèнку pìikalàbi ne Nyumà wàkabiisha Kilistò ku bafwè awu, mmusòmbèle munda mwèbè, Yêyè neàfuulululè mubìdi wèbè mufwè. . . mubìdi wà cifwàkà.” Vùlukàayi, Bukolè bufùùluludi!

³⁰⁷ Tàngilàayi cìtùdi bamòne mu òtùkù edì. Bukolè bufùùluludi mbulwè kutùdi, bwà kùkàngula Bitampì Mwandamutekète.

Civwa ncinyi, ndungènyi lwà muntu kampànda anyi? To, Bukolè bufuùluludi bwà Nzambi. Nwamònu's, Bukolè bufuùluludi bwà Nzambi mbùkaavwà budyànjlile kwamba ne cyôci eci civwa mwà kwenzeka. Nwamònu's, Bukolè bufuùluludi bwà Nzambi mbufikishe bàà pa buloba ku difila bujaadiki bwà Cyôci aci ne, m'Bulelèlè. Mwanjèlò wa Mukalenge, mùmvwà munwãmbile, ùvwa mwaba awu, mu Dikunji dyà Kapyà; Bukolè bufuùluludi mbufikishe bàà pa buloba ku difila bujaadiki ne Cidi Bulelèlè. Nènku, mwômò amu, bôbò kabàvwa bamanyè ne Civwa ncinyi to; kàdi twètù tuvva bamanyè, tutàngila ànu mu *nùnk*u ewu ne, Cidi m'Mukalenge wetù muulu mwàmwa, nudi numòna's.

308 Yèyè ki Wàkàngula Bitampì abi. Yèyè ngudi Bitampì abi, bwalu Dìyi dijimà dyà Nzambi n'Kilistò, ne Kilistò ki Bitampì bìvwà bikàngùdìbwe abi. Dikàngula dyà Bitampì dìbà adi ncinyi? Kubuulula Kilistò.

309 Ne Banjèlò biinè mwandamutekète abu, bàvwà bàleejà Èkèleeziyà Mwandamutekète yònsò mikùmbànàngàne abu, kàdi twètù katùvwa mene bafwànyine kuCimòna to. Bôbò mbàvwà bacimòne, bôbò mbàvwà bakwàte fòtò awu, kí ntwètù to. Nènku's ki Yèyè awu, mwimàne mwaba awu, Nzuji wa kumutù kwà bònsò; bileeja ne Yèyè ùdi Alpha ne Omega, cibangidilu ne ndekeelu. Dimanyishiibwa kaayi's wè! Bukolè bufuùluludi mbùdi butwènzèle cyôci aci.

310 Bukolè bufuùluludi mbùdi butùfikishà ku dimòna Dilwa Dyèndè. Bukolè bufuùluludi mbùdi butùbàkùle kutùumusha ku lufù kutùtùma ku Mwoyi. Bukolè bufuùluludi mbùdi bùfila dijingulula; bwà kumanya cidi cikutàcisha, ne cyà dyenza; cyùdi mwenzè, ne civwà kaciyi cikèngela bwà wèwè kwikala mwenzè; ne civwà cikèngela bwà wèwè kwikala mwenzè, ne ciwikalà. Bukolè bufuùluludi, bintu byònsò ebi!

311 Mukalenge wetù Yesù mmùle tèntè ne Bukolè bufuùluludi, Yèyè ki uvwa byònsò byà Bwòbù abu abi, pàmwè. Ùvwa mùle tèntè ne Bukolè bufuùluludi, mu mùshindù wà ne Wàkamba nùnk u ne: "Shimbùlaayi mubidi ewu, ne Mèmè nèngùjuulè mu matùkù àsàtù." Nwènù bàdi bàmba bwà dyeyemena mu Bukolè bufuùluludi's! "Shimbùlaayi mubidi ewu, ne Mèmè. . . ntempèlù ewu, ne Mèmè nèmjuulè mu matùkù àsàtù."

312 Bwà cinyi, bwà cinyi Yèyè ùvwa mufwànyine kwamba nànk u? Ùvwa mumanyè ne byàkafùndiibwa bwèndè Yèyè, nwamònu's, bwà ne byàkafùndiibwa bwèndè Yèyè, kùdi Dìyi dyà Nzambi òvwà kadiyi mwà kupangila adi. Dìyi òvwà dyambè ne: "Ncyàkwanyishakù bwà Wà Cijila Wanyi àmonè dibola nànsha, anyi Ncyàkulekela musùukà Wèndè mu ifèrnò to." Nènku Yèyè ùvwa mumanyè ne Bukolè bufuùluludi abu bìvwà mwà kuMubiisha ku lufù, ne kakùvwa mwà kwikala kabùlù kàà mashi nànsha kàmwè kàvwà mwà kubola to.

313 KwambaYè ne: “Shimbùlaayi ntempèlù ewu, ne Mèmè nêmmujuulè mu matùkù àsàtù.”

314 Bwà cinyi? Cìvwa ncipròfeta, Dìyì dyà Nzambi. Ne cipròfeta, Cyòci Dìyì dilelèlè dyà Nzambi, kacyèna mwà kupangilakù to. Ne cipròfeta cìmwècìmwè aci ne Dìyì dyà Nzambi òvwa dyambè ne Yèyè ùvwa mwà kuMubiisha ku lufù adi, didi dyamba ne twètù tukaàdi babiishibwe pàmwè Nendè. Kabyèna bikèmesha to pàakambàYe apu ne: “Kùcìnyi to.” Ne bàakafunda, ne: “Nyumà udikù mpindyewu ewu, nguvwa munda Mwèndè awu, ùdi mpindyewu munda mwètù, ne ngudi kàbìdì ùfùululula mubidi wètù wà cìfwakà.” Kùcìnyi to, mulundà wanyì, M-w-â-n-à mmubiike. Mwànà mmubiike. Kakwèna . . .

315 Mpindyewu tàngilàayi dikùdimuka dyà mpàla. Tuvwa, muntu ne muntu, baleejìbwemù. Mùvwa bansantu bàvwa ne mwoyi bàvwa bambwìbwe, mùvwa Eliyà mwimàne mwaba awu; ne kùvwa Mòsà mwimàne mwaba awu, bansantu bafwè baleejìbw-. . .Kàbìdì, bònsò bàbìdì abu bàvwa ne Bukolè bufùululudi. Umwe ìkalè mufwè, ne mukwàbò ìkalè kàyi mufwè to, bàdikù bònsò.

316 Mònaayi, kaa, tàngilàayi citùdì mpindyewu tumòna mu matùkù a ndekeelu aa. Cintu cìmwècìmwè cyàkalayàYe aci: Yone 14.12. Mpindyewu tàngilàayi. . .[Katùpà kàà mukàbà wa mèyi munda mutupù—Muf.] Cyà bushùwà’s.

Bantu bàdi bàmba ne: “Udi wamba mùdì ne bukolè anyi?” To, to, to.

317 Twètù tudì ànu bu bôbò abu ku Mukùnà wà Dikùdimuka dyà mpàla, nwamònu’s. Ncyà bushùwà ne, twètù katwèna twàmba mutùdì ne bukolè to. Kàdi, twètù, bu—bu mùvwàbo. . .Pa Mukùnà wà Dikùdimuka dyà mpàla, kabàvwa bàmba, Mòsà, wàmba ne: “Mònaayi ne, mònaayi ne ndi nganyi” to, bayiidi bàmba ne, “mònaayi ne ndi nganyi, mònaayi ne ndi nganyi” to. Nudi bamanyè cyàkenzekà anyi? Mònaayi, bàakamòna Yesù mutùmbishìbwe. Ki cyònsò cìvwàbo bôbò baswè kumòna cileejìbwe, Yesù mutùmbishìbwe.

318 Nèku ki mùdìbì kàbìdì leelù ewu, katwèna tuteeta bwà kwikala muntu munène kampànda to. Katwèna mwà kucyùka cìdì bantu bàmba bwètù twètù to. Dìnà wètù kadyèna cintu to; cìdì ne bwalu n’Dìnà Dyèndè Yèyè. Wètù mwoyi, kawèna cintu to; ngWèndè Mwoyi. M’Wèndè Bukolè, kì mbukolè bwètù twètù to. Ne kùdì cintu ànu cìmwèpelè citùdì banangè kwenza, nkuMumòna Yèyè mutùmbishìbwe. Nèku bìdì mwà kwikala munyi? PàdìYe mutùmbishìbwe munda mwètù, ku dibìikà Dyèndè dyà ku lufù didi munda mwètù adi. Tudi tuMumòna muleejìbwe cyàkàbìdì mùvwàYe amu, leelù ewu.

319 Nuumvù aci anyi? Nwamònu’s, dijinga dyètù kì ndyà kutùmbishiibwa to. Dijinga dyètù kì ndyà ònà kampànda ònène to. Dijinga dyètù kì ndyà kubàndisha èkéleeziyà

kampànda, anyi kuvudija bantu mu kàlaasà kàà Dyàlumingu to, anyi kuteeta kubàbwejamù, kwenza mwân'a cidimè, kusàkanganamù, kubiikilangana ku didyà dyà pikiniki, ànyì kutwàla bantu bendè luumù, mbòta, anyi cikwàbò cintu cyà mùshindù awu nànsha. Dijinga dyètù kí ng'adi to. Dijinga dyètù ndyà kuMumòna mutùmbishìibwe. Mutùmbishìibwe, (cinyi?) kaciyi ku diditàmisha to; kàdi munda mwètù, nsòmbelu yètù, kujaadika ne Yèyè ùdi ne mwoyi ne mmusòmbèle munda mwètù.

³²⁰ Bu mèmè mwà kudyùmusha mèmè mwinè mu njila, mu mùshindù wà William Branham kàyi wèdiibwakù nànsha meeji to, ne wèwè kùyi wediibwakù nànsha meeji to, mu mùshindù wà biikàle mwà kumòna Yesù mutùmbishìibwe munkaci mwètù. KuMumòna Yèyè, ki dyètù dijinga ndyadì. Aci ki bufùùl- . . . ki cidi citùpèèsha Bukolè bufùùluludi. Ne cidi citùpèèsha disànka, dyà kumanya ne tudi Nendè, musunya ne mufubà wà ku Yèyè, biikàle Mukàj'Èndè-musèla; ne pa kumòna ngenzèlù Yèndè yimwèyimwè mishindika ayi, ùjaadika munda mwètù ne Yèyè mpindyewu mmubiishìibwe ku bafwè. Nwamònu anyi?

³²¹ Kabyèna bikèmesha to pàakambàYe ne: “Kùcìinyi to”, bwalu mpindyewu, mònaayi, tudi bapikula kùdiYe, ne mpindyewu babiishìibwe ku lufù pàmwè Nendè. Ki cidi Paasàkà ùmvwiya bwà cisàmbà ne, “mubiishìibwe ku lufù pàmwè Nendè”! Mònaayi. Mpindyewu tudi ne Nyumà Wendè munda mwètù, mukàndà wà bwena-cintu mulelèlà mufucila mushinga wònsò.

³²² To, kwèna wamba ne: “Èè, ndi ntèkemena ne nèmfikè” to. Ukàadi mumanè kufika. Kabiyi ne: “Nèmfikè” to. Nkàadi mumanè kufika. Kacya kí mmèmè utu mufikè to; Yèyè ngutu mufikè bwànyì mèmè. Nwamònu anyi? Kì mmèmè to; Yèyè! “Èè, Mwanèètù Branham, bàdi bàmba . . .” Cidibo bàmba kacyèna ne cidici cyènza to. Mwaba awu Yèyè wàkafika, bwànyì mèmè. Ki cyònsò cindì mèmè muswè, cindì mèmè naaci bwalu.

³²³ Ndi ànu—ndi ànu muswè kuMumòna mumwèneshìibwe. Mmunyi mùdi mwà kucyènza, kuMupwekesha anyi? To. Yèyè ùdi munda mwèbè. Nwamònu's, Ùdi munda mwèbè. “Èè, dìbà adi, Mukalenge, bu mèmè mwà kudyùmushakù mèmè mwinè mu njila, Wèwè's udi mwà kumwènesha. Mèmè mwinè. . . Mmunyi m'Ùdi mwà kucyènza? Bwalu Udi mutùme díyi nànkù. 'Bònsò bàdi Taatù muMpèèshe nebàlwe.” Mònaayi. Butùmbi's wè!

³²⁴ Ne bileeji byònsò abi, bitùdi bakùngwije mu dindà emu, kaa, ndi ngeela meeji ku musambu awu wà ne:

Mu dindà dyà dibiikà dyà ku lufù adi,
Pàakòshìibwà myonjì yà lufù,
Netùbiikè ku lufù, (Àlèluuyàh!) netùbiikè ku
lufù.

³²⁵ Nudi nwitabuuja aci anyi? Netùbiikè ku lufù! Munda Mwèndè tudi tulwa citùpà Cyèndè, Paasàkà awu, munsokòntù wà Nzambi musokolola mwàkadibi musangu awu amu, wà

Mwoyi paanyimà pàà lufù. Tudi mpindyewu ne mwoyi, twètù bàvwà kale wàwa bafwè mu mpèkaatù ne matomboka. Citampì cilelèlà cyà Paasàkà ncikòse lufù mu nyungulukilu wanyì mwònsò, ne ndi ne mwoyi. Citampì cyà Paasàkà, ku cibangidilu, cyàkakòsa citampì cyà citampì cyà Loomò, Citampì cyà Paasàkà, cìvwàYe mutwìbwe naaci aci. Nènku bantu, pàvwàbo bàfwa, kwàbò kùvwa kujikè; kàdi Yèyè wàkakòsa citampì aci ne kubuulula munsokòntù awu. Nènku mpindyewu Nzambi, ku Nyumà Mwìmpè Wendè, wàkòsu citampì aci mu nyungulukilu mwònsò mwà nsòmbelu yètù, ne Kilistò ùdi ùbuuludiibwa mùdìYe ne mwoyi munda mwètù, bwalu mpindyewu tudi bafùùlùlùdiibwe pàmwè Nendè. Kaa, ku dibèjì ne ku dibèjì!

Netùbiikè ku lufù, (Àlèluuyàh!)

Netùbiikè ku lufù! (Amen!)

Mu dindà dyà dibèikà dyà ku lufù adi,

Pàakòshiibwà milonda yà lufù,

Netùbiikè ku lufù, (Àlèluuyàh!) netùbiikè ku lufù.

³²⁶ Kaa, kanwènaayikù ne disànka anyì! Mémè ndi ne disànka dngì! Kale wàwa kuntu kwàka, mu kaacisaasa kakesè kàà makàla mu dindà kampànda, bitampì byàkakòshiibwa, ne mèmè kubèika ku lufù pàmwè Nendè, cìfùkiibwà cipyacìpyà. Bukolè Bwendè bufùùluludi; Mwànà mmubiike.

³²⁷ Ànu àbìdì àdì panshì aa, bàvwa bandondèle kaabwalu kakesè kàà mulòbi kampànda wa—wa mishipa. Muntu kampànda ùvwa mulwè kwangata mulòbi mukùlākàjì ku mudìmu bwà kuyayè nendè ku dilòba ku Côte Ouest kwàka. Kupàtukabò mu dindà adi.

³²⁸ Ní kùdikù bàmwè bèènu bàkàadi balòbe kuntwaku mishipa yà kàlebà, mòna's, nudi bamanyè cìdì cyènzekà, kùdi kwènzeka mafwìma mabì be kuntwaku. Ndi mmòna mwakùnyàanyi wa balùme, Eddie Byskal, kwàka nàka, mpandanjila ku ba-Indiens kwàka. Ne tukàadi balòbèlòbe, twètù biinè, ku myelelu ayi.

³²⁹ Pa nàнку mulòbi ewu ùvwa mwenzè bu mwànà wa cibèla-mùsà, nudi bamanyè's. Ùvwa muyè ku dilòba, kàdi kulalukabò. Bindìle bwà bufùku kucyàbu, nudi bamanyè's. Nènku kabà—nènku kabàcìvwa kàbìdì mwà kuumvwa cipungi cyà didìmwija ku mafwìma to, ki mulòbi ewu kusalukayè, kwambayè ne: “Twàmbè ne, tudi munkaci mwà kulaluka batàngìle munkaci mwà mbù! É!” Kusalukayè bikolè.

³³⁰ Yèyè ne: “Sòmbelà panshì, mwanàanyi wa balùme. Sòmbelà panshì.” Mulòbi mukùlākàjì awu, mutùùje yèyè, nudi bamanyè's. Yèyè ùvwa mumanyè cìvwàye wàmba aci. Yèyè ne: “Indilà ànu cyanàànà too ne pàdi dìbà dipàtuka, dìbà adi tudi mwà kumòna mwaba wutùdì.”

Wèwè udi wamba ne: “Ndi ne cyà kwikala Méthodiste? Baptiste? Mwena Mpenta anyì?”

331 Indilà ànu cyaààà. Pàdi Mwànà ùfika, netùmonè mwaba wutùdi. Yèyè ùdi Dìyi. Indilà too ne pawàmònà Dìyi dimwènèshìibwe, ditùmina nsèsà mu Dimiinu, Cisèkiseki cyà dinyùkusha aci, netùmonè mwaba wutùdi. Nudi baMunangè anyi?

332 Mfwilaayikù luse bwà mûndi munùlamè ntàntà buleyi nùnkù. Mbanganyi bàà kunùdi bìikalà mwà kushààlà bwà kwalukila dilòòlò edi? Kaa, alùkilaayi ànu cyàkàbìdì dìbà adi, dilòòlò edi, nwamònu's. Lwà pa dìbà mwandamutekète anyi? Uvwa ne muntu mukwàbò anyi? [Mwanèètù Neville ùdi wàmba ne: "To."—Muf.]

Twinyikàayi mitù yètù.

333 Kùdikù kampànda mwab'ewu, anyi bààbùngì, bàdi kabàyi ne Bukolè bufùùluludi ebu munda mwènù anyi? Mwànà wätùmu nsèsà myaba yònsò, kàdi nukàadi basómbe mu tabernacle emu, batèlèjètèlèjè mikàbà yà méyi, kàdi nànsha nànkù Nyumà kàtukù mwanji kunùfùùlulula mu mushindu wa nwènù bafwànyine kulonda Dìyi dyà Nzambì, bwà nwènù bakàji ne nwènù balùme nwamònakù mwà kutùmikila Dìyi dyònsò didiYe mufunde! Kaa, aci's ncintu cyà njiwù's. Ambà tũng bu ne wèwè udi mufwànyine kwikala dimiinu difwè, kùyi ne Mwoyi munda mwèbè? Kàdi kùdi cintu kampànda munda mwèbè amu, cidì cikwambilà ne: "Ndi—ndi muswè kubiika ku lufù, mu dindà emu. Ndi muswè kubiika ku lufù kuumuka mu ngiikàdìlù ùndi nsanganyibwa ewu. Neyèna muswè kwikala ànu dimiinu difwè, kushààlà mu bitoci ne mucì mûme to. Ndi muswè kubiika ku lufù."

334 Udikù mwà kwela cyanza muulu, kwamba ne: "Nsambidilèku, mwanèètù" anyi? Nzambì àkubènèshè. Nzambì àkubènèshè. Ekèlekèle, tàngilàayi byanza; kakwènàkù mùshindù nànsha mukesè bwà dibìikila dyà ku cyoshelu to. Cìtùdi tubiikila ne ndibìikila dyà ku cyoshelu, bantu bàlwa bànyùngulukila cyoshelu aci, mémè ncitu mutàmbe kuciswa to, twamb'eku twanb'eku. Aci cìvwa ànu cisàkidila ku èkèleeziyà mu matùkù a ditàbuluja dyà ba-Méthodistes. Nwamònu anyi?

335 Bible mmwambè ne: "Bùngì bwònsò bwà bààkiitabuujà abu," nwamònu's, "bààkabàtìijibwa." Kùdi ciina cyà màyi mwaba ewu, cyùle tètè ne màyi, cindile muntu kanà yònsò udi mudìlongòlòle bwà kufwà ku yèyè mwinè awu.

336 Mpindyewu, udi mufwànyine kujiikiibwamù, misangu ne misangu, mu Dìna dyà Mukalenge Yesù; kàdi pàdi ànu dimiinu adi kadìyi Mwoyi to, wamònu's, kaCyàkudifùùlululakù to. To, to, to. Dibàtiiza dyà mu màyi didì bu mùdi lumuma lùvwà lùmatà mu dyulu; lùdi mwà kumata pa dimiinu, kàdi, mwòmò kamùyi Mwoyi to, kadyèna mwà kwikala ne mwoyi to.

337 Kàdi dibàtiiza dilelèlà dyà mu màyi adi, dyà lufù ku wèwè mwinè adi, ne wèwè mwikàle mudìlongòlòle bwà kufwà ku

byònsò byùtùku mulongèshùbwe kùdì twitabàayi ne màngumba abi, biinè bidì bibènganganà ne Dìyì abi, ne wèwè muswè kwenda bu mwànà wa balùme anyì wa bakàjì wa Nzambì, ne mwikàle ucyàmbilamù munda mwà mwoyi wèbè, tàngilà ùmonè cùikalà dibàtiiza dyà mu màyi adi mwà kukwenzela mu dindà emu. “Nyingàlalaayi, muntu ne muntu wa kunùdi, ne nùbatijjiibwè mu Dìnà dyà Yesù Kilistò bwà dilekelediibwa dyà bilèmà byènù, mpèkaatù wenù, nènku nenùpetè Cisèkiseki, mulàmbù wà dinyùkusha. Nenùpetè Bukolè bwendeshi, Nyumà Mwímpè. Bwalu mulyà wùdi kunùdi nwènù, ne bònsò abu. Ku nkòngò yònsò, ki kwikalàwu.”

³³⁸ Taatù Nzambì, ngâ—ngâkùlù ntàntà mule be, ne ndi mwangàte díbà dyà bantu aba dyàbùngì, kàdi, Mukalenge Nzambì, kabyèna ne pàà kwimanyina to. Mbimwèke ànu bu ne bikèngela ànu kulekela ne kuumuka kuya, ne kwikisha, ne kwalukila. Tudi ne mwoyi mu buloba bùdi bupùnga ne lufù, munkaci mwà bantu bàdi bàpùnga ne lufù; biikàle ne Mukenji wà Mwoyi, ne cileeeji cyà dibìikà dyà ku lufù. Nzambì munanga, netwikalè ànu bàà cifwàkà musangu wùmwè, kàdi nebìikalè cinyi bu twètù mwà kulekela mpùnga ewu ùtùpita?

³³⁹ Myoyi yètu mmikwàte kapyà; misùukà yètu mmitùpìke ne disànka; bwà bàdi babwelè aba. Ne bààbùngì kaaba aka bàdi munkaci mwà kuumvwa Dìyiisha edi mu dindà emu. Èyowà, nkàmà yìbidì anyì yisàtù mbeelè byanza muulu. Mbaswè kwitabuuja, Mukalenge. Kaa, bulelèlè dimiinu adi kì ndifwè to, Mukalenge. Mmunyì mùdibo bafwànyine kwela cyanza muulu mùshindù ewu? Kùdi cintu kampànda. Èyi Nzambì, mmémè wa kale ewu, mmukàjì wa Yobò awu mwimàne pààpa, wàmba ne: “Kaa!” Kàdi, Mukalenge, itàbàku bwà Yobò, mwena kwitabuuja awu, àbwelè, mu dindà emu, àfwe ànu menemene, ne àjjiikiibwè kaaba aka mu dibàtiiza dyà mu màyi edi.

³⁴⁰ Mamata a lumuma adi mafùme mu Dyulu awu, Dìyì dyà Nzambì didì dyàmba ne neDisukulè mpèkaatù yònsò ne dimulekela adi! Wèwè udi mubàtijiibwè mu Dìnà dyà Yesù Kilistò, bwà cinyi? Dilekelediibwa dyà mpèkaatù wèbè, mpèkaatù mmilekelela mu Dìnà dyà Yesù Kilistò.

³⁴¹ Swàku, díbà adi, Taatù, swàku. . . Yèyè ùsaama, swàku bwà àpatukè musàngàle. Swàku, yèyè mucibùkile panshi, swàku bwà àpatukè mwinshi mwà Bukolè bwà Nyumà Mwímpè. Pùikalàbi ne bàvwa bangènzàmpèkàatù, swàku bwà bàpatukè basukula ne bakèzùke. Nènku byamù bilamakaja abi, mu kubwela amu; Bukolè bwendeshi bùfumè mu Dyulu, Nyumà Mwímpè, ne àbàbàkùle àyekù naabò, Mukalenge. Fùlululàku mubidì wàbò wà cifwàkà awu, díbà adi netùmvwè myakulu mipyamipyà mishùwashùwàlè, makolè a Nzambì, dinanga didì kadiyi kwamba, ngàsà wa kufwà ne ngàsà wa kwikala ne mwoyi; ne Kilistò mubiike ku lufù, Mubidi kampànda, Mukàjì-musèla mwikàle ùMuleeja pa buloba.

342 Taatù, mbèèbè Wèwè. Bédi byanza muulu. Ngààyiishi Dìyì. Mpindyewu, Taatù, bákidilèku, mündi ndòmba. Mu Dìna dyà Yesù Kìlistò, mmündi ndòmba nùнку. Amen.

343 Nudi baMunangè anyi? Yèyè kí mmulenga wa dikèma anyi? Wèwè udikù musànkishiibwe múdi citùpà cyà dibìikà dyà ku lufù dyà Paasàkà adi, múdi mubiike ku lufù pàmwè Nendè anyi? Elà cyanza muulu. Udi mubadiibwemù.

344 “Bànà bàanyi bakesè,” bu mùvwà Pòlò mufwànyine kwikala mwambè. Kí nkuteeta bwà kumutentula to, kàdi, dinanga, ndi munùangè. Ndi ndwa mu njila yà bipeepèle bikolè ne bikwàbò byònsò, bwà kufika apa, bwà kufika ku dyakula neenù. Mpàtukila mu cipèèlà, mpicila mu mishiki yà nêjè, ne bikwàbò, bwà kufika apa. Tudi tubùuka ne ndèkè. Nwènù nudi nwendesha màshinyi mu ditungà dijimà, bwà twètù kutwilangana. Tudi banangàngane.

345 Tudi muntu citùpà cyà mukwèndè. Kanùlekedikù Sàtaanà ùnwàmbila búnga bwalu to. Bu mutùdi muntu citùpà cyà mukwèndè, tudi citùpà Cyèndè Yèyè. Ne twètù tudi beena-mwàbò bàà Bukalenge, biikàle tusànkila mabènesha aa, pàmwè, a dibìikà dyà ku lufù.

346 Nènku mpindyewu, nwamònu's, mpindyewu nukàadi bamanè kubiishiibwa ku lufù. PàakaMubiishà Nzambi ku lufù apu, Wàkakubiisha ne wèwè. Mwànà ùdi mpindyewu mene pambidi pèèbè, nènku wèwè mpindyewu udi wenda ushààla Mwoyi wà wùsampa mùvwàYe Yèyè amu, bwà kubiishiibwa ku lufù mu kaabujimà mu ditùkù dyà ndekeulu adi. Bintu bidì byènzà dikumbanyina dyèbè abi, udi naabi mpindyewu. Udi mumanyè bwà cinyi? Musùukà wèbè mmushintùlùke, kí mmwòmò anyi? Mubidi wèbè mmulwè mu ditùmikila kùdiCi, kí mmwòmò anyi? Mu ditùmikila kùdi (cinyi, èkèleeziyà anyi?) Dìyì, didì Mwoyi adi, dìbà adi udi mpindyewu mubiishiibwe ku bafwè. M'Paasàkà, mémè pàmwè ne Yesù. M'Paasàkà, wèwè pàmwè ne Yesù. Ne m'Paasàkà, pàmwè neebè, mémè, ne Yesù. Tudi bònsò. . . Anyi, Yesù, wèwè, ne mémè, tudi bònsò babiishiibwe pàmwè ku lufù.

347 Nènku netùbiishiibwè ku lufù ku ditùkù dyà ndekeulu, nànsha bu nyumà yètù mwà kupàtuka mu mibidi yètù, nànsha bu mibidi yètù mwà kukwàta òmòmà, bu yòyi mwà kukwàta kushààla lupwishi, bu yòyi mwà kwoshiibwa kubùtuka, bu yòyi mwà kusanganyiibwa panshì pàà mbù. Bible mmwambè ne: “Mwanjèlò wàkapòngolola lwèndè pa mbù, ne byònsò byàkafwà abi byàkapàtuka.” Kakwèna cìdi mwà kutùsokokakù, anyi mwà kutùtápulula, ne Nzambi utùdi banangè bimpè menemene awu, udi mutùbiishe bònsò pàmwè ku lufù awu to.

348 Nzambi ànùbènèshè. Ndi munùlamè ntàntà mule mwaba ewu. Pìikalàbi ne bantu abu bàcidi ànu ku tèlefonè aku, ncyà bushùwà ne bàdi. . . Meeyà makùmi àtaanu ku kasunsa,

mbafutè cyà bushùwà, mu dindà emu. Kàdi, ncivwa ànu mwà kwimanyika pa dyòdi díbà adi to, bivwa bikèngela ànu bwà mémè kutungunuka.

³⁴⁹ Mpindyewu, bu Mukalenge mwà kwanyisha, nèngààlukilè dilòòlò edi, bwà kwakulakù neenù cyàkàbìdì. Ne mémè nciyi ne mùshindù to, nènku díbà adi nwènù bònsò nudi bamanyè. . . Ndi ncinka ne katwèna pa . . . anyi . . . Twètù katùcyèna kabìdì ku tèlèfonè anyi? Katùcyèna kabìdì ku tèlèfonè to.

³⁵⁰ Nwènù bònsò nudi bamanyè kùnyaaya, kí mmwòmò anyi? Ku Àfrikè! Ndi mubiikile kùkaadi ntàntà mule; kùkaadi bidimu kùndì muteetè bwà kwalukila. Mpindyewu cikèèna-kumòna, Nyumà wa Mukalenge wàlongòlòlù njila. Bàvwa bàmba, pàakacyūmwà beena-kalaba bakwàte ne byà luse abu apu ne, ncivwa mulwè musangu wà ndekeelu wūmwàku awu to, bàvwa bàdyàdija panshi mu malaba muunyà ne bufūku, biikàle bàtwa mikèmu bàdila myadi, bàmba ne: “Mukalenge, citùdì twètù aba benzè ncinyi?” binunu byà bantu’s. Bantu abu kabèèna nànsha biitabuuja ne bòbò abu bàdi ne musùukà to. Nwamònu anyi? Nènku bàvwa bàdila myadi bàtwa mikèmu, ne bàdila myadi.

³⁵¹ Kanùtùmukù díyi kumpàla to. Bu nwènù mwà kuswà kanùtùmukù to. Nwamònu’s, bu byòbì mwà kwenzeka ne dingaanyishila bwà kuyakù adi dikamacilè munkaci mwà bambi abu, s’mbafwànyine kungiimanyika ànu mwaba awu. Bidi bikèngela nyèmù bu cilembi. Nénye kùdì mukalenge-mukàjì uvwa mulwè ne màkaadikà dikùmi ne mwandamutekète mulwè ne bantu ku disangisha awu. Bikèngela nye kalemba nyama mu citùpà cyèndè yèyè cyà buloba. Nènku ndi mbwelamù, mukàndà wànyì wà njila ne bikwàbò byònsò byàmba ne ndi cilembi, kaabiyi bwà masangisha a maalu a Nzambì to.

³⁵² Pashiishe nekwikalè mwanèètù kampànda watwilangana naanyi, wàmba ne: “Bwà cinyi kùyikù wenza kaadisangisha kakesè bwètù twètù?” Bipalu byà ndundu mbimana kufucila mfrangà. Kí mbacimanyè nanshà to. Nwamònu anyi? Kaa, butùmbi’s wè!

³⁵³ Sambilaayikù bwà diswa dyà Nzambì kadìpangishiibu to. Bwà ne, musùukà wànyì wùtù mwelèèle mbilà bwà Àfrikè kacya ànu nkùumuka awu, ngiikalèku ne mùshindù wà kukwàlukila cyàkàbìdì, pashiishe kunùtwàdila mukenji wà disangisha dinène. Pàmwàpa ncyàkunùmònakù kabìdì to, kubangila ku leelù ewu, too ne pàngààlukilà. Tuyààya, ànu mu ndambù wa matùkù mpindyewu, mu matùkù dikùmi a ngondo mwitànù. Nudikù mwà kunsambidila anyi?

³⁵⁴ Vùlukàayi ne, kwèna umanya ntàtù yidiku to, too ne pawàkùfikà; bampàkààmàngà ku nseke ne ku nseke, ne dyabùlù, ne kanwèdikù meeji ne kí mbamanyè cyà dyanza to. Nwamònu anyi? Nènku bikèngela umanyè cyùdì wamba aci,

paùdì wimana kumpàlà kwàbò apu. “Kàdi mêmè ndi mumanyè Undi mwitabùùje, ne ndi mutwishibwe ne Yèyè udi ne bukolè bwà kulama cîndi muMupèèshe too ne ku ditùkù adi.”

Mpindyewu, kùdi ndambù wa mishwalà mitèèka mwab'ewu.

³⁵⁵ Nzambì munanga, bu mùdi Dìyiisha edi mu dindà emu, dyà dibiiikà dyà ku lufù, ne mêmè mwimàne kaaba aka, Mukalenge, ne njaadika ku Dìyì ne Bukolè bufùùluludi abu bùdi munda mwà mwànà udi witabuuja. Ki bwà cinyi, mushindàmèene pa kwitabuuja, mu diitabuuja, Bukolè bufùùluludi abu mbushintùlùle nsòmbelu wanyì. Ne bantu aba mbiitabùùje, Mukalenge, ne mBushintùlùle nsòmbelu yàbò. Nènku tudi tusambidilangana muntu ne mukwèndè.

³⁵⁶ Nyewù ntenteka byanza pa mishwalà eyi, bwà...Swàku bwà Nzambì, Wàkafuùlulula Yesù Kilistò ne kuMujuula mu lukitá awu, ne Nyumà wàkaMubiisha ku bafwè awu, ikalèku musòmbèle mu mubidi wètù.

³⁵⁷ Nyumà uvwa pa mubidi wà Elishà awu, byenzè ne, paanyimà pàà yèyè mumanè kufwà ne kushàale ànu mifùbà pa yòyi awu, yivwa ne Bukolè bufùùluludi munda mwàyì. Byanza byà bàpostòlò bìvwa ne Bukolè bufùùluludi mu byòbì. Meeji a bàpostòlò, mèsù a bàpostòlò, ndi—ndimi yà beena kwitabuuja, byònsò abi bivwa ne Bukolè bufùùluludi.

³⁵⁸ Mpindyewu swàku bwà Bukolè bufùùluludi abu, pàndi ntèekapù Dìyì edi apa, ne byanza byànyì bwà kuleeja ne ndi, ku ngàsà, ewu udi ne Bukolè bufùùluludi abu, swàku Bùfuulululè wònsò wà ku mibidi yìdi yìsaamà eyi, ne bòbò bààlujiibwèku ku mubidi tumatuma, Nzambì, mu Dìnà dyà Yesù Kilistò.


³⁵⁹ Swàku bwà kabiiikadi ànu bwà mishwalà eyi to, kàdi bwà bantu bàdì mu batèèleji mwàmwa bàba, muntu yònsò udi usaama awu. Bànà bakesè bàba, bantu bashindàme, cyònsò cidibo aci, swàku bwà Bukolè bufùùluludi abu bùbàfuùlululè ànu mpindyewu mene, mu Dìnà dyà Yesù. Amen.

³⁶⁰ Mpindyewu, mbanganyì bàdiku ne Bukolè bufùùluludi? Mpindyewu tentèkèlàngànaayi byanza muntu ne mukwèndè, piikalàbi ne Bukolè bufùùluludi abu bùdi munda mwèbè.

³⁶¹ Mpindyewu, kùdi cintu ànu cimwèpelè cidì mwà kuBùpangisha, kucyàmakana, mbupidyà bwèbè abu. Mukàjì kampàndà wàkalenga civwàlù Cyèndè, wàkondopiibwa; disàlaayi dyà beena Loomò dyàkaMutwila matè mwìsù, ne dyàkaya mu ifernò. Nwamònu anyì? Pa nàнку bìvwa... mbilondèshile ku mwaba wùdi wèwè usanganyiibwa. Udi uCìitabuuja anyì? Udi uCìitabùùja anyì?

³⁶² Mpindyewu ndi muswè bwà nwinyikè mitù yènù bwà nùsambidilanganè muntu ne mukwèndè. Sambilà wèwè ànu—ànu ne díyì dikolè cyanààna, wamba ne: “Mukalenge, muntu

ewu” . . . Nwamònu’s, sambidilàngànaayi ànu cyanààna muntu ne mukwèndè.

³⁶³ Nzambì munanga, tudi twenza nùнку mu Dîna dya Yesù Kilstò, Dîna dimwèpelè difila munkaci mwà bantu kutùdi mwà kusùngidiibwa anyi kwondopiibwa. Bantu aba, bàdi biikàle beena-mwàbò bàà Bukalenge, bàdi ne Bukolè bufùùluludi bu ne mbwàbò bôbò, ùBùfùùlùlùlèku bwàbò bôbò, Mukalenge, mpindyewu mene. Nèнку swàku bwà Nyumà ùmukè kùdi mukankù àye kùdi mukankù, ùmukè ku Dîyi àye ku Dîyi, too ne pààmwèneshiibwà kaabujimà kàà Yesù Kilstò mu wònsò wà ku mibidi ayi, bwà dijinga dya mubidi, dya nyumà, anyi dijinga kanà dyònsò dìdìbo naadi, patùdi tutentekelangana byanza muntu ne mukwèndè apa. Mu Dîna dya Yesù Kilstò. 

N'DIJUUKA DYÀ DIBÀ LUA65-0418M

(It Is The Rising Of The Sun)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dindà, matùkù 18 a ngondo mwinâyì, cidimu cyà 1965, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org